

欽定明史

卷六十三之七十二



總裁官總理事務 經筵講官少保兼太子太保保和殿大學士兼管吏部戶部尙書事加大級張廷玉等奉  
敕修

樂三

樂章二

洪武三年定朝賀樂章陞殿奏飛龍引之曲百官行禮奏風雲會之曲丞相致詞奏慶皇都之曲復位百  
官行禮奏喜昇平之曲還宮奏賀聖朝之曲俱見後宴饗九奏中

二十六年更定陞殿韶樂奏聖安之曲 乾坤日月明八方四海慶太平龍樓鳳閣中扇開簾捲帝王興  
聖感天地靈保萬壽洪福增祥光王氣生陞寶位永康寧

還宮韶樂奏定安之曲 九五飛聖龍千邦萬國敬依從鳴鞭三下同公卿環珮響玎璫掌扇護御容中  
和樂音呂濃翡翠錦繡擁還華蓋赴龍宮

公卿入門奏治安之曲 忠良爲股肱昊天德承主恩森羅拱北辰御爐烟遠奏天門江山社稷興安

天下軍與民龍虎會風雲

後不用

洪武二十六年定中宮正旦冬至千秋節朝賀樂章

中宮天香鳳韶之曲 寶殿光輝晴天映懸玉鈎珍珠簾櫳瑤觴舉時簫韶動慶大筵來儀鳳昭陽玉帛齊朝貢讚孝慈賢助仁風歌謠正在昇平中謹獻上齊天頌

宣德以後增定慈宮朝賀樂章天香鳳韶之曲 龍樓鳳閣彤雲曉開繡簾天香芬馥瑤堦春暖千花燦壽聖母齊頌祝御筵奏獻長生曲坤道靈品類咸育和氣四時調玉燭享萬萬年太平福

洪武三年定宴饗樂章

一奏起臨濠之曲名飛龍引 千載中華生聖主王氣成龍虎提劍起淮西將勇師雄百戰收強虜 驅馳鞍馬經寒暑將士同甘苦次第靜風塵除暴安民功業如湯武

二奏開太平之曲名風雲會 玉壘瞰江城風雲繞帝營駕樓船龍虎縱橫飛礮發機驅六甲降虜將勝胡兵 談笑擊長鯨三軍勇氣增一戎衣宇宙清靈從此華夷歸一統開帝業慶昇平

三奏安建業之曲名慶皇都 虎踞龍蟠佳麗地真主開基千載風雲會十萬雄兵屯鐵騎臺臣守將皆奔潰 一洗煩苛施德惠里巷謳歌田野騰和氣王業弘開千萬世黎民咸仰雍熙治

四奏削彘雄之曲名喜昇平 持黃鉞削平荆楚清吳越清吳越暮秦朝晉幾多豪傑 幽燕齊魯風塵

潔伊涼羈隴人心悅人心悅車書一統萬方同轍

五奏平幽都之曲名賀聖朝 天運推遷虜運移王師北討定燕畿百年禮樂重興日四海風雲慶會時

除暴虐撫瘡痍漠南爭覩舊威儀君王聖德容降虜三恪衣冠拜玉墀

六奏撫四夷之曲名龍池宴 海波不動風塵靜中國有真人文身交趾甞裘金齒重譯來賓 奇珍異

產梯山航海奉表稱臣白狼元豹九苞丹鳳五色麒麟

七奏定封賞之曲名九重歡 乾坤清廓論功定賞策勳封爵玉帶金符貂蟬簪珥形圖麟閣 奉天洪

武功臣佐興運文經武略子子孫孫尊榮富貴久長安樂

八奏大一統之曲名鳳凰吟 大明天子駕飛龍開疆宇定王封江漢遠朝宗慶四海車書會同 東夷

西旅北戎南越都入地圖中遐邇暢皇風億萬載時和歲豐

九奏守承平之曲名萬年春 風調雨順遍乾坤齊慶承平時節玉燭調和甘露降遠近桑麻相接偃武

修文報功崇德率土皆臣妾山河磐固萬方黎庶歡悅 長想創業艱難君臣曾共掃四方豪傑露宿宵

征鞍馬上歷盡風霜冰雪朝野如今清寧無事任用須賢哲躬勤節儉萬年同守王業 以上九奏前二奏和緩中四奏壯觀

後二奏舒長其曲皆按月律

十二月按律樂歌

正月太簇本宮黃鍾商俗名大石曲名萬年春 奉天承運黃曆志在安民除惡曾觀中天騰王氣五色虹霓千尺龍繞兜鍪神迎艘艦嘉應非人力鳳凰山上慶雲長繞峯石 天助神武成功人心効順所至皆無敵手握乾符開寶祚略定山河南北飲馬江淮列營河漢四海風波息師雄將猛萬方齊仰威德  
二月夾鍾本宮夾鍾宮俗名中呂曲名玉街行 山林豺虎中原狐兔四海英雄無數大明真主起臨濠震於赫戎衣一怒 星羅玉壘雲屯鐵騎一掃乾坤烟霧黎民重覩太平年慶萬里山河磐固

三月姑洗本宮太簇商俗名大石曲名賀聖朝 雲氣朝生芒碭間虹光夜起鳳凰山江淮一日真主出華夏千年正統還 瞻日角觀天顏雲龍風虎競追攀君臣勤苦成王業王業汪洋被百蠻

四月仲呂本宮無射徵俗名黃鍾正徵曲名喜昇平 風雲密濠梁千載真龍出真龍出鯨鯢豺虎掃除無迹 江河從此波濤息乾坤同慶承平日承平日華夷萬里地圖歸一

五月蕤賓本宮姑洗商俗名中管雙調曲名樂清朝 中原鹿走英雄起回首四郊多壘英主倡兵淮水將士皆雄偉 百靈護助人心喜一呼萬人風靡談笑掃除蟻蠱王業從茲始

六月林鍾本宮夾鍾角俗名中呂角曲名慶皇都 王氣呈祥飛紫鳳虎嘯龍興千里旌旗動四海歡呼

師旅東天戈一指風雲從 將士爭先民樂用駕御英雄聖德皆天縱率土華夷歸職貢詞臣拜獻河清

頌

七月夷則本宮南呂商俗名中管商角曲名永太平 鳳凰佳氣好王師起義乾坤初曉淮水西邊五色

慶雲繚繞三尺龍泉似水更百萬貔貅熊豹軍令悄魚麗鵝鸛風雲蛇鳥 糾糾電掣鷹揚在伐罪安民

去殘除暴天與人歸豪傑削平多少萬里烟塵淨洗正紅日一輪高照膺大寶王業萬年相保

八月南呂本宮南呂宮俗名中管仙呂曲名鳳凰吟 紫微翠蓋擁蓬萊聖天子帝國開麻敷應江淮看

五色雲生上台 櫛風沐雨攻堅擊銳將士總英才躍馬定塵埃創萬古山河壯哉

九月無射本宮無射宮俗名黃鍾曲名飛龍引詞同前起臨濠之曲

十月應鍾本宮姑洗徵俗名中呂正徵曲名龍池宴 大明英主承天運倡義擁天戈星辰旋繞風雲圖

護龍虎磨訶 旌旗所指羌夷納款江海停波從今平定萬年疆宇百二山河

十一月黃鍾本宮夷則角俗名仙呂角曲名金門樂 慶皇明聖主開寶祚起臨濠正汝穎塵飛江淮浪

捲赤子呼號天戈奮然倡義擁神兵百萬總英豪貔虎朝屯壁壘虹霓夜繞弓刀 鳳凰山勢聳層霄佳

氣五雲高愛士伍同心君臣協力不憚勤勞風雲一時相會看魚龍飛舞出波濤靜掃八方氛祲咸聽九

奏簫韶

十二月大呂本宮大呂宮俗名高宮曲名風雲會 天眷 順 淮西真人起布衣正乾剛九五龍飛駕馭英

雄收俊傑承承命布皇威 一劍立鴻基三軍擁義旗望雲霓四海人歸整頓乾坤除暴虐歌聖德慶雍

熙

武舞曲名清海宇 拔劍起淮土策馬定寶區王氣開天統寶祿慶乾符武略文謨龍虎風雲創業初將

軍星繞弁勇士月彎弧選騎平南楚結陣下東吳跨蜀驅胡萬里山河壯帝居

文舞曲名泰階平 乾坤清靈治功告成武定禍亂文致太平郊則致其禮廟則盡其誠卿雲在天甘露

零風雨時若百穀登禮樂雍和政刑肅清儲嗣既立封建乃行讒佞屏四海賢俊立朝廷玉帛鐘鼓陳兩

楹君臣庶歌揚頌聲

四夷舞曲 其一小將軍大明君定宇寶聖恩寬寧江山東虜西戎北狄南蠻手高擎寶貝盤 其二殿

前歡五雲宮闕連霄漢金光明照眼玉清金水聲潺潺頤頤觀趨瞻看儀鑿嚴肅百千般威人心膽寒

其二慶新年虎豹關文武班五綵間慶雲朝霞燦黃金殿喜氣增丹墀內仰聖顏翠繞紅圍錦繡班高樓

十二欄笙簫趁紫壇仙音韻瑤築按拜舞齊歌謠讚吾皇萬壽安 其四過門子定宇寶定宇寶寧江山



撫百蠻謳歌拜舞仰祝讚萬萬年帝業安

洪武十五年重定宴饗九奏樂章

一奏炎精開運之曲 炎精開運篤生聖皇大明御極遠紹虞唐河清海晏物阜民康威加夷獠德被戎羌八珍有薦九鼎馨香鼓鐘鐺宮徵洋洋怡神養壽理陰順陽保茲遐福地久天長

二奏皇風之曲 皇風被八表熙熙聲教宣時和景象明紫宸開繡筵龍袞曜朝日金爐曷祥烟濟濟公與侯被服麗且鮮列坐侍丹辰馨折在周旋羔豚升華俎玉饌充方圓初筵奏南風繼歌虞載篇瑤觴欣再舉拜俯禮無愆同樂及斯辰於皇千萬年

奏平定天下之舞曲名清海宇

同前

三奏眷皇明之曲 赫赫上帝眷我皇明大命既集本固支榮厥本伊何育德春宮厥支伊何藩邦以靈慶延百世澤被羣生及時爲樂天祿是膺千秋萬歲永觀厥成

奏舞安四夷之舞曲名小將軍殿前歡慶新年過門子

俱同

四奏天道傳之曲 馬負圖兮天道傳龜載書兮人文宣義畫卦兮禹疇敘皇極建兮合自然綿綿麻數歸明主祥麟在郊威鳳舞九夷入貢康衢謠聖子神孫繼祖武垂拱無爲邁前古

奏車書會同之舞曲名泰階平

同前

五奏振皇綱之曲 周南詠麟趾卷阿歌鳳凰藹藹稱多士爲楨振皇綱赫赫我大明德尊踰漢唐百揆修庶績公輔理陰陽義冠正襟佩都兪在高堂坐令八紘內熙熙民樂康氣和風雨時田疇見豐穰獻禮過三爵歡娛良未央

六奏金陵之曲 鍾山蟠蒼龍石城踞金虎千年王氣都於今歸聖主六代繁華經幾秋江流東去無時休誰言天塹分南北英雄豈但嘖曹劉我皇昔住濠梁屋神遊天錫真人服提兵乘勢渡江來詞臣早獻金陵曲歌金陵進珍饌諧八音繼三歎請觀漢祖用兵時爲膏馮異溱沔飯

七奏長楊之曲 長楊曳綠黃鳥和鳴齒苔呈鮮紫燕輕盈千花浥露日麗風清及時爲樂芳尊在庭管音嘒嘒絲韻泠泠玉振金聲各奏爾能幡幡國老載勸載懲明德惟馨垂之聖經唐風示戒永保嘉名無已太康哲人是聽

八奏芳醴之曲 夏王厭芳醴商湯遠色聲聖人示深戒千春垂令名惟皇登九五玉食保尊榮日昃不遑餐布德延羣生天庖具豐膳鼎鼐事調烹豈但資肥甘亦足養遐齡達人悟茲理恆令五氣平隨時知有節昭哉天道行

九奏駕六龍之曲 日麗中天漏下邇公卿侍宴多令儀簫韶九奏觴九獻爐烟細逐祥風吹羣臣舞蹈  
天顏喜歲熟民康常若此六龍迴駕鳳樓深寶扇齊開扶玉几景星呈瑞慶雲多兩曜增暉四序和聖人  
道大如天地歲歲年年奈樂何

進膳曲水龍吟 寶殿祥雲紫氣濛聖明君龍德宮氤氳霧檜柏間青松龍樓鳳閣雕梁畫棟此時蓬  
萊洞太平清樂曲太清歌 萬國來朝進貢仰賀聖明主一統華夷普天下八方四海南北東西託聖德  
勝堯王保護家國太平天下都歸一將兵器銷爲農器旌旗不動酒旗招仰荷天地 上清歌 一願四  
時風調雨順民心喜攝外國將寶貝攝外國將寶貝見君王來朝寶殿裏珊瑚瑪瑙玻璃進在丹墀 開  
天門 託長生日月光天德萬萬歲永固皇基公卿文武來朝會開玳筵捧金盃

迎膳奏水龍吟曲與進膳同陞座還宮百官行禮奏萬歲樂朝天子二曲與朝賀同

大祀慶成大宴用萬國來朝隊舞 纓鞭得勝隊舞

萬壽聖節大宴用九夷進寶隊舞 壽星隊舞

冬至大宴用讚聖喜隊舞 百花聖朝隊舞

正旦大宴用百戲蓮花盆隊舞 勝鼓采蓮隊舞

永樂十八年定宴饗樂舞

一奏上萬壽之曲 龍飛定萬方受天命振紀綱彝倫攸敘四海康普天率土盡來王臣民舞蹈嵩呼載揚稱觴奉吾皇聖壽天長

平定天下舞曲 其一四邊靜威伏千邦四夷來賓納表章顯禎祥承乾象皇基永昌萬載山河壯 其二刮地風聖主過堯舜禹湯立五常三綱八纒進貢朝今上頓首誠惶朝中宰相變理陰陽五穀收成萬民歡暢賀吾皇齊讚揚萬國來降

二奏仰天恩之曲 皇天眷聖明五辰順四海宣風調雨順百穀登臣民鼓舞樂太平賢良在位邦家永禎吾皇仰洪恩夙夜存誠

黃童白叟鼓腹謳歌承應曲曰豆葉黃 雨順風調五穀收成倉廩豐盈大利民生託賴著皇恩四海清鼓腹謳歌白叟黃童共樂咸寧

四夷舞曲 其一小將軍順天心聖德誠化番邦盡朝京四夷歸伏舞於龍廷貢皇明寶貝擎 其二殿前歡四夷率土歸王命都來仰大明萬邦千國皆歸正現帝庭朝仁聖天階班列眾公卿齊聲歌太平 其三慶豐年和氣增鸞鳳鳴紫霧生祥雲朝霞映熱金爐香味馨列丹墀御駕盈絃管簫韶五音應龍笛

間鳳笙 其四渤海金盃中酒滿盛御案前列羣英君德成皇圖慶嵩呼萬歲聲 其五過門子聖主  
興聖主興顯威靈蠻夷靜至仁至德至聖明萬萬年帝業成

三奏感地德之曲 皇心感地靈順天時德厚生含弘光大品物亨鍾奇毓秀產俊英河清海晏麟來鳳  
鳴陰陽永和平相我文明

車書會同舞曲 其一新水令錦衣花帽設丹墀俱公服百司同會麟至舞鳳來儀文武班齊朝賀聖明  
帝 其二水仙子八方四面錦華夷天下蒼生仰聖德風調雨順昇平世遍乾坤皆讚禮託君恩民樂雍  
熙萬萬年皇基堅固萬萬載江山定體萬萬歲洪福天齊

四奏民樂生之曲 世間的萬民荷天地感聖恩乾坤定位四海春君臣父子正大倫皇風浩蕩人心載  
醕熙熙樂天真永戴明君

表正萬邦舞曲 其一慶太平奸邪濁亂朝綱構禍難煽動戈斯赫怒吾皇親征灞上指天戈敵皆降  
其二武士歡白溝戰場旌旗雲合迷日光令嚴氣張三軍踴躍齊奮揚掃除殘甲如風蕩凱歌傳四方仁  
聖不殺降望河南失機槍 其三滾繡毬肆放拒恃力强一心構殃築滄洲百尺城隍驕毒恣虎狼孰  
能禦當順天心有德隆昌倒戈斂甲齊歸降撫將生還達故鄉自此仁聞愈彰 其四陣陣贏不數孫吳

兵法良神謀睿算合陰陽八陣堂堂行天上虎略龍韜孰敢當俘囚十萬皆疎放感荷仁恩戴上蒼 其  
五得勝回兩傍四方展鳥翼風雲雁行出奇兵敵難量士強馬強過百里眠旌臥鎗勝兵回樂洋洋 其  
六小梁州敵兵戰敗神魂喪擁貔貅直渡長江開市門肆不移宣聖恩如天曠綸音頒降普天下仰吾皇  
五奏感皇恩之曲 當今四海寧頌聲作禮樂興君臣慶會躋太平衣冠濟濟宴彤庭文臣武將共荷恩  
榮忠心盡微誠仰答皇明

天命有德舞曲 其一慶宣和雨順風調萬物熙一統華夷四野嘉禾感和氣一榦百穗一榦百穗 其  
二窄軋兒梯航萬國來丹陛太平年永固洪基正東西南北來朝會洽寰宇布春暉四夷咸賓聲教美自  
古明王在慎德不須威武服戎狄祥瑞集鳳來儀佳期萬萬歲聖明君主華夷

六奏慶豐年之曲 萬方仰聖君大一統撫萬民豐年時序雨露均縷縷五穀貨財殷酣歌擊壤風濟俗  
瀟四夷悉來賓正統皇仁

七奏集禎應之曲 皇天眷大明五星聚北斗平曠虞出現甘露野靈成繭嘉禾生醴泉湧地河水清  
乾坤萬萬年四海永寧

八奏永皇圖之曲 天心眷聖皇正天位撫萬邦仁風宣布禮樂張戎夷稽首朝明堂皇圖鞏固賢臣贊

襄太平日月光地久天長

九奏樂太平之曲 皇恩被八紘三光明四海清人康物阜歲屢登含哺鼓腹皆歡聲民歌帝力唐堯至  
仁乾坤永清共樂太平

導膳迎膳進膳及陞座還宮百官行禮諸曲俱與洪武間同

大祀慶成用纓鞭得勝蠻夷隊舞萬壽聖節九夷進寶隊舞冬至節讚聖喜隊舞正旦節百戲蓮盆隊舞  
嘉靖間續定慶成宴樂章

陞座樂曲萬歲樂 五百昌期嘉慶會啟聖皇龍飛天位九州四海重華日大明朝萬萬世

百官行禮樂曲朝天子 滿前瑞烟香繞蓬萊殿風回韶律鼓淵淵列陞上旌旗綉日至朱躔陽生赤甸  
氣和融徹上元歷年萬千長慶天宮宴

上護衣上花樂曲水龍吟 寶殿金爐瑞靄浮陳玉案列珍羞天花炫彩照曜翠雲裘鸞歌鳳舞虞庭樂  
奏萬歲君王壽

一奏上萬歲之曲 聖主垂衣裳興禮樂邁虞唐簫韶九成儀鳳凰日月中天照八荒民安物阜時和歲  
康上奉萬年觴允祚無疆

賽平定天下舞曲 其一四邊靜天啟嘉祥聖主中興振紀綱頌洋洋功蕩蕩國運隆昌萬歲皇圖壯  
其二鳳鸞吟維皇上天佑聖明景命宣五雲輝三台潤七緯光懸協氣生嘉祥見正萬民用羣賢垂衮御  
經筵宵衣勤政殿禮圖丘大祀精虔明水潔蒼璧圓秉周文承殷薦眷皇家億萬斯年

二漢仰天恩之曲 皇穹啟聖神欽乾運祇郊禋一陽初動霽先春萬福來同仰至仁祥開日月瑞見星  
辰禮樂協神人宇宙咸新

迎膳曲水龍吟 春滿雕盤獻玉桃葭管動日輪高熹微霽色遙映袞龍袍千官舞蹈鈞韶迭奏曲度昇  
平調

進膳曲水龍吟 紫禁瓊筵暖應冬豔八螭乘六龍玉卮瓊學黼座獻重瞳堯天廣運舜雲飛動喜聽廣  
歌頌

進湯曲 其一太清歌長至日開黃道喜乾坤佳氣陽長陰消奏鈞韶音調鳳軫律協鸞簫仰龍顏天日  
表如舜如堯金爐烟暖御香飄玉堦晴霽祥光繞宮梅苑柳迎春好燕樂蓬萊島 其二上清歌雲捧宸  
居五星光映三台麗仰日月層霄霽仰日月層霄霽中興重見唐虞際太和元氣自陽回兆姓歡愉 其  
三兩天門九重霄日轉皇州曉宴天家共歌魚藻龍鱗雉尾高祝聖壽慶清朝



奏黃童白叟鼓腹謳歌承應曲御鑾歌 雅奏樂昇平瞻絳闕集瑤京黃童白叟喜氣盈謳歌鼓舞四海  
靈金枝結秀玉樹含英聽康衢擊壤聲帝力難名

三奏感昊德之曲 帝德運光明一陽動萬物生升中大報蒼壁陳禮崇樂暢飲太清星懸紫極日麗璇  
庭乾坤瑞氣盈海宇安寧

奏撫安四夷舞曲 其一賀聖朝華夷一統萬國來同獻方物修庭貢遠慕皇風自南自北自西自東望  
天宮佳氣鬱重重四靈畢至麟鳳龜龍 其二殿前歡瑞雲晴靄浮宮殿一脈陽和轉禮成交泰開周宴  
鳳笙調龍幄展天心感格人歡忭四海謳歌徧 其三慶豐年賴皇天錫豐年勤禹稼力舜田喜慰三農  
願嘉禾秀瑞麥鮮賦九州貢八埏神倉御廩咸充滿養民以養賢 其四新水令聖德精禋格昊穹大一  
統四夷來貢玉帛捧文軌同世際昌隆共聽輿人頌 其五太平令誕明禋天鑒元后光四表惠澤周流  
來四裔趨前擁後獻萬寶充庭滿囿稽首頓首天高地厚祝聖人多男福壽

四奏民樂生之曲 大報禮初成象乾德運皇誠神州赤縣永清寧靈雨和風樂太平陰陽交暢品物咸  
亨元化自流行允殖羣生

迎膳曲水龍吟 五色祥雲捧玉皇開闔闔坐明光鈞天樂奏冬日御筵張文恬武熙太平氣象人在唐

虞上

進膳曲水龍吟 玉律陽回景運新燕鎬京藹皇仁光昭雲漢一氣沸韶諫錦瑟和聲瑤琴清韻瞻仰天

顏近

進湯曲太清歌 萬方民樂時雍鼓舞荷天工雷行風動喜今逢南轡北貊東夷西戎來朝貢大明宮星

羅斗拱九重天上六飛龍五色雲間雙彩鳳普天率土效華封允協河清頌

奏車書會同舞曲 其一新水令五雲深護九重城感洪恩一人有慶陽初長禮方行帝德文明表率邦

家正 其二水仙子萬方安堵樂康寧九域同仁荷聖明千年撫運承天命露垂甘河獻清見雙歧秀麥

連莖喜靈雪隨冬應覩祥雲拂曙生神與化並運同行

五奏感皇恩之曲 雙闕五星光霓旌樹紫蓋張璇臺玉麻轉新陽鈞天廣樂諧宮商恩深露湛喜溢霞

觴日月煥龍章地久天長

奏表正萬邦舞曲 其一慶太平維天眷我聖明禮圖丘至德精誠乾元永清洪膺景命休徵應泰階平

其二千秋歲聖主乘龍御萬邦慶雲翔化日重光羣臣拜舞稱壽觴載歌天保章 其三滾繡毬五雲

車度九重利見飛龍耀袞章火藻華蟲擊虎敵考臯鐘鼉鼓逢逢八珍列九鼎豐隆堯眉揚彩舜重瞳萬

國咸熙四海雍齊歌頌聖德神功 其四殿前歡萬年禮樂中興日大化觀重熙河清海宴臻祥瑞五行  
順七政齊超三邁五貞元會既醉頌鳧鷖 其五天下樂萬靈朝拱接清都享南郊欽天法祖願聖人承  
乾納祐中和位育總獻範馬陳圖 其六醉太平禮樂萬年規謳歌四海熙衣冠蹈舞九龍墀麗正仰南  
離紫雲高捧唐虞帝垂衣天下文明治鎬烏岐鳳呈嘉瑞真個是人在成周世

大奏慶豐年之曲 聖人懋承乾綏萬邦屢豐年神倉御廩登天田明粢鬱鬯祀孔虔輿情咸豫協氣用  
宣萬古帝國傳璧合珠聯

七奏集禎應之曲 天保泰階平寶露降渾河清嘉禾秀麥集休禎遐絕域喜氣盈一人有慶百度惟  
貞萬國頌咸窻麗正重明

八奏永皇圖之曲 鎬燕集天京頌魚藻歌鹿鳴邊陲安堵萬國窻重譯來庭四海清咸池日曜昧谷雲  
征帝座仰前星灑大豐亨

九奏樂太平之曲 皇極永登祥乾符啟泰運昌玉管回春動一陽金鑿錫燕歌九章虞庭獸舞岐山鳳  
翔日麗袞龍裳主聖臣良

迎膳曲水龍吟 香霧氤氳紫閣重仰天德瞻帝容星輝海潤甘雨間和風樂比鸞魚瑞呈麟鳳永獻卷

阿頰

進膳曲 其一水龍吟萬戶千門啟建章台階峻帝座張三垣九道北斗玉衡光元氣調和雅韻鏗鏘昭  
代慶明良 其二太清歌萬方國盡來庭稽首歌帝仁仰荷生成振乾綱陰陽順序民物樂生逢明聖萬  
年春永膺休命華夷變獠咸歸正蒼生至老不知兵鼓腹含哺囿太平九有享清寧

奏天命有德舞曲 其一萬歲樂太平天子興隆日履初長陽回元吉醴泉芝草休徵集曾聞道五星聚  
室 其二賀聖朝一人元良百度維新握赤符凝元應享太清大禮方行祀事孔明感天心億載恆承慶  
明王慎德四裔咸賓

奏纓鞭得勝蠻夷隊舞承應曲 其一醉太平星華紫殿高雲氣彤樓透九夷重譯梯航到皇圖光八表  
玉宇無塵明月皎銀河自轉扶桑曉平平蕩蕩歸王道百獸舞鳳鳴簫韶 其二看花會普天下都賴吾  
皇至聖看玉關頰歎天山已定四夷效順歸王命天保歌羣黎百姓 其三天下樂九重樂奏萬花開望  
龍樓雲蒸霧靄仰天工雍熙帝載臣民歡戴薄仁恩遍九垓 其四清江引黃鐘既奏陽和長德盛天心  
既人文日月明國勢山河壯衢室民謠頌擊壤

奏致詞曲 其一清江引鈞天畢奏日方中既奏歡聲動雲章傍宸龍颺勢翔威鳳萬方安樂興嘉頌

其二千秋歲上下交歡燕禮成一陽奮萬彙咸亨風雲會合開明運紫極轉璇衡

宴畢百官行禮曲朝天子 文班武班歡動承明殿禮成樂備頌聲喧真咫尺仰天顏日照龍簾風回雉

扇翠黠旋奉仙鑾雲間斗間五色金章燦

還宮曲萬歲樂 天回北極雲成瑞望層霄重華日麗九核八極樂雍熙祝聖壽萬萬歲

永樂間小宴樂章

一奏本太初之曲朝天子 混兮沌兮水土成元氣不分南北與東西未辨天和地萬象包涵其中秘密  
難窮造化機是陰陽本體乃爲之太極兩儀因而立

二奏仰大明之曲歸朝歡 太極分混然方始見儀形清浮濁偃乾坤定日月齊興昭青霄萬象明陽須  
動陰須靜陰與陽皆相應流行二氣萬物俱生

三奏民初生之曲 其一沾美酒乾坤清宇宙靈六合淨四維正萬象原來一氣生定三才五行民與物  
共成羣 其二太平令爲一類不分人品竟生食豈曉庖烹避寒暑業居穴遁披樹葉相尋趁如何是愛  
親世情治生雖混然各安其性

四奏品物亨之曲醉太平 黎民生世間萬物長塵寰陰陽交運轉循環久遠時庶繁相傳氣候應無間

品物交錯愚誰鑒望巨人出世整江山主萬民得安

五奏御六龍之曲 其一清江引人心久仰生聖君天使人生聖聖人受天機體天居中正御六龍聖明登九重 其二碧玉簫君坐神京海嶽共從新民仰君恩聖治有人倫人品分萬物增聖承乾百福鑿垂法明尊天命與後朝皆從正

六奏泰階平之曲十二月 聖乃有言天天是無言聖聖人臨正萬物亨通恩威盛社稷安仁德盛江山定選用英賢興王政分善惡賞罰均平三公九卿左右股肱庶事康寧

七奏君德成之曲 其一十二月皇基以興聖帝修身奉天體道聖德愈明敬天地勤勞萬民立法度上下咸寧 其二堯民歌風俗禮樂厚彝倫爰興學校進儒經賢臣良將保朝廷四野人民頌歡聲用的是賢英賢英定太平寰海皆歸正

八奏聖道行之曲 其一金殿萬年歡三綱既定九疇復興聖道如天嘉禾齊秀寒暑和平聖威無邊皇基穩勝磐石慶雲生景星長現三光輝耀百穀收成萬姓安寧 其二得勝令聖德感皇乾甘露降山川萬邦來朝貢奇珍擺布全玉階下鳴鞭仰聖主升金殿丹墀列英賢讚吾皇豐稔年

九奏樂清寧之曲 其一普天樂萬邦寧皇圖正父君母后天下咸欽君治外永聖明后治內長安靜後

聖承乾皆從正德相傳聖子神孫天威浩蕩江山永固洪福無窮 其二沽美酒和氣生滿玉京祥烟起  
映皇宮明聖開基整萬民風雲會帝庭奏簫韶九韻成 其三太平令紫霧隱金鸞彩鳳祥光罩良將賢  
臣玉案列珍羞美醞寶鼎熱龍涎香噴至尊永靈儲嗣守成賀萬萬歲一人有慶

右二奏至八奏俱奏百戲承應第九奏魚躍于淵承應奉天門宴百官止用本太初仰大明民初生三奏  
曲其進酒進膳樂同惟百官叩頭禮用朝天子曲宴畢導駕還宮用御鑾歌

嘉靖間仁壽宮落成宴饗樂章

一奏本太初之曲朝天子 帝誠帝明寶位基昌命仙苑開筵歌鹿鳴亭殿天章映我有嘉賓鼓瑟吹笙  
宗周行昭德音日升月恆萬載皇圖正

二奏仰大明之曲殿前歡 天保定聖人多壽多男慶修和禮樂協中興麗正重明如山阜如岡陵如川  
方至莫不增協氣生禎祥應百神受命萬國來庭

三奏民初生之曲 其一沽美酒黃河清寶露凝瑞麥呈靈鵲鳴諸福來同仰聖明喜萬寶告成占景緯  
泰階平 其二太平令念農桑衣食之本仰君德獨厚民生事耕鑿羣黎百姓歌鹿鳴神人胥慶明主宴  
嘉賓承篋鼓瑟吹笙繼自今福增天定

四奏品物享之曲醉太平 瑤宮怡聖顏闔苑隔人寰吹笙鼓瑟賓旨酒天開宴鹿鳴歌舞黃金殿賴吾  
皇錫福萬民安醉歌天保歡

五奏御大龍之曲 其一清江引聖主有道樂昇平宴會延休慶務本軫民生弘化凝天命欣落成萬載  
開鴻運 其二碧玉簫帝重農桑法駕起明光麟遊鳳翔宴陳天保章開玳筵薦瑤觴既醉頌洋洋聖德  
巍皇恩揚世際唐虞上

進膳曲 其一水龍吟寶瑟瑤笙鼓吹喧聖天子御華筵南山萬壽瑞日正中天百穀豐年八方珍膳人  
樂昇平宴 其二太清歌祥麥嘉瓜臻瑞仰荷堯舜主愛育羣黎感天意五風十雨秋報春祈徧爾德勸  
農桑日用飲食嘉賓和樂開筵地紅雲捧雕盤珍味山呼萬歲福無疆日升川至 其三上清歌仰賴吾  
皇參天兩地凝和氣四三王六五帝國家興賢才爲上瑞養萬民九域熙百祿咸宜 其四開天門寶殿  
輝龍虎風雲會瞻丹陛觀紫微周詩歌既醉螽斯麟趾開祥瑞仰飛龍在天位

國風亭宴講官樂章

一奏本太初之曲朝天子 九重詔傳殿閣開秋宴授衣時節肅霜天禾稼登場徧鼓瑟吹笙昇平重見  
工歌七月篇春酒當筵獻願吾皇萬年歲歲臨西苑



二奏仰大明之曲殿前歡 鳳苑御筵開黃花映玉階鹿鳴天保歌三代古調新裁奉君王萬壽孟日月

明乾坤大看年年秋報賽太平有象元首明哉

三奏民初生之曲 其一沽美酒熙春陽化日長執懿筐采柔桑拾繭綠絲有萬箱染紅黃孔陽爲公子

製衣裳 其二太平令勤樹藝歲年豐纓九十月禾黍登場爲春酒甕浮新釀村田樂齊歌齊唱鑿公堂

殺羊舉觴繼進著兕觥祝聖壽萬靈扶相

四奏品物亨之曲醉太平 納嘉禾滿場釀御酒盈缸公桑蠶績製元黃服龍衣袞衮斯蟋蟀諧清唱

水光山色明仙仗幽風亭殿進霞觴祝聖壽無疆

五奏御六龍之曲 其一清江引九月風光何處有鳳苑在龍池右農夫稼已登公子衣方授萬歲君王

頻進酒 其二碧玉簫凡我生民農桑最苦辛終歲經營氣候變冬春田峻欣婦子勤詠國詩仰化鈞場

闡新風雨順宴御堦龍顏近

進膳曲 其一水龍吟養老休農敝御筵瀉春酒介耆年封羊剪韭社鼓正闐闐香粳米顆升堂拜獻此

樂真堪羨 其二太清歌九月天開西苑宸居無逸殿講幄張筵集儒流雲蒸星炫璧緯珠躡瞻御製煥

天章昭回雲漢堯天舜日民安宴御廩神倉百穀登金輝玉燦休徵見大有豐年 其三上清歌鳳苑宸

居公桑帝藉今方舉躬耕蠶勸士女獻羊羔升堂奏樂舞葵菽棗壺上珍廚萬壽山呼 其四開天門闕  
風亭共仰吾皇聖百穀登萬國咸寧民康物阜禎祥應仰乾運俯坤靈

隆慶三年大閱禮成回鑾樂章

武成之曲 吾皇闕武成簡戎旅壯帝京龍旗照耀虎豹營六師雲擁甲冑明威靈廣播蠻夷震鸞稽首  
頌昇平四海澄清

嘉靖間皇后親蠶宴內外命婦樂章

陞座奏天香鳳韶之曲 春雲綠繞芳郊曙喜乾坤萬象咸舒爾臯蕙圃迎仙馭采桑條攀茂樹蠶宮闕  
館親臨御璧月珠星照太虛開筵還駐翠旂旗萬載垂貞譽

進膳曲沾美酒 蠶禮成鳳輦停薦霞觴列雲屏宮妃世婦仰坤寧祥雲映紫冥同頌耀前星

回宮御鑾歌 惟天啟聖皇君耕藉后躬桑身先田織率萬邦天清地寧民阜康百穀用成四夷來王治  
化登虞唐世發禎祥

承樂間定東宮鑾樂章

一奏喜千春之曲賀聖朝 開國承天聖感極多總一統封疆闡百姓快活萬物榮光共沐恩波仙音韻

合讚昇平詠歌齊朝拜千歲東宮滿國春和

二奏永南山之曲水仙子 洪基永固海波清盛世明時禮樂華興夷一統江山靜民通和樂太平讚東

宮仁孝賢明秉鈞衡端正順乾坤泰亨坐中華萬世昌寧

三奏桂枝香之曲蟾宮曲 曉光融宴饗春宮日朗風和嘉氣蔥蔥鎮領台樞規宏綱憲禮節至公事聖

上柔聲婉容問安寧勤孝虔恭果斷寬洪剛健文明聖德合同

四奏初春曉之曲小梁州 端拱嚴宸事紫微秉運璇璣四時百物總相宜仰賴明君德大業勝磐石皇

儲仁孝明忠義美遐方順化朝儀孝能歡慈愛心敬篤上尊卑意禮上和下睦民鼓舞樂雍熙

五奏乾坤泰之曲滿庭芳 春和玳筵安邦興國欽聖尊賢文英武烈於民便禮樂成全享大業中庸不

偏順天常節儉爲先達文獻嚴儀訓典孝敬億千年

六奏昌運頌之曲喜秋風 文武安軍民樂宴文華會班儂五雲齊動鈞天樂賀春宮讚皇朝

右二奏至六奏俱奏百戲承應

七奏泰道開之曲沽美酒 布春風滿畫樓對嘉景鳳凰洲高捧金波碧玉甌設威儀左右分品從列公

侯 其二太平令效聖上誠心勤厚主宗器嚴備春秋諧律呂仙音齊奏欽王政皇天保伯拜舞頓首讚

祝進酒于千歲康寧福壽

迎騰樂曲水龍吟 方響笙簧鼓樂喧排寶器開玳筵鸞儀旌節錦繡景相連簪纓趨進皆來朝見春滿  
文華殿

陞座還宮百官行禮奏千秋歲曲 堯年舜日勝禹周慶雲生縈繞鳳樓風調雨順五穀收萬民暢歌謳

朔望朝  
參同

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

儀衛

周官王之儀衛分掌於天官春官夏官之屬而蹕事則專屬於秋官漢朝會則衛官陳車騎張旗幟唐沿隋制置衛尉卿掌儀仗帳幕之事宋衛尉領左右金吾衛司左右金吾仗司六軍儀仗司主清道徼巡排列牽引儀仗元置拱衛司領控鶴戶以供其事歷代制度雖有沿革異同總以謹出入之防嚴尊卑之分慎重則尊嚴尊嚴則整肅是故文謂之儀武謂之衛天子出車駕次第謂之鹵簿而唐制四品以上皆給鹵簿則君臣並得通稱也明初詔禮官鹵簿彌文務從省節以示尙質去奢之意凡正至聖節朝會及冊拜接見蕃臣儀鸞司陳設儀仗而中宮東宮親王皆有儀仗之制後或隨時增飾要以洪武創制爲準則焉茲撮集禮所載大凡以備考核其郡王及皇妃東宮妃以下儀仗載在會典者並著於篇云

皇帝儀仗吳元年十二月辛酉中書左相國李善長率禮官以卽位禮儀進是日清晨拱衛司陳設鹵簿列甲士於午門外之東西列旗仗於奉天門外之東西龍旗十二分左右用甲士十二人北斗旗一纛一

居前豹尾一居後俱用甲士三人虎豹各二馴象六分左右布旗六十四門旗日旗月旗青龍白虎風雲雷雨江河淮濟旗天馬天祿白澤朱雀元武等旗木火土金水五星旗五嶽旗熊旗鸞旗及二十八宿旗各六行每旗用甲士五人一人執旗四人執弓弩設五輅於奉天門外玉輅居中左金輅次革輅右象輅次木輅俱並列丹墀左右布黃麾仗黃蓋華蓋曲蓋紫方繖紅方繖雉扇朱團扇羽葆幢豹尾龍頭竿信幡傳教幡告止幡絳引幡戟斨斨儀鎗斨等各行丹陛左右陳幢節響節金節燭籠青龍白虎幢班劍吾杖立瓜臥瓜儀刀鎧杖戟骨朶朱雀元武幢等各行殿門左右設圓蓋一金交椅金腳踏水盆水盂圓黃扇紅扇皆校尉擊執洪武元年十月定元旦朝賀儀金吾衛於奉天門外分設旗幟宿衛於午門外分設兵仗衛尉寺於奉天殿門及丹陛丹墀設黃麾仗內使監擊執於殿上凡遇冬至聖節冊拜親王及蕃使來朝儀俱同其宣詔赦降香則惟設奉天殿門及丹陛儀仗殿上擊執云其陳布次第午門外刀盾叉各置於東西甲士用赤奉天門外中道金吾宿衛二衛設龍旗十二分左右用青甲士十二人北斗旗一纛一居前豹尾一居後俱用黑甲士三人虎豹各二馴象六分左右左右布旗六十四左前第一行門旗二每旗用紅甲士五人內一人執旗旗下四人執弓箭第二行月旗一用白甲士五人內一人執旗旗下四人執弩青龍旗一用青甲士五人內一人執旗旗下四人執弩第三行風雲雷雨旗各一每旗

用黑甲士五人內一人執旗旗下四人執弓箭天馬白澤朱雀旗各一每旗用紅甲士五人內一人執旗  
旗下四人執弓箭第四行木火土金水五星旗各一隨其方色每旗用甲士五人內一人執旗旗下四人  
執弩其甲木青火紅土黃金白水黑熊旗鸞旗各一每旗用紅甲士五人內一人執旗旗下四人執弩第  
五行角亢氏房心尾箕旗各一每旗用青甲士五人內一人執旗旗下四人執弓箭第六行斗牛女虛危  
室壁旗各一每旗用青甲士五人內一人執旗旗下四人執弩右前第一行門旗二每旗用紅甲士五人  
內一人執旗旗下四人執弓箭第二行日旗一用紅甲士五人內一人執旗旗下四人執弩白虎旗一用  
白甲士五人內一人執旗旗下四人執弩第三行江河淮濟旗各一隨其方色每旗用甲士五人內一人  
執旗旗下四人執弓箭其甲江紅河白淮青濟黑天祿白澤元武旗各一每旗用甲士五人內一人執旗  
旗下四人執弓箭天祿白澤紅甲元武黑甲第四行東南中西北五嶽旗各一隨其方色每旗用甲士五  
人內一人執旗旗下四人執弩其甲東嶽青南嶽紅中嶽黃西嶽白北嶽黑熊旗麟旗各一每旗用紅甲  
士五人內一人執旗旗下四人執弩第五行奎婁胃昂畢觜參旗各一每旗用青甲士五人內一人執旗  
旗下四人執弓箭第六行井鬼柳星張翼軫旗各一每旗用青甲士五人內一人執旗旗下四人執弩奉  
天門外拱衛司設五輅玉輅居中左金輅次革輅右象輅次木輅俱並列典牧所設乘馬於文武樓之南

各三東西相向丹墀左右布黃麾仗凡九十分左右各三行左前第一行十五黃蓋一紅大繖二華蓋一  
曲蓋一紫方繖一紅方繖一雉扇四朱團扇四第二行十五羽葆幢二豹尾二龍頭竿二信幡二傳教幡  
二告止幡二絳引幡二黃麾一第三行十五戟斨五戈斨五儀鎗斨五右前第一行十五黃蓋一紅大繖  
二華蓋一曲蓋一紫方繖一紅方繖一雉扇四朱團扇四第二行十五羽葆幢二豹尾二龍頭竿二信幡  
二傳教幡二告止幡二絳引幡二黃麾一第三行十五戟斨五戈斨五儀鎗斨五皆校尉擊執丹陛左右  
拱衛司陳幢節等仗九十分左右爲四行左前第一行響節十二金節三燭籠三第二行青龍幢一班劍  
三吾仗三立瓜三臥瓜三儀刀三鐙杖三戟三骨朶三朱雀幢一右前第一行響節十二金節三燭籠三  
第二行白虎幢一班劍三吾仗三立瓜三臥瓜三儀刀三鐙杖三戟三骨朶三元武幢一皆校尉擊執奉  
天殿門左右拱衛司陳設左行圓蓋一金脚踏一金水盆一團黃扇三紅扇三右行圓蓋一金交椅一金  
水罐一團黃扇三紅扇三皆校尉擊執殿上左右內使監陳設左拂子二金唾壺一金香合一右拂子二  
金唾盂一金香爐一皆內使擊執和聲郎陳樂於丹墀文武官拜位之南其器數詳見樂志內三年命製  
郊丘祭祀拜褥郊丘用席表蒲裏爲褥宗廟社稷山川用紅文綺表紅木棉布裏爲褥十二年命禮  
部增設丹墀儀仗黃繖華蓋曲蓋紫方繖紅方繖各二雉扇紅團扇各四羽葆幢龍頭竿絳引傳教告止



信幡各六戟斃戈斃鎗斃各十承樂元年禮部言鹵簿中宜有九龍車一乘請增置帝曰禮貴得中過爲奢不及爲儉先朝審之精矣當遵用舊章豈可輒有增益以啟後世之奢哉九龍車旣先朝所無其仍舊便宣德元年更造鹵簿儀仗有具服幄殿一座金交椅一金脚踏一金盆一金罐一金馬杌一鞍籠一金香爐一金香合一金唾盂一金唾壺一御杖二擺錫明甲一百副盔一百弓一百箭三千刀一百其執事校尉每人鵝帽只孫衣銅帶鞢履鞋一副常朝各色羅掌扇四十各色羅絹織十萬壽織一黃雙龍扇二筵宴銷金羅繖四銷金雨繖四金龍響節二十四

皇后儀仗洪武元年定丹陛儀仗三十六人黃磨二戟五色繡幡六戈五色繡幡六鎗五色錦幡六小雉扇四紅雜花團扇四錦曲蓋二紫方繖二紅大繖四丹墀儀仗五十八人班劍四金吾杖四立瓜四臥瓜四儀刀四鐙杖四骨朶四斧四響節十二錦花蓋二金交椅一金脚踏一金水盆一金水罐一方扇八宮中常用儀衛二十人內使八人色繡幡二金斧二金骨朶二金交椅一金脚踏一宮女十二人金水盆一金水罐一金香爐一金香合一金唾壺一金唾盂一拂子二方扇四承樂元年增製紅杖一對

太皇太后皇太后儀仗與皇后同

皇太子儀仗洪武元年定門外中道設龍旗六其執龍旗者並戎服黃旗一居中左前青旗一右前赤旗

一左後黑旗一右後白旗一每旗執弓弩軍士六人服各隨旗色殿下設三十六人絳引旛二戟鑿六戈  
鑿六鎗鑿六羽葆幢六青方纛二青小方扇四青雜花團扇四皆校尉擊執殿前設四十八人班劍四吾  
杖四立瓜四臥瓜四儀刀四鐙杖四骨朶四斧四響節十二金節四皆校尉擊執殿門設十二人金交椅  
一金脚踏一金水罐一金水盆一青羅團扇六紅圓蓋二皆校尉擊執殿上設六人金香爐一香合一唾  
盂一唾壺一拂子二皆內使擊執永樂二年禮部言東宮儀仗有司失紀載視親王差少宜增製金香爐  
金香台各一爻二叉二傳教告止信旛各二節二幢二夾稍二稍刀盾各二十戟八紅紙油燈籠六紅羅  
銷金邊圓繖紅羅繡圓繖各一紅羅曲蓋繡繖紅羅素圓繖紅羅素方繖青羅素方繖各二紅羅繡孔雀  
方扇紅羅繡四季花團扇各四拂子二唾盂唾壺各一鞍籠一誕馬八紅令旗二清道旗四幟弩一白澤  
旗二弓箭二十副從之

親王儀仗洪武六年定宮門外設方色旗二青色白澤旗二執人服隨旗色並戎服殿下絳引旛二戟鑿  
二戈鑿二鎗鑿二皆校尉執殿前班劍二吾杖二立瓜二臥瓜二儀刀二鐙杖二骨朶二斧二響節八皆  
校尉執殿門交椅一脚踏一水罐一水盆一團扇四蓋二皆校尉執殿上拂子二香爐一香合一唾壺一  
唾盂一十六年詔親王儀仗內交椅盆罐用銀者悉改用金建文四年禮部言親王儀仗合增紅油絹銷

金甯繖一紅紗燈籠紅油紙燈籠各四  
魃燈二大小銅角四從之永樂三年命工部親王儀仗內紅銷金  
繖仍用寶珠龍文凡世子儀仗同

郡王儀仗令旗二清道旗二幢弩一刀盾十六弓箭十八副絳引傳教告止信幡各二  
吾杖儀刀立瓜臥瓜骨朶斧各二戟十六稍十六麾一幢一節一響節六紅銷金圓繖一紅圓繖一紅曲柄繖二紅方繖二  
青圓扇四紅圓扇四誕馬四鞍籠一馬杙一拂子二交椅一脚踏一水盆一水罐一香爐一紅紗燈籠二  
魃燈二帳房一座

皇妃儀仗紅杖二清道旗二絳引幡二戈斃戟斃儀鎗斃吾杖儀刀班劍立瓜臥瓜鐙杖骨朶金鉞各二  
響節四青方繖四紅繡圓繖一繡方扇四紅花圓扇四青繡圓扇四交椅一脚踏一拂子二水盆一水罐  
一香爐一香合一唾盂一唾壺一紅紗燈籠四

東宮妃儀仗紅杖二清道旗二絳引幡二儀鎗斃戈斃戟斃吾杖儀刀班劍立瓜臥瓜鐙杖骨朶金鉞各  
二響節四青方繖二紅素圓繖二紅繡圓繖一紅繡方扇四紅繡花圓扇四青繡圓扇四交椅一脚踏一  
拂子二水盆一水罐一香爐一香合一紅紗燈籠四永樂二年禮部言東宮妃儀仗如親王妃惟香爐香  
合如中宮但亦不用金其水盆水罐皆用銀從之

親王妃儀仗紅杖二清道旗二絳引旛二戟警吾杖儀刀班劍立瓜臥瓜骨朶鐙杖各二響節四青方織二紅綵畫雲鳳織一青孔雀圓扇四紅花扇四交椅一脚踏一水盆一水罐一紅紗燈籠四拂子二公主世子妃儀仗俱同

郡王妃儀仗紅杖二清道旗二絳引旛二戟警吾杖班劍立瓜骨朶各二響節二青方織二紅圓織一青圓扇二紅圓扇二交椅一脚踏一拂子二紅紗燈籠二水盆一水罐一

郡主儀仗紅杖二清道旗二班劍吾杖立瓜骨朶各二響節二青方織一紅圓織一青圓扇二紅圓扇二交椅一脚踏一水盆一水罐一紅紗燈籠二拂子二舊例郡王妃儀仗有交椅馬杌皆木質銀裏水盆水罐及香爐香合皆銀質抹金量折銀三百二十兩郡王妃儀仗有交椅等大器量折銀一百六十兩餘皆自備充用嘉靖四十四年定除親王及親王妃初封儀仗照例頒給外其初封郡王及郡王妃折銀等項併停止萬曆十年定郡王初封係帝孫者儀仗照例全給係王孫者免蓋宗室分封漸多勢難徧給也

總裁官總理事務 經筵講官少保兼太子太保保和殿大學士兼管吏部戶部尚書事加大級張廷玉等奉

敕修

輿服一

大輅

玉輅

大馬輦

小馬輦

步輦

大涼步輦

板輶

耕根車

后妃車輿

皇太子親王以下車輿

公卿以下車輿

繖蓋

鞍轡

有虞氏御天下車服以庸夏則黻冕致美商則大輅示儉成周有巾車典輅弁師司服之職天子以之表式萬邦而服車五乘下逮臣民漢承秦制御金根為乘輿服約元以承大祀東都乃有九旒雲罕旒冕綯屨之儀物踵事增華日新代異江左偏安玉輅棲寶鳳采旄銜金龍其服冕也或飾翡翠珊瑚雜珠豈古所謂法駕法服者哉唐武德間著車輿衣服之制上得兼下下不得擬上宋初袞冕不綴珠玉政和中詔修車輅並建旂常議禮局所釐定用為成憲元制郊祀則駕玉輅服袞冕巡幸或乘象輅四時質孫之服各隨其宜明太祖甫有天下考定邦禮車服尚質酌古通今合乎禮意迄於世宗藉田造耕根燕居服燕

弁講武用武弁更爲忠靖冠以風有位爲保和冠以親宗藩亦一王之制也若夫前代繳屬鞍勒之儀門戟旌節之屬咸別等威至宋加密明初儉德開基宮殿落成不用文石甃地以此坊民武臣猶有飾金龍於牀幔馬廐用九五間數而豪民亦或鎔金爲酒器飾以玉珠太祖皆重懲其弊乃命儒臣稽古講禮定官民服舍器用制度歷代守之遞有禁例茲更以朝家冊寶中外符信及宮室器用之等差附敘於後焉天子車輅明初大朝會則拱衛司設五輅於奉天門玉居中左金次革右象次木駕出則乘玉輅後有腰輿以八人載之其後太祖考周禮五輅以詢儒臣曰玉輅太侈何若祇用木輅博士詹同對曰孔子云乘殷之輅卽木輅也太祖曰以玉飾車古惟祀天用之常乘宜用殷輅然祀天之際玉輅未備木輅亦未爲不可參政張昶曰木輅戎輅也不可以祀天太祖曰孔子斟酌四代禮樂以爲萬世法木輅寧不可祀祀在誠敬豈泥儀文洪武元年有司奏乘輿服御應以金飾詔用銅有司言費小不足惜太祖曰朕富有四海豈恡乎此第儉約非身先無以率下且奢泰之習未有不由小而至大者也六年命禮官考五輅制爲木輅二乘一以丹漆祭祀用之一以皮鞮行幸用之是冬大輅成命更造大輅一象輅十中宮輅一後宮車十飾俱以鳳以將幸中立府故造之非常制也二十六年始定鹵簿大駕之制玉輅一大輅一九龍車一步輦一後罷九龍車永樂三年更定鹵簿大駕有大輅玉輅大馬輦小馬輦步輦大涼步輦板輦各一

具服帳殿各一

大輅高一丈三尺九寸五分廣八尺二寸五分輅座高四尺一寸有奇上平盤前後車櫺並雁翅及四垂如意滴珠板轅長二丈二尺九寸有奇紅髹鍍金銅龍頭龍尾龍鱗葉片裝釘平盤下方箱四周紅髹匡俱十二幅內飾綠地描金繪獸六麟狻猊犀象天馬天祿禽六鸞鳳孔雀朱雀翟鶴盤左右下有護泥板及車輪二貫軸一每輪輻十有八其輞皆紅髹抹金銅鍍花葉片裝釘輪內車心用抹金銅鍍蓮花瓣輪盤裝釘軸中纏黃絨駕轅諸索輅亭高六尺七寸九分四柱長五尺八寸四分檻座皆紅髹前二柱鈿金柱首寶相花中雲龍文下龜文錦前左右有門高五尺一寸九分廣二尺四寸九分四周裝雕木沉香色描金香草板十二片門旁櫺各二及門枕俱紅髹以抹金銅鍍花葉片裝釘櫺編以黃線條後紅髹屏風上雕描金雲龍五紅髹板戩金雲龍一屏後地沉香色上四幅雕描金雲龍四其次雲板如之下三幅雕描金雲龍三其次雲板亦如之俱抹金銅鍍花葉片裝釘亭內黃線條編紅髹匡軟座下蓮花墜石上施花毯紅錦褥席紅髹坐椅靠背上雕描金雲龍一下雕雲板一紅髹福壽板一并褥椅中黃織金椅靠坐褥四圍椅褥施黃綺帷幔亭外青綺緣邊紅簾十扇輅頂并圓盤高三尺有奇鍍金銅蹲龍頂帶仰覆蓮座垂攀頂黃線圓條盤上以紅髹其下外四面地沉香色描金雲內四角地青繪五彩雲以青飾輅蓋亭

內貼金斗棋承紅髹匡寶蓋闕以八頂冒以黃綺謂之黃屋中并四周繡五彩雲龍九天輪三層皆紅髹上安雕木貼金邊耀葉板八十一片內綠地雕木貼金雲龍文三層間繪五彩雲觀板八十一片盤下四周黃銅釘裝施黃綺瀝水三層每層八十一摺間繡五彩雲龍文四角垂青綺絡帶各繡五彩雲升龍圓盤四角連輅坐板用攀頂黃線圓條并貼金木魚輅亭前有左右轉角闕于二扇後一字帶左右轉角闕于一扇皆紅髹內嵌雕木貼金龍間以五彩雲三扇共十二柱柱首雕木貼金蹲龍及線金五彩蓮花抱柱闕于內四周布花毯亭後樹太常旂二以黃線羅爲之皆十有二旂每旂內外繡升龍一左旂腰繡日月北斗竿首用鍍金銅龍首右旂腰繡黻字竿首用鍍金銅戟各綴抹金銅鈴二垂紅纓十二纓上施抹金銅寶蓋下垂青線盼踏梯一紅髹以抹金銅鍍花葉片裝釘行馬架二紅髹上有黃絨匾條用抹金銅葉片裝釘有黃絹幟衣卽遮塵油絹雨衣青氎衣及紅油合扇梯紅油托叉各一輅以二象駕之

玉輅亦駕以二象制如大輅而無平盤下十二榻之飾輅亭前二柱飾以搏換貼金升龍屏風後無上四榻雲龍及雲板之飾天輪內用青地雕木飾玉色雲龍文而太常旗及踏梯行馬之類悉與大輅同

大馬輦古者輦以人輓之周禮巾車后五輅其一輦車組輓然縣師有車輦之稽季苗詩云我任我輦則臣民所乘亦名輦至秦始皇去其輪而制乃尊明諸輦有輪者駕以馬以別於步輦焉其制高一丈二尺五



寸九分廣八尺九寸五分轅長二丈五寸有奇輦座高三尺四寸有奇餘同大輅輦亭高大尺四寸有奇紅髹四柱長五尺四寸有奇檻座高與輅同四周紅髹條環板前左右有門高五尺有奇廣二尺四寸有奇門旁楹各二後楹三及明杙皆紅髹抹金銅鍍花葉片裝釘楹心編以黃線條亭內制與大輅同第軟座上不用花毯而用紅毯亭外用紅簾十二扇輦頂并圓盤高二尺六寸有奇上下俱紅髹以青飾輦蓋其銅龍蓮座寶蓋黃屋及天輪輦亭制悉與大輅同太常旗踏梯行馬之屬亦同大輅駕以八馬備鞍轡鞦轡鈴纓之飾

小馬輦視大馬輦高廣皆減一尺轅長一丈九尺有奇餘同大馬輦輦亭高五尺五寸有奇紅髹四柱長五尺四寸有奇檻座紅髹四周條環板前左右有門高五尺廣二尺二寸有奇門旁楹各二及明杙後屏風壁板俱紅髹用抹金銅鍍花葉片裝釘亭底紅髹上施紅花毯紅錦褥席外用紅簾四扇駕以四馬餘同大馬輦

步輦者古之步輓明制高一丈二尺二寸有奇廣八尺二寸有奇輦座高三尺二寸有奇四周雕木五彩雲渾貼金龍板十二片間以渾貼金仰覆蓮座下雕木線金五彩雲板十二片轅四紅髹中二轅長三丈五尺九寸左右二轅長二丈九尺五寸有奇俱以鍍金銅龍頭龍尾裝釘輦亭高六尺三寸有奇四柱長

大尺二寸有奇檻座紅髹四周雕木沉香色描金香草板十二片抹金銅鍍花葉片裝釘前左右有門高五尺七寸有奇廣二尺四寸有奇門旁紅髹十字榻各二扇雕飾沉香色描金雲龍板八片下雲板如其數後紅髹屏風上雕沉香色描金雲龍五屏後雕沉香色描金雲龍板三片又雲板如其數俱用抹金銅鍍花葉片裝釘餘同馬輦惟紅籬用十扇輦頂并圓盤高二尺六寸有奇其蓮座輦蓋天輪幟衣之屬俱同馬輦

大涼步輦高一丈二尺五寸有奇廣一丈二尺五寸有奇四面紅髹匡裝雕木五彩雲板二十片間以貼金仰覆蓮座下紅髹如意條環板如其數紅髹轆六中二轆長四丈三尺五寸有奇左右二轆長四丈有奇外二轆長三丈六尺五寸有奇前後俱飾以雕木貼金龍頭龍尾輦亭高六尺五寸有奇廣八尺五寸有奇四柱紅髹前左右有門高五尺八寸有奇廣二尺五寸有奇四周描金香草板十二片門旁榻各二後榻三及明欵皆紅髹編以黃線條亭底上施墊氈加紅錦褥并席紅髹坐椅一四周雕木沉香色描金寶相花靠背褥裙帷幔與馬輦同內設紅髹卓二紅髹闌干香卓一闌干四柱首俱雕木貼金躡龍鍍金銅龍蓋香爐一并香匙箸瓶紅錦墩二外紅籬三扇輦頂高二尺七寸有奇又鍍金銅寶珠頂帶仰覆蓮座高一尺三寸有奇垂攀頂黃線圓條四頂用丹漆上冒紅氈四垂以黃氈爲如意雲黃氈緣條四周施

黃綺漚水三層每層百三十二摺間繡五彩雲龍文或用大紅羅冒頂以黃羅爲如意雲緣條漚水亦用黃羅頂下四周以紅氈爲帷黃氈緣條四角鍍金銅雲四亭內寶蓋繡五龍頂以紅髹木匡冒以黃綺爲黃屋頂心四周繡雲龍各一輦亭四角至輦座用夔頂黃線圓條四并貼金木魚輦亭前左右轉角闌干二扇後一字帶轉角闌干一扇皆紅髹雕木渾貼金龍間以五彩雲板闌干內四周布席其闌干十二柱之飾及踏梯之屬俱與馬輦同

輦者肩行之車宋中興以後皇后嘗乘龍肩輿又以征伐道路險阻詔百官乘輦名曰竹輦子亦曰竹輿元皇帝用象輦駕以二象至用紅板輦則自明始也其制高六尺九寸有奇頂紅髹近頂裝圓匡蜩房窗鍍金銅火燄寶帶仰覆蓮座四角鍍金銅雲朵輦扛二前後以鍍金銅龍頭龍尾裝釘有黃絨墜角索四周紅髹板左右門二用鍍金銅釘鉸輦內紅髹匡坐椅一福壽板一并褥椅內黃織金綺靠坐褥四周椅裙下鋪席并踏褥有黃絹輦衣油絹雨衣各一青氈衣紅氈緣條雲子嘉靖十三年謁廟帝及后妃俱乘肩輿出宮至奉天門降輿升輅隆慶四年設郊祀慶成宴帝乘板輿由歸極門出入皇極門至殿上降輿車駕之出有具服幄殿按周官大小次木架輦障上下四旁周以幄帟以象宮室明鹵簿載具服幄殿儀仗有黃帳房仍元制也帳并帷幕以黃木棉布爲之上施獸吻柱竿紅髹竿首彩裝蹲獅氈頂

耕根車世宗朝始造漢有耕車晉曰耕根車俱天子親耕所用嘉靖十年帝將耕藉田詔造耕根車禮官上言考大明集禮耕藉用宋制乘玉輅以耕根車載耒耜同行今考儀注順天府官奉耒耜及穰稷種置彩輿先於祭前二日而出今用耕根車以載耒耜宜令造車於祭祀日早進呈置耒耜先玉輅以行第稽諸禮書祇有圖式而無高廣尺寸宜依今置車式差小通用青質從之

皇后輅一高一丈一尺三寸有奇平盤前後車樞並雁翅四垂如意滴珠板轅長一丈九尺六寸皆紅髹轅用抹金銅鳳頭鳳尾鳳翎葉片裝釘平盤左右垂護泥板及輪二貫軸一每輪輻十有八皆紅髹輞以抹金鍍花銅葉片裝釘輪內車轂用抹金銅鍍蓮花瓣輪盤裝釘軸中纏黃絨駕轅諸索輅亭高五尺八寸有奇紅髹四柱檻座上沉香色描金香草板十二片前左右有門高四尺五寸有奇廣二尺四寸有奇門旁沉香色線金菱花榻各二下條環板有明欵抹金銅鍍花葉片裝釘後紅髹五山屏風戩金鸞鳳雲文屏上紅髹板戩金雲文中裝雕木渾貼金鳳一屏後紅髹板俱用抹金銅鍍花葉片裝釘亭底紅髹上施紅花毯紅錦褥席紅髹坐椅一靠背雕木線金五彩裝鳳一上下香草雲板各一紅福壽板一并褥椅中黃織金綺靠坐褥四周有椅裙施黃綺帷幔或黃線羅外用紅簾十二扇前二柱戩金上寶相花中鸞鳳雲文下龜文錦輅頂并圓盤高二尺有奇抹金銅立鳳頂帶仰覆蓮座垂攀頂黃線圓條四盤上紅髹下四

周沉香色描金雲文內青地五彩雲文以青飾輅蓋內寶蓋紅髹匡闕以八頂冒以黃綺頂心及四周繡鳳九井五彩雲文天輪三層紅髹上雕木貼金邊耀葉板七十二片內飾青地雕木五彩雲鸞鳳文三層間繪五彩雲襯板七十二片下四周黃銅裝釘上施黃綺瀝水三層間繡鸞鳳文四垂青綺絡帶繡鸞鳳各一圓盤四角連輅座板用攀頂黃線圓條四輅亭前後有左右轉角闕于各二扇內嵌條環板皆紅髹計十二柱柱首雕木紅蓮花線金青綠裝蓮花抱柱其踏梯行馬之屬與大馬輦同

安車本周禮后五輅之一應仿漢官鹵簿圖有五色安車晉皇后乘雲母安車唐皇后安車制如金輅明皇后安車獨簡素其制高九尺七寸有奇平盤前後車樞並雁翅板輾二長一丈六尺七寸有奇皆紅髹用抹金銅鳳頭鳳尾鳳翎葉片裝釘平盤左右垂護泥板及輪二貫軸一每輪輻十有八皆紅髹軸中纏黃絨駕轅諸索車亭高四尺四寸紅髹方柱四上裝五彩花板十二片前左右有門高三尺七寸有奇廣二尺二寸有奇門旁紅髹十字榻各二後三山屏風屏後壁板俱紅髹用抹金銅鍍花葉片裝釘亭底紅髹板上施紅花毯紅錦褥四周施黃綺帷幔外用紅簾四扇車蓋用紅髹抹金銅寶珠頂帶蓮座高六寸四角抹金銅鳳頭用攀條四並紅髹木魚蓋施黃綺瀝水三層銷金鸞鳳文鳳頭下垂紅盼鍔其踏梯行馬幟衣與輅同行障坐障自唐宋有之皇后重翟車後皆有行障六坐障三左右夾車宮人執之而唐書

宋史不載其制金史行障長八尺高六尺坐障長七尺高五尺明皇后用行障坐障皆以紅綾爲之繪升  
降鸞鳳雲文行障繪瑞草於灑水坐障繪雲文於頂

太皇太后皇太后輅及安車行障坐障制與皇后同

皇妃車曰鳳輅與歷代異名其制青頂上抹金銅珠頂四角抹金銅飛鳳各一垂銀香圓寶蓋并彩結轎  
身紅髹木匡三面篋織紋篋繪以翟文抹金銅鈹花葉片裝釘紅髹摺飾以抹金銅鳳頭鳳尾青銷金羅  
緣邊紅簾并看帶內紅交牀并坐踏褥紅銷金羅轎衣一頂用銷金寶珠文灑水香草文看帶并幃皆鳳  
文紅油絹雨轎衣一自皇后以下皆用行障二坐障一第別以彩繪皇妃行障坐障俱紅綾爲之繪雲鳳  
而行障灑水繪香草

皇太子金輅高一丈二尺二寸有奇廣八尺九寸轅長一丈九尺五寸輅座高三尺二寸有奇平盤滴珠  
板輪輻輪輞悉同玉輅輅亭高六尺四寸有奇紅髹四柱長五尺四寸檻座上四周線金五彩香木板前  
左右有門高五尺有奇廣二尺四寸有奇門旁楯各二編紅線條及明杖皆紅髹後五山屏風青地上雕  
木貼金龍五間以五彩雲文屏後紅髹板皆抹金銅鈹花葉片裝釘紅髹匡軟座紅絨墜座大索四下垂  
蓮花墜石上施紅毯紅錦褥席紅髹椅一納板一并褥椅中紅織金綺靠坐褥四周有椅裙施紅羅帷幔

外用青綺緣邊紅簾十二扇椅雕貼金龍彩雲下線金彩雲板一亭內編紅線條輅頂并圓盤高二尺五寸有奇又鍍金銅寶珠頂帶仰覆蓮座高九寸垂攀頂紅線圓條四盤上丹漆下內外皆青地繪雲文以青飾輅蓋亭內周圍青斗拱承以丹漆匡寶蓋闕以八頂冒以紅綺頂心繡雲龍餘繡五彩雲文天輪三層皆紅髹上雕木貼金邊耀葉板七十二片內飾青地雕木貼金雲龍文三層間繪五彩雲翹板七十二片四周黃銅裝釘上施紅綺瀝水三層每層七十二摺間繡五彩雲龍文四角之飾與大輅同第圓條用紅線輅亭前一字闌干一扇後一字帶轉角闌干一扇左右闌干二扇內嵌五彩雲板皆丹漆計十四柱柱首制與大輅同亭後建紅旗二以紅羅爲之九旂每旂內外繡升龍一左旗腰繡日月北斗竿用抹金銅龍首右旗腰繡黻字竿用抹金銅戟綴抹金銅鈴二垂紅纓其踏梯行馬之屬與玉輅同帳房用青木棉布竿首青綠蹲狻猊餘同乘輿帳房

東宮妃車亦曰鳳輅小輅制同皇妃行障坐障之制亦同

親王象輅其高視金輅減六寸其廣減一尺轅長視大輅減一尺輅座高三尺有奇餘飾同金輅輅亭高五尺二寸有奇紅髹四柱檻座上四周紅髹條環板前左右有門高四尺五寸有奇廣二尺二寸有奇門旁欄各二及明欂後五山屏風皆紅髹用抹金銅鍍花葉片裝釘亭底紅髹施紅花毯紅錦褥席其椅籬

坐褥帷幔紅簾之制俱同金輅輅頂并圓盤高二尺四寸有奇用抹金銅寶珠頂餘同金輅天輪三層皆紅髹上雕木貼金邊耀葉六十三片內飾青地雕木五彩雲文三層間繪五彩雲觀板六十三片四周黃銅裝釘上施紅綺瀝水三層每層八十一摺繡瑞草文前垂青綺絡帶二俱繡升龍五彩雲文圓盤四角連輅座板用攀頂紅線圓條四并紅髹木魚亭前後闌干同金輅左右闌干各一扇內嵌條環板皆紅髹計十四柱柱首雕木紅蓮花線金青綠裝蓮花抱柱前闌干內布花毯紅旗二與金輅所樹同竿上祇垂紅纓五其踏梯行馬之屬亦同金輅帳房用綠色螭頭餘與東宮同

親王妃車亦曰鳳輦小輦制俱同東宮妃惟鳳輦衣用木紅平羅小輦衣二一用攀紅素紵絲一用木紅平羅行障坐障制同東宮妃

公主車宋用厭翟車明初因之其後定制鳳輦行障坐障如親王妃

皇孫車永樂中定皇太孫婚禮儀仗如親王降皇太子一等而用象輅

郡王無輅祇有帳房制同親王

郡王妃及郡主俱用翟輦制與皇妃鳳輦同第易鳳爲翟行障坐障同親王妃而繪雲翟文

百官乘車之制洪武元年令凡車不得雕飾龍鳳文職官一品至三品用間金飾銀螭繡帶青纓四品五



品素獮頭繡帶青纓六品至九品用素雲頭青帶青纓轎同車制庶民車及轎並用黑油齊頭平頂阜纓  
禁用雲頭六年令凡車轎禁丹漆五品以上車止用青纓婦女許坐轎官民老疾者亦得乘之景泰四年  
令在京三品以上得乘轎弘治七年令文武官例應乘轎者以四人昇之其五府管事內外鎮守守備及  
公侯伯都督等不問老少皆不得乘轎違例乘轎及擅用八人者奏聞蓋自太祖不欲勳臣廢騎射雖上  
公出必乘馬永樂元年駙馬都尉胡觀越制乘晉王濟熿朱轅轎轎爲給事中周景所劾有詔宥觀而賜  
濟熿書切責之惟文職大臣乘轎庶官亦乘馬又文臣皆許乘車大臣得乘安車後久廢不用正德四年  
禮部侍郎劉機言大明集禮公卿大臣得乘安車因請定轎扇繖蓋品級等差帝以京城內安車繖蓋久  
不行却其請而命轎扇俱如例行嘉靖十五年禮部尙書霍韜言禮儀定式京官三品以上乘轎邇者文  
官皆用肩輿或乘女轎乞申明禮制俾臣下有所遵守乃定四品下不許乘轎亦毋得用肩輿隆慶二年  
給事中徐尙劾應城伯孫文棟等乘轎出入驕僭無狀帝命奪文棟等俸乃諭兩京武職非奉特恩不許  
乘轎文官四品以下用帷轎者禁如例萬厯三年奏定勳戚及武臣不許用帷轎肩輿并交牀上馬至若  
破格殊典則宣德中少保黃淮陪遊西苑嘗乘肩輿入禁中嘉靖間嚴嵩奉詔死直年及八旬出入得乘  
肩輿武臣則郭勛朱希忠特命乘肩輿扈南巡蹕後遂賜常乘焉皆非制也

織蓋之制洪武元年令庶民不得用羅絹涼織但許用油紙雨織三年令京城內一品二品用織蓋其餘用雨織十六年令尙書侍郎左右都御史通政使太常卿應天府尹國子祭酒翰林學士許張織蓋二十年定一品二品織用銀浮屠頂三品四品用紅浮屠頂俱用黑色茶褐羅表紅絹裏三簷雨織用紅油絹五品紅浮屠頂青羅表紅絹裏兩簷雨織同四品六品至九品用紅浮屠頂青絹表紅絹裏兩簷雨織俱用油紙三十五年官員織蓋不許用金繡朱丹裝飾公侯駙馬伯與一品二品同成化九年令兩京官遇雨任用油織其涼織不許張於京城

鞍轡之制洪武六年令庶民不得描金惟銅鐵裝飾二十六年定公侯一品二品用銀鏤鐵事件鞬用描銀三品至五品用銀鏤鐵事件鞬用油畫六品至九品用擺錫鐵事件鞬用油畫三十五年官民人等馬鑲下纓并鞬轡俱用黑色不許紅纓及描金嵌金天青朱紅裝飾軍民用鐵事件黑綠油鞬

總裁官總理事務 經筵講官少保兼太子太保保和殿大學士兼管吏部戶部尚書事加大級張廷玉等奉  
敕修

輿服二

皇帝冕服

后妃冠服

皇太子親王以下冠服

皇帝冕服洪武元年學士陶安請製五冕太祖曰此禮太繁祭天地宗廟服衮冕社稷等祀服通天冠絳紗袍餘不用三年更定正旦冬至聖節並服衮冕祭社稷先農冊拜亦如之十六年定衮冕之制冕前圓後方元表繡裏前後各十二旒旒五采玉十二珠五采纁十有二就就相去一寸紅絲組爲纓黹纁充耳玉簪導衮元衣黃裳十二章日月星辰山龍華蟲六章織於衣宗彝藻火粉米黼黻六章繡於裳白羅大帶紅裏蔽膝隨裳色繡龍火山文玉革帶玉佩大綬六采赤黃黑白縹綠三色同大綬間施三玉環白羅中單黻領青緣襪黃鞵黃金烏飾二十六年更定衮冕十二章冕版廣一尺二寸長二尺四寸冠上有覆元表朱裏餘如舊制圭長一尺二寸衮元衣繡裳十二章如舊制中單以素紗爲之紅羅蔽膝上廣一尺下廣二尺長三尺織火龍山三章革帶佩玉長三尺三寸大帶素表朱裏兩邊用緣上以朱錦下以

緣錦大綬六采

黃白赤元縹綠

織成純元質五百首

凡合單紡爲一系四系爲一扶五扶爲一首

小綬三色同大綬間織三玉環朱鞵

赤舄永樂三年定冕冠以皂紗爲之上覆曰綖桐板爲質衣之以綺元表朱裏前圓後方以玉衡維冠玉

簪貫紐紐與冠武

足前體下曰武綬在冠之下亦曰武

并繫纓處皆飾以金縆以左右垂韃續充耳

用黃玉

繫以元統承以白

玉璜朱紘餘如舊制玉圭長一尺二寸刻其上刻山四以象四鎮之山蓋周鎮圭之制異於大圭不琢者

也以黃綺約其下別以囊韜之金龍文袞服十有二章元衣八章日月龍在肩星辰山在背火華蟲宗彝

在袖

每袖各三

皆織成本色領褱襖裙

褱者袖端襖者衣緣

纁裳四章織藻粉米黼黻各二前三幅後四幅前後不相屬

共腰有辟積本色紳褌

裳側有純謂之紳裳下有純謂之楊純者緣也

中單以素紗爲之青領褱襖裙領織黻文十三蔽膝隨裳

色四章織藻粉米黼黻各二本色緣有紉施於縫中玉鈞二玉佩二各用玉珩一瑀一琚二衝牙一璜二

瑀下垂玉花一玉滴二瑑飾雲龍文描金自珩而下繫組五貫以玉珠行則衝牙二滴與璜相觸有聲金

鈞二有二小綬六采

黃白赤元縹綠

纁質三小綬色同大綬間施三玉環龍文皆織成鞵舄皆赤色舄用黑鈞純

以黃飾舄首嘉靖八年諭閣臣張璠袞有革帶今何不用璠對曰按陳祥道禮書古革帶大帶皆謂之

鞵革帶以繫佩鞞然後加以大帶而笏摺於二帶之間夫革帶前繫鞞後繫綬左右繫佩自古冕弁恆用

之今惟不用革帶以至前後佩服皆無所繫遂附屬裳要之間失古制矣帝曰冕服祀天地享祖宗若闕

革帶非齊明盛服之意及觀會典載蔽膝用羅上織火山龍三章并大帶緣用錦皆與今所服不合卿可并革帶繫蔽膝佩綬之式詳考繪圖以進又云衣裳分上下服而今衣恆掩裳裳制如帷而今兩幅朕意衣但當與裳要下齊而露裳之六章何如已又諭璵以變更祖制爲疑璵對曰臣考禮制衣不掩裳與聖意允合夫衣六章裳六章義各有取衣自不容掩裳大明集禮及會典與古制不異今衣八章裳四章故衣常掩裳然於典籍無所準內閣所藏圖註蓋因官司織造循習訛謬今訂正之乃復祖制非有變更帝意乃決因復諭璵曰衣有六章古以繪今當以織朕命織染局考國初綬服日月各徑五寸當從之裳六章古用繡亦當從之古色用元黃取象天地今裳用繡於義無取當從古革帶卽束帶後當用玉以佩綬繫之於下蔽膝隨裳色其繡上龍下火可不用山卿與內閣諸臣同考之於是楊一清等詳議袞冕之服自黃虞以來元衣黃裳爲十二章日月星辰山龍華蟲其序自上而下爲衣之六章宗彝藻火粉米黼黻其序自下而上爲裳之六章自周以後寢變其制或八章或九章已戾於古矣我太祖皇帝復定爲十二章之制司造之官仍習舛訛非制作之初意伏乞聖斷不疑帝乃令擇吉更正其制冠以圓匡烏紗冒之旒纒七采玉珠十二青纒充耳纒玉珠二餘如舊制元衣黃裳衣裳各六章洪武間舊制日月徑五寸裳前後連屬如帷六章用繡蔽膝隨裳色羅爲之上繡龍一下繡火三繫於革帶大帶素表朱裏上緣以朱

下以綠革帶前用玉其後無玉以佩綬繫而掩之中單及圭俱如永樂間制朱纁赤烏黃條緣元纁結  
皇帝通天冠服洪武元年定郊廟省牲皇太子諸王冠婚醮戒則服通天冠絳紗袍冠加金博山附蟬十  
二首施珠翠黑介幘組纁玉簪導絳紗袍深衣製白紗內單皂領襖襪絳紗蔽膝白假帶方心曲領白  
纁赤烏其革帶佩綬與袞服同

皇帝皮弁服朔望視朝降詔降香進表四夷朝貢外官朝覲策士傳臚皆服之嘉靖以後祭太歲山川諸  
神亦服之其制自洪武二十六年定皮弁用烏紗冒之前後各十二縫每縫綴五采玉十二以爲飾玉簪  
導紅組纁其服絳紗衣蔽膝隨衣色白玉佩革帶玉鉤釵緋白大帶白纁黑烏永樂三年定皮弁如舊制  
惟縫及冠武弁貫簪繫纁處皆飾以金玉圭長如冕服之圭有脊并雙植文絳紗袍本色領襖襪紅裳  
但不織章數中單紅領襖裾餘俱如冕服內制

皇帝武弁服明初親征遣將服之嘉靖八年諭閣臣張璠云會典紀親征類禡之祭皆具武弁服不可不  
備璠對周禮有韋弁謂以韎韋爲弁又以爲衣裳國朝視古損益有皮弁之制今武弁當如皮弁但皮弁  
以黑紗冒之武弁當以絳紗冒之隨具圖以進帝報曰覽圖有韎形但無繫處冠制古象上尖今皮弁則  
圓朕惟上銳取其輕利當如古制又衣裳韎烏皆赤色何謂且佩綬俱無於祭用之可乎璠對自古服冕

弁俱用革帶以前繫轍後繫綬韋弁之鞞正繫於革帶耳武事尙威烈故色純用赤帝復報璫冠服衣裳鞞鳥俱如古制增革帶佩綬及圭乃定制弁上銳色用赤上十二縫中綴五采玉落落如星狀鞞衣鞞鞞鞞俱赤色佩綬革帶如常制佩綬及鞞鞞俱上繫於革帶鳥如裳色玉圭視鎮圭差小剡上方下有篆文曰討罪安民

皇帝常服洪武三年定烏紗折角向上巾盤領窄袖袍束帶間用金琥珀透犀承樂三年更定冠以烏紗冒之折角向上其後名翼善冠袍黃盤領窄袖前後及兩肩各織金盤龍一帶用玉鞞以皮爲之先是洪武二十四年帝微行至神樂觀見有結網巾者翼日命取網巾頒示十三布政使司人無貴賤皆裹網巾於是天子亦常服網巾又會典載皇太孫冠禮有云掌冠跪加網巾而皇帝皇太子冠服俱闕而不載嘉靖七年更定燕弁服初帝以燕居冠服尙沿習俗諭張璫考古帝王燕居法服之制璫乃采禮書元端深衣之文圖註以進帝爲參定其制諭璫詳議璫言古者冕服之外元端深衣其用最廣元端自天子達於士國家之命服也深衣自天子達於庶人聖賢之法服也今以元端加文飾不易舊制深衣易黃色不離中衣誠得帝王損益時中之道帝因諭禮部曰古元端上下通用今非古人比雖燕居宜辨等威因酌古制更名曰燕弁寓深宮獨處以燕安爲戒之意其制冠匡如皮弁之制冒以烏紗分十有二瓣各以金線

壓之前飾五采玉雲各一後列四山朱條爲組纓雙玉簪服如古元端之制色元邊緣以青兩肩繡日月  
前盤圓龍一後盤方龍二邊加龍文八十一領與兩袂共龍文五九雜同前後齊共龍文四九襯用深衣  
之制色黃袂圓袂方下齊負繩及踝十二幅素帶朱裏青表綠緣邊腰圍飾以玉龍九元履朱緣紅纓黃  
結白纈

皇后冠服洪武三年定受冊謁廟朝會服禮服其冠圓匡冒以翡翠上飾九龍四鳳大花十二樹小花數  
如之兩博鬢十二鈿褱衣深青繪翟赤質五色十二等素紗中單黻領朱羅縠襖褙膝隨衣色以緞  
爲領緣用翟爲章三等大帶隨衣色朱裏紕其外上以朱錦下以綠錦紐約用青組玉革帶青鞵青舄以  
金飾永樂三年定制飾翠龍九金鳳四中一龍銜大珠一上有翠蓋下垂珠結餘皆口銜珠滴珠翠雲四  
十片大珠花小珠花數如舊三博鬢飾以金龍翠雲皆垂珠滴翠口圈一副上飾珠寶鈿花十二翠鈿如  
其數托裏金口圈一副珠翠面花五事珠排環一對阜羅頰子一描金龍文用珠二十一翟衣深青織翟  
文十有二等間以小輪花紅領襖襖織金雲龍文中單玉色紗爲之紅領襖襖織文十三蔽膝隨  
衣色織翟爲章三等間以小輪花四以緞爲領緣織金雲龍文玉釵圭長七寸刻其上琢文黃綺約其  
下帽以黃囊金龍文玉革帶青綺緝描金雲龍文玉事件十金事件四大帶表裏俱青紅相半末純紅下



垂織金雲龍文上朱緣下綠緣青綺副帶一綬五采黃赤白繹綠繡質間施二玉環皆織成小綬三色同  
大綬玉佩二各用玉珩一瑪一珽二衝牙一璜二瑪下垂玉花一玉滴二琢飾雲龍文描金自珩而下繫  
組五貫以玉珠行則衝牙二滴與二璜相觸有聲上有金鈎有小綬五采以副之繡質織成青鞵烏飾以  
描金雲龍阜純每烏首加珠五顆

皇后常服洪武三年定雙鳳翊龍冠首飾釧鐲用金玉珠寶翡翠諸色團衫金繡龍鳳文帶用金玉四年  
更定龍鳳珠翠冠真紅大袖衣霞帔紅羅長裾紅褙子冠制如特髻上加龍鳳飾衣用織金龍鳳文加繡  
飾永樂三年更定冠用阜穀附以翠博山上飾金龍一翊以珠翠鳳二皆口銜珠滴前後珠牡丹二花八  
蕊翠葉三十六珠翠樓花鬢二珠翠雲二十一翠口圈一金寶鈿花九飾以珠金鳳二口銜珠結三博鬢  
飾以鸞鳳金寶鈿二十四邊垂珠滴金簪二珊瑚鳳冠皆一副大彩霞帔衫黃霞帔深青織金雲霞龍文  
或繡或鋪翠圈金飾以珠玉墜子琢龍文四襖襖子即襟深青金繡團龍文鞠衣紅色前後織金雲龍文  
或繡或鋪翠圈金飾以珠大帶紅綾羅爲之有緣餘或青或綠各隨鞠衣色緣襖襖子黃色紅領襖襖裙  
皆織金采色雲龍文緣襖裙紅色綠緣襖織金采色雲龍文玉帶如翟衣內制第減金事件一玉花采結  
綬以紅綠綾羅爲結玉綬花一琢雲龍文綬帶玉墜珠六金垂頭花瓣四小金葉六紅綾羅繫帶一白玉

雲樣玳瑁二如佩制有金鈎金如意雲蓋一下懸紅組五貫金方心雲板一俱綴雲龍文襯以紅綺下垂  
金長頭花四中小金鐘一末綴白玉雲朵五青鞵烏與翟衣內制同

皇妃皇嬪及內命婦冠服洪武三年定皇妃受冊助祭朝會禮服冠飾九翬四鳳花釵九樹小花數如之  
兩博鬢九鈿翟衣青質繡翟編次於衣及裳重爲九等青衫中單黻領朱縠襖褙膝蔽膝隨裳色加文繡  
重雉爲章二等以緞爲領緣大帶隨衣色玉革帶青鞵烏佩綬常服鸞鳳冠首飾釧鐲用金玉珠寶翠諸  
色團衫金繡鸞鳳不用黃帶用金玉犀又定山松特髻假鬢花鈿或花釵鳳冠真紅大袖衣霞帔紅羅裙  
綉子衣用織金及繡鳳文永樂三年更定禮服九翟冠二以阜穀爲之附以翠博山飾大珠翟二小珠翟  
三翠翟四皆口銜珠滴冠中寶珠一座翠頂雲一座其珠牡丹翠纓花鬢之屬俱如雙鳳翊龍冠制第減  
翠雲十又翠牡丹花纓花各二面花四梅花環四珠環各二其大衫霞帔燕居佩服之飾俱同中宮第織  
金繡球俱雲霞鳳文不用雲龍文九嬪冠服嘉靖十年始定冠用九翟次皇妃之鳳大衫鞠衣如皇妃制  
圭用次玉穀文內命婦冠服洪武五年定三品以上花釵翟衣四品五品山松特髻大衫爲禮服貴人視

三品以皇妃燕居冠及大衫霞帔爲禮服以珠翠慶雲冠鞠衣綉子綠襖襖裙爲常服

宮人冠服制與宋同紫色團領窄袖徧刺折枝小葵花以金圈之珠絡縫金帶紅裙弓樣鞵上刺小金花

烏紗帽飾以花帽額綴團珠結珠鬢梳垂珠耳飾

皇太子冠服陪祀天地社稷宗廟及大朝會受冊納妃則服袞冕洪武二十六年定袞冕九章冕九旒旒

九五金簪導紅組纓兩玉瑱圭長九寸五分元衣繡裳衣五章織山龍華蟲宗彝火裳四章織藻粉米黼

黻白紗中單黻領蔽膝隨裳色織火山二章革帶金鈎黼玉佩綬五采赤白元纁綠織成純赤質三百二十首

小綬三色同間織三玉環大帶白表朱裏上緣以紅下緣以綠白鞞赤舄永樂三年定冕冠元表朱裏前

圓後方前後各九旒每旒五采纁九就貫五采玉九赤白青黃黑相次玉衡金簪元統垂青纁充耳用青玉

承以白玉瑱朱紘纓玉圭長九寸五分以錦約其下并鞞衰服九章元衣五章龍在肩山在背火華蟲宗

彝在袖每袖各二皆織成本色領襍襪裙纁裳四章織藻粉米黼黻各二前三幅後四幅不相屬共腰有裳積

本色縹褐中單以素紗為之青領襍襪裙纁裳文十二蔽膝隨裳色四章織藻粉米黼黻本色緣有紉

施於縫中上玉鈎二玉佩二各用玉珩一瑪一瑊一瑁一璜一瑋一璜三瑪下垂玉花一玉滴二瑒雲龍文描金

自珩而下繫組五貫以玉珠上有金鈎小綬四采赤白纁綠以副之纁質大帶素表朱裏在腰及垂皆有縹上

縹以朱下縹以綠紐約用青組大綬四采赤白纁綠縹質小綬三采間施二玉環龍文皆織成鞞舄皆赤色舄

用黑鈎純黑飾舄首朔望朝降詔降香進表外國朝貢朝覲則服皮弁永樂三年定皮弁冒以烏紗前後

各九縫每縫綴五采玉九縫及冠武并貫簪繫纓處皆飾以金金簪朱纓玉圭如冕服內制絳紗袍本色領襖襖裾紅裳如冕服內裳制但不織章數中單以素紗爲之如深衣制紅領襖襖裾領織黻文十一蔽膝隨裳色本色緣有紉施於縫中其上玉鉤二玉佩如冕服內制但無雲龍文有小綬四采以副之大帶

亦名翼善

大綬鞞烏赤色皆如冕服內制其常服洪武元年定烏紗折上巾永樂三年定冠烏紗折角向上巾

冠親王郡王袍赤盤領窄袖前後及兩肩各金織盤龍一玉帶鞞以皮爲之及世子俱同

皇太子妃冠服洪武三年定禮服與皇妃同永樂三年更定九翬四鳳冠漆竹絲爲匡冒以翡翠上飾翠翬九金鳳四皆口銜珠滴珠翠雲四十片大珠花九樹小珠花數如之雙博鬢飾以鸞鳳皆垂珠滴翠口圈一副上飾珠寶鈿花九翠鈿如其數托裏金口圈一副珠翠面花五事珠排環一對珠阜羅額子一描金鳳文用珠二十一翟衣青質織翟文九等間以小輪花紅領襖襖裾織金雲龍文中單玉色紗爲之紅領襖襖裾領織黻文十一蔽膝隨衣色織翟爲章二等間以小輪花三以緞爲領緣織金雲鳳文其玉圭帶綬玉佩鞞爲之制俱同皇妃洪武三年又定常服犀冠刻以花鳳首飾釧鐲衫帶俱同皇妃四年定冠亦與皇妃同永樂三年定燕居冠以阜殼爲之附以翠博山上飾寶珠一座翊以二珠翠鳳皆口銜珠滴前後珠牡丹二花八蕊翠葉三十六珠翠櫻花鬢二珠翠雲十六片翠口圈一副金寶鈿花九上飾珠九

金鳳一對口銜珠結雙博鬢飾以鸞鳳金寶鈿十八邊垂珠滴金簪一對珊瑚鳳冠背一副其大衫霞帔燕居佩服之飾俱同皇妃

親王冠服助祭謁廟朝賀受冊納妃服衰冕朔望朝降詔降香進表四夷朝覲服皮弁洪武二十六年定冕服俱如東宮第冕旒用五采玉圭長九寸二分五釐青衣纁裳永樂三年又定冕服皮弁制俱與東宮同其常服亦與東宮同嘉靖七年諭禮部朕仿古元端自爲燕弁冠服更制忠靜冠服錫於有位而宗室諸王制猶未備今酌燕弁及忠靜冠之制復爲式具圖命曰保和冠服自郡王長子以上其式已明鎮國將軍以下至奉國中尉及長史審理紀善教授伴讀俱用忠靜冠服依其品服之儀賓及餘官不許槩服夫忠靜冠服之異式尊賢之等也保和冠服之異式親親之殺也等殺旣明庶幾乎禮之所保保斯和和斯安此錫名之義也其以圖說頒示諸王府如敕遵行保和冠制以燕弁爲準用九袞去簪與五玉後山一扇分畫爲四服青質青緣前後方龍補身用素地邊用雲襯用深衣玉色帶青表綠裏綠緣履用卓緣結白鞵

親王妃冠服受冊助祭朝會服禮服洪武三年定九翟四鳳冠永樂三年又定九翟冠制同皇妃其大衫霞帔燕居佩服之飾同東宮妃第金事件減一玉綬花碌寶相花文

公主冠服與親王妃同惟不用圭

親王世子冠服聖節千秋節并正旦冬至進賀表箋及父王生日諸節慶賀皆服衰冕洪武二十六年定  
衰冕七章冕三采玉珠七旒圭長九寸青衣三章織華蟲火宗彝繡裳四章織藻粉米黼黻素紗中單青  
領襖赤韍革帶佩白玉元組綬綬紫質用三采紫黃赤織成間織三白玉環白韍赤舄永樂三年更定冕冠  
前後各八旒每旒五采纁八就貫三采玉珠八赤白青色相次玉圭長九寸青衣三章火在肩華蟲宗彝  
在兩袖皆織成本色領襖繡裾其繡裳玉佩帶綬之制俱與親王同第領織黻文減二皮弁用烏紗冒之  
前後各八縫每縫綴三采玉八餘制如親王其圭佩帶綬舄如冕服內制常服亦與親王同嘉靖七年  
定保和冠服以燕弁爲準用八袂去簪玉後山以一扇分畫爲四服與親王同

世子妃冠服永樂三年定與親王妃同惟冠用七翟

郡王冠服永樂三年定冕冠前後各七旒每旒五采纁七就貫三采玉珠七圭長九寸青衣三章粉米在  
肩藻宗彝在兩袖皆織成繡裳二章織黼黻各二中單領織黻文七餘與親王世子同皮弁前後各七縫  
每縫綴三采玉七餘與親王世子同其圭佩帶綬舄如冕服內制常服亦與親王世子同嘉靖七年定  
保和冠服冠用七翟服與親王世子同

郡王妃冠服承樂三年定冠用七翟與親王世子妃同其大衫霞帔燕居佩服之飾俱同親王妃第繡雲霞翟文不用盤鳳文

郡王長子朝服七梁冠大紅素羅衣白素紗中單大紅素羅裳及蔽膝大紅素羅白素紗二色夾帶玉朝帶丹礬紅花錦錦雞綬玉佩象笏白絹鞵卓皮雲頭履鞞公服卓縐紗幘頭大紅素紗絲衣玉革帶常服烏紗帽大紅紗絲織金獅子開襟圓領玉束帶卓皮銅線鞵其保和冠如忠靜之制用五襖服與郡王同補子用織金方龍

郡主冠服承樂三年定與郡王妃同惟不用圭減四珠環一對

郡王長子夫人冠服珠翠五翟冠大紅紗絲大衫深青紗絲金繡翟褙子青羅金繡霞帔金墜頭

鎮國將軍冠服與郡王長子同鎮國將軍夫人冠服與郡王長子夫人同輔國將軍冠服與鎮國將軍同惟冠六梁帶用犀輔國將軍夫人冠服與鎮國將軍夫人同惟冠用四翟抹金銀墜頭奉國將軍冠服與輔國將軍同惟冠五梁帶用金鈸花常服大紅織金虎豹奉國將軍夫人冠服與輔國將軍夫人同惟褙子霞帔金繡孔雀文鎮國中尉冠服與奉國將軍同惟冠四梁帶用素金佩用藥玉鎮國中尉恭人冠服與奉國將軍淑人同輔國中尉冠服與鎮國中尉同惟冠三梁帶用銀鈸花綬用盤雕公服用深青素羅

常服紅織金熊羆輔國中尉宜人冠服與鎮國中尉恭人同惟冠用三翟褙子霞帔金繡鴛鴦文銀墜頭  
奉國中尉冠服與輔國中尉同惟冠二梁帶用素銀綬用練鵓幘頭黑漆常服紅織金彪奉國中尉宜人  
冠服與輔國中尉宜人同惟大衫用丹礬紅褙子霞帔金繡練鵓文

縣主冠服珠翠五翟冠大紅紵絲大衫深青紵絲金繡孔雀褙子青羅金繡孔雀霞帔抹金銀墜頭郡君  
冠服與縣主同惟冠用四翟褙子霞帔金繡鴛鴦文縣君冠服與郡君同惟冠用三翟鄉君冠服與縣君  
同惟大衫用丹礬紅褙子霞帔金繡練鵓文



總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

輿服三

文武官冠服

命婦冠服

內外官親屬冠服

內使冠服

侍儀以下冠服

士庶冠服

樂工冠服

軍隸冠服

外蕃冠服

僧道服色

羣臣冠服洪武元年命制公服朝服以賜百官時禮部言各官先授散官與見任職事高下不同如御史董希哲前授朝列大夫澧州知州而任七品職事省司郎中宋冕前授亞中大夫黃州知府而任五品職事散官與見任之職不同故服色不能無異乞定其制乃詔省部臣定議禮部復言唐制服色皆以散官為準元制散官職事各從其高者服色因之國初服色依散官與唐制同乃定服色準散官不計見職於是所賜袍帶亦並如之三年禮部言歷代異尚夏黑商白周赤秦黑漢赤唐服飾黃旂幟赤今國家承元之後取法周漢唐宋服色所尚於赤為宜從之

文武官朝服洪武二十六年定凡大祀慶成正旦冬至聖節及頒詔開讀進表傳制俱用梁冠赤羅衣白

紗中單青飾領緣赤羅裳青緣赤羅蔽膝大帶赤白二色絹革帶佩綬白鞢黑履一品至九品以冠上梁  
數爲差公冠八梁加籠巾貂蟬立筆五折四柱香草五段前後玉蟬侯七梁籠巾貂蟬立筆四折四柱香  
草四段前後金蟬伯七梁籠巾貂蟬立筆二折四柱香草二段前後玳瑁蟬俱插雉尾駙馬與侯同不用  
雉尾一品冠七梁不用籠巾貂蟬革帶與佩俱玉綬用黃綠赤紫織成雲鳳四色花錦下結青絲網玉綬  
環二二品六梁革帶綬環犀餘同一品三品五梁革帶金佩玉綬用黃綠赤紫織成雲鶴花錦下結青絲  
網金綬環二四品四梁革帶金佩藥玉餘同三品五品三梁革帶銀鍍花佩藥玉綬用黃綠赤紫織成盤  
鷓花錦下結青絲網銀鍍金綬環二二品至五品笏俱象牙六品七品二梁革帶銀佩藥玉綬用黃綠赤  
織成練鵲三色花錦下結青絲網銀綬環二獨御史服獬廌八品九品一梁革帶烏角佩藥玉綬用黃綠  
織成鴻鴈二色花錦下結青絲網銅綬環二六品至九品笏俱槐木其武官應直守衛者別有服色雜職  
未入流品者大朝賀進表行禮止用公服三十年令視九品官用朝服嘉靖八年更定朝服之制梁冠如  
舊式上衣赤羅青緣長過腰指七寸毋掩下裳中單白紗青緣下裳七幅前三後四每幅三襞積赤羅青  
緣蔽膝綴革帶綬各從品級花樣革帶之後佩綬繫而掩之其環亦各從品級用玉犀金銀銅不以織於  
綬大帶表裏俱素惟兩耳及下垂緣綠又以青組約之革帶俱如舊式佩玉一如詩傳之制去雙滴及二

珩其二品以上五四品以下藥玉及鞮履俱如舊式萬曆五年令百官正旦朝賀毋僭躡朱履故事十一月百官戴煖耳是年朝覲外官及舉人監生不許戴煖耳入朝

凡親祀郊廟社稷文武官分獻陪祀則服祭服洪武二十六年定一品至九品青羅衣白紗中單俱阜領緣赤羅裳阜緣赤羅蔽膝方心曲領其冠帶佩綬等差並同朝服又定品官家用祭服三品以上去方心曲領四品以下并去緇綬嘉靖八年更定百官祭服上衣青羅阜緣與朝服同下裳赤羅阜緣與朝服同蔽膝綬環大帶革帶佩玉鞮履俱與朝服同其視牲朝日夕月耕藉祭歷代帝王獨錦衣衛堂上官大紅蟒衣飛魚烏紗帽鸞帶佩繡春刀祭太廟社稷則大紅便服

文武官公服洪武二十六年定每日早晚朝奏事及侍班謝恩見辭則服之在外文武官每日公座服之其制盤領右袵袍用紵絲或紗羅絹袖寬三尺一品至四品緋袍五品至七品青袍八品九品綠袍未入流雜職官袍笏帶與八品以下同公服花樣一品大獨科花徑五寸二品小獨科花徑三寸三品散荅花無枝葉徑二寸四品五品小雜花紋徑一寸五分六品七品小雜花徑一寸八品以下無紋幘頭漆紗二等展角長一尺二寸雜職官幘頭垂帶後復令展角不用垂帶與入流官同笏依朝服爲之腰帶一品玉或花或素二品犀三品四品金荔枝五品以下烏角鞞用青草仍垂撻尾於下鞞用阜其後常朝止便服

惟朔望具公服朝參凡武官應直守衛者別有服色不拘此制公侯駙馬伯服色花樣腰帶與一品同文武官花樣如無從織造則用素百官入朝雨雪許服雨衣奉天華蓋武英諸殿奏事必躡履鞮違者御史糾之萬厯五年令常朝俱衣本等錦繡服色其朝覲官見辭謝恩不論已未入流公服行禮

文武官常服洪武三年定凡常朝視事以烏紗帽團領衫束帶爲公服其帶一品玉二品花犀三品金鍍花四品素金五品銀鍍花六品七品素銀八品九品烏角凡致仕及待親辭閑官紗帽束帶爲事黜降者服與庶人同至二十四年又定公侯伯駙馬束帶與一品同雜職官與八品九品同朝官常服禮鞮洪武六年定先是百官入朝遇雨皆躡釘鞮聲徹殿陛侍儀司請禁之太祖曰古者入朝有履自唐始用鞮其令朝官爲鞮底皮鞮冒於鞮外出朝則釋之禮部言近奢侈越制詔申禁之仍參酌漢唐之制頒行遵守凡職官一品二品用雜色文綺綾羅綵繡帽頂帽珠用玉三品至五品用雜色文綺綾羅帽頂用金帽珠除玉外隨所用六品至九品用雜色文綺綾羅帽頂用銀帽珠瑪瑙水晶香木一品至六品穿四爪龍以金繡爲之者聽禮部又議品官兒尊長用朝君公服於理未安宜別製梁冠絳衣絳裳革帶大帶大白襪烏烏佩綬其衣裳去緣襪三品以上佩綬三品以下不用從之二十二年令文武官遇雨戴雨帽公差出外戴帽子入城不許二十三年定制文官衣自領至裔去地一寸袖長過手復回至肘公侯駙馬與文官

同武官去地五寸袖長過手七寸二十四年定公侯駙馬伯服繡麒麟白澤文官一品仙鶴二品錦雞三品孔雀四品雲雁五品白鷗六品鸞鷟七品鸚鵡八品黃鸝九品鸕鶿雜職練鵲風憲官獬廌武官一品二品獅子三品四品虎豹五品熊羆六品七品彪八品犀牛九品海馬又令品官常服用雜色紵綾羅綵繡官吏衣服帳幔不許用元黃紫三色并織繡龍鳳文違者罪及染造之人朝見人員四時並用色衣不許純素三十年令致仕官服色與見任同若朝賀謝恩見辭一體具服景泰四年令錦衣衛指揮侍衛者得衣麒麟天順二年定官民衣服不得用蟒龍飛魚斗牛大鵬像生獅子四寶相花大西番蓮大雲花樣并元黃紫及元色黑綠柳黃薑黃明黃諸色弘治十三年奏定公侯伯文武大臣及鎮守守備違例奏請蟒衣飛魚衣服者科道糾劾治以重罪正德十一年設東西兩官廳將士悉衣黃罩甲中外化之金緋盛服者亦必加此於上都督江彬等承日紅笠之上綴以靛染天鵝翎以爲貴飾貴者飄三英次者二英兵部尙書王瓊得賜一英冠以下教場自謂殊遇其後巡狩所經督餉侍郎巡撫都御史無不衣罩甲見上者十三年車駕還京傳旨俾迎候者用曳撒大帽鸞帶尋賜羣臣大紅紵縵紗各一其服色一品斗牛二品飛魚三品蟒四品麒麟六七品虎彪翰林科道不限品級皆與焉惟部曹五品下不與時文臣服色亦以走獸而麒麟之服逮於四品尤異事也十八年世宗登極詔云近來冒濫玉帶蟒龍飛魚斗牛服

色皆庶官雜流并各處將領員緣奏乞今俱不許武職卑官僭用公侯服色者亦禁絕之嘉靖六年復禁中外官不許濫服五彩裝花織造違禁顏色七年既定燕居法服之制閣臣張璠因言品官燕居之服未有明制詭異之徒競爲奇服以亂典章乞更法古元端別爲簡易之制昭布天下使貴賤有等帝因復製忠靜冠服圖頒禮部敕諭之曰祖宗稽古定制品官朝祭之服各有等差第常人之情多謹於明顯怠於幽獨古聖王慎之制元端以爲燕居之服比來衣服詭異上下無辨民志何由定朕因酌古元端之制更名忠靜庶幾乎進思盡忠退思補過焉朕已著爲圖說如式製造在京許七品以上官及八品以上翰林院國子監行人司在外許方面官及各府堂官州縣正堂儒學教官服之武官止都督以上其餘不許濫服禮部以圖說頒布天下如敕奉行按忠靜冠仿古元冠冠匡如制以烏紗冒之兩山俱列於後冠頂仍方中微起三梁各壓以金線邊以金緣之四品以下去金緣以淺色絲線忠靜服仿古元端服色用深青以紗縲紗羅爲之三品以上雲四品以下素緣以藍青前後飾本等花樣補子深衣用玉色素帶如古大夫之帶制青表綠緣邊并裏素履青綠條結白襪十六年羣臣朝於駐蹕所兵部尙書張瓚服蟒帝怒諭閣臣夏言曰尙書二品何自服蟒言對曰瓚所服乃欽賜飛魚服鮮明類蟒耳帝曰飛魚何組兩角其巖禁之於是禮部奏定文武官不許擅用蟒衣飛魚斗牛違禁華異服色其大紅紗縲紗羅服惟四品以上

官及在京五品堂上官經筵講官許服五品官及經筵不爲講官者俱服青綠錦繡遇吉禮止衣紅布絨  
襖品官花纓並依品級錦衣衛指揮侍衛者仍得衣麒麟其帶俸非侍衛及千百戶雖侍衛不許僭用  
歷朝賜服文臣有未至一品而賜玉帶者自洪武中學士羅復仁始衍聖公秩正二品服織金麒麟袍玉  
帶則景泰中入朝拜賜自是以爲常內閣賜蟒衣自弘治中劉健李東陽始麒麟本公侯服而內閣服之  
則嘉靖中嚴嵩徐階皆受賜也仙鶴文臣一品服也嘉靖中成國公朱希忠都督陸炳服之皆以元壇供  
事而學士嚴訥李春芳董份以五品撰青詞亦賜仙鶴等諭供事壇中乃用於是尙書皆不敢衣鶴後敕  
南京織閃黃補麒麟仙鶴賜嚴嵩閃黃乃上用服色也又賜徐階教子升天蟒萬麻中賜張居正坐蟒武  
清侯李偉以太后父亦受賜

儀賓朝服公服常服俱視品級與文武官同惟笏皆象牙常服花樣視武官弘治十三年定郡主儀賓鍍  
花金帶胸背獅子縣主儀賓鍍花金帶郡君儀賓光素金帶胸背俱虎豹縣君儀賓鍍花銀帶鄉君儀賓  
光素銀帶胸背俱彪有僭用者革去冠帶戴平頭巾於儒學讀書習禮三年

狀元及諸進士冠服狀元冠二梁緋羅圓領白絹中單錦綬蔽膝紗帽槐木笏光銀帶藥玉佩朝鞞靴  
皆御前頒賜上表謝恩日服之進士巾如烏紗帽頂微平展角闊寸餘長五寸許系以垂帶卓紗爲之深

藍羅袍緣以青羅袖廣而不殺槐木笏革帶青鞵飾以黑角垂撻尾於後廷試後頒於國子監傳臚日服之上表謝恩後謁先師行釋菜禮畢始易常服其中袍仍送國子監藏之

命婦冠服洪武元年定命婦一品冠花釵九樹兩博鬢九鈿服用翟衣繡翟九重素紗中單黼領朱紬襖襖蔽膝隨裳色以緞爲領緣加文繡重翟爲章二等玉帶青襪烏佩綬二品冠花釵八樹兩博鬢八鈿服用翟衣八等犀帶餘如一品三品冠花釵七樹兩博鬢七鈿翟衣七等金革帶餘如二品四品冠花釵六樹兩博鬢六鈿翟衣六等金革帶餘如三品五品冠花釵五樹兩博鬢五鈿翟衣五等烏角帶餘如四品六品冠花釵四樹兩博鬢四鈿翟衣四等烏角帶餘如五品七品冠花釵三樹兩博鬢三鈿翟衣三等烏角帶餘如六品自一品至五品衣色隨夫用紫六品七品衣色隨夫用緋其大帶如衣色四年以古天子諸侯服裘冕后與夫人亦服翟翟今羣臣旣以梁冠絳衣爲朝服不敢用冕則外命婦亦不當服翟衣以朝命禮部議之奏定命婦以山松特髻假鬢花鈿真紅大袖衣珠翠感金霞帔爲朝服以朱翠角冠金珠花釵闊袖雜色綠緣爲燕居之服一品衣金繡文霞帔金珠翠妝飾玉墜二品衣金繡雲肩大雜花霞帔金珠翠妝飾金墜子三品衣金繡大雜花霞帔珠翠妝飾金墜子四品衣繡小雜花霞帔翠妝飾金墜子五品衣銷金大雜花霞帔生色畫絹起花妝飾金墜子六品七品衣銷金小雜花霞帔生色畫絹起花



妝飾鍍金銀墜子八品九品衣大紅素羅霞帔生色畫絹妝飾銀墜子首飾一品二品金玉珠翠三品四  
品金珠翠五品金翠六品以下金鍍銀間用珠五年更定品官命婦冠服一品禮服用山松特髻翠松五  
株金翟八口銜珠結正面珠翠翟一珠翠花四朶珠翠雲喜花三朶後鬢珠梭毬一珠翠飛翟一珠翠梳  
四金雲頭連三釵一珠簾梳一金簪二珠梭環一雙大袖衫用真紅色霞帔褙子俱用深青色紵絲綾羅  
紗隨用霞帔上施感金繡雲霞翟文鍍花金墜子褙子上施金繡雲霞翟文常服用珠翠慶雲冠珠翠翟  
三金翟一口銜珠結鬢邊珠翠花二小珠翠梳一雙金雲頭連三釵一金壓鬢雙頭釵二金腦梳一金簪  
二金脚珠翠佛面環一雙鐺釧皆用金長襖長裙各色紵絲綾羅紗隨用長襖緣襖或紫或綠上施感金  
繡雲霞翟文看帶用紅綠紫上施感金繡雲霞翟文長裙橫豎金繡纏枝花文二品特髻上金翟七口銜  
珠結餘同一品常服亦與一品同三品特髻上金孔雀六口銜珠結正面珠翠孔雀一後鬢翠孔雀二霞  
帔上施感金雲霞孔雀文鍍花金墜子褙子上施金繡雲霞孔雀文餘同一品常服冠上珠翠孔雀三金  
孔雀二口銜珠結長襖緣襖看帶或紫或綠並繡雲霞孔雀文長裙橫豎欄並繡纏枝花文餘同一品四  
品特髻上金孔雀五口銜珠結餘同一品常服亦與二品同五品特髻上銀鍍金鴛鴦四口銜珠結正面  
珠翠鴛鴦一小珠鋪翠雲喜花三朶後鬢翠鴛鴦二銀鍍金雲頭連三釵一小珠簾梳一鍍金銀簪二小

珠梳環一雙霞帔上施繡雲霞鴛鴦文鍍金銀釵花墜子綉子上施雲霞鴛鴦文餘同四品常服冠上小珠翠鴛鴦三鍍金銀鴛鴦二挑珠牌鬢邊小珠翠花二朶雲頭連三釵一梳一壓鬢雙頭釵二鍍金簪二銀脚珠翠佛面環一雙鐲釧皆用銀鍍金長襖緣襖繡雲霞鴛鴦文長裙橫豎欄繡纏枝花文餘同四品六品特髻上翠松三株銀鍍金練鵲四口銜珠結正面銀鍍金練鵲一小珠翠花四朶後鬢翠梭毬一翠練鵲二翠梳四銀雲頭連三釵一珠緣翠簾梳一銀簪二大袖衫綾羅紬絹隨所用霞帔施繡雲霞練鵲文釵花銀墜子綉子上施雲霞練鵲文餘同五品常服冠上鍍金銀練鵲三又鍍金銀練鵲二挑小珠牌鐲釧皆用銀長襖綠襖看帶或紫或綠繡雲霞練鵲文長襖橫豎欄繡纏枝花文餘同五品七品禮服常服俱同六品其八品九品禮服惟用大袖衫霞帔綉子大衫同七品霞帔上繡纏枝花釵花銀墜子綉子上繡摘枝團花通用小珠慶雲冠常服亦用小珠慶雲冠銀間鍍金銀練鵲三又銀間鍍金銀練鵲二挑小珠牌銀間鍍金雲頭連三釵一銀間鍍金壓鬢雙頭釵二銀間鍍金腦梳一銀間鍍金簪二長襖綠緣看帶並繡纏枝花餘同七品又定命婦團髻之制以紅羅爲之繡重雉爲等第一品九等二品八等三品七等四品六等五品五等六品四等七品三等其餘不用繡雉二十四年定制命婦朝見君后在家見舅姑并夫及祭祀則服禮服公侯伯夫人與一品同大袖衫真紅色一品至五品紵綾羅六品至九品綾

羅袖絹霞帔褙子皆深青段公侯及一品二品金繡雲霞翟文三品四品金繡雲霞孔雀文五品繡雲霞  
鴛鴦文六品七品繡雲霞練鵲文大袖衫領闊三寸兩領直下一尺間綴紐子三末綴紐子二紐在掩紐  
之下拜則放之霞帔二條各繡禽七隨品級用前四後三墜子中鈹花禽一四面雲霞文禽如霞帔隨品  
級用笏以象牙爲之二十六年定一品冠用金事件珠翟五珠牡丹開頭二珠半開二翠雲二十四片翠  
牡丹葉一十八片翠口圈一副上帶金寶鈿花八金翟二口銜珠結二二品至四品冠用金事件珠翟四  
珠牡丹開頭二珠半開四翠雲二十四片翠牡丹葉一十八片翠口圈一副上帶金寶鈿花八金翟二口  
銜珠結二二品二品霞帔褙子俱雲霞翟文鈹花金墜子三品四品霞帔褙子俱雲霞孔雀文鈹花金墜  
子五品六品冠用抹金銀事件珠翟三珠牡丹開頭二珠半開五翠雲二十四片翠牡丹葉一十八片翠  
口圈一副上帶抹金銀寶鈿花八抹金銀翟二口銜珠結子二五品霞帔褙子俱雲霞鴛鴦文鈹花金鈹花  
銀墜子六品霞帔褙子俱雲霞練鵲文鈹花銀墜子七品至九品冠用抹金銀事件珠翟二珠月桂開頭  
二珠半開六翠雲二十四片翠月桂葉一十八片翠口圈一副上帶抹金銀寶鈿花八抹金銀翟二口銜  
珠結子二七品霞帔墜子褙子與六品同八品九品霞帔用繡纏枝花墜子與七品同褙子繡摘枝團花  
內外官親屬冠服洪武元年禮部尙書崔亮奉詔議定內外官父兄伯叔子孫弟姪用烏紗帽軟腳垂帶

圓領衣烏角帶品官祖母及母與子孫同居親弟姪婦女禮服合以本官所居官職品級通用漆紗珠翠慶雲冠本品衫霞帔褙子緣襖襖裙惟山松特髻子止許受封誥敕者用之品官次妻許用本品珠翠慶雲冠褙子爲禮服銷金闊領長襖長裙爲常服二十五年令文武官父兄伯叔弟姪子皆穿

內使冠服明初置內使監冠烏紗描金曲脚帽衣胸背花盤領窄袖衫烏角帶鞞用紅扇面黑下樁各官火者服與庶人同洪武三年諭宰臣內使監未有職名者當別製冠以別監官禮部奏定內使監凡遇朝會依品具朝服公服行禮其常服葵花胸背團領衫不拘顏色烏紗帽犀角帶無品從者常服團領衫無胸背花不拘顏色烏角帶烏紗帽垂軟帶年十五以下者惟戴烏紗小頂帽按大政記永樂以後宦官在帝左右必蟒服製如曳撒繡蟒於左右繫以鸞帶此燕閑之服也次則飛魚惟入侍用之貴而用事者賜蟒文武一品官所不易得也單蟒面皆斜向坐蟒則面向右尤貴又有膝襪者亦如曳撒上有蟒補當膝處橫織細雲蟒蓋南郊及山陵扈從便於乘馬也或召對燕見君臣皆不用袍而用此第蟒有五爪四爪之分襪有紅黃之別耳弘治元年都御史邊鏞言國朝品官無蟒衣之制夫蟒無角無足今內官多乞蟒衣殊類龍形非制也乃下詔禁之十七年諭閣臣劉健曰內臣僭妄尤多因言服色所宜禁曰蟒龍飛魚斗牛本在所禁不合私織間有賜者或久而敝不宜輒自織用元黃紫皂乃屬正禁卽柳黃明黃薑黃諸

色亦應禁之孝宗加意鉅束故申飭者再然內官驕恣已久積習相沿不能止也初太祖制內臣服其紗帽與羣臣異且無朝冠幘頭亦無祭服萬厯初穆宗主入太廟大璫冠進賢服祭服以從蓋內府祀中霤竈并之神例遣中官因自創爲祭服非由廷議也

侍儀舍人冠服洪武二年禮官議定侍儀舍人導禮儀元制展脚幘頭窄袖紫衫塗金束帶皁紋鞞常服烏紗唐帽諸色盤領衫烏角束帶衫不用黃四年中書省議定侍儀舍人併御史臺知班引禮執事冠進賢冠無梁服絳色衣其蔽膝履襪帶笏與九品同惟不用中單

校尉冠服洪武三年定制執仗之士首服皆纓金額交脚幘頭其服有諸色辟邪寶相花裙襖銅葵花束帶皁紋鞞六年令校尉衣只孫束帶幘頭鞞只孫一作質孫本元制蓋一色衣也十四年改用金鵝鞞黑漆戩金荔枝銅釘樣每五釘攢就四面稍起邊欄鞞青緊束之二十二年令將軍力士校尉旂軍常戴頭巾或檣腦二十五年令校尉力士上直穿鞞出外不許

刻期冠服宋置快行親從官明初謂之刻期冠方頂巾衣背鷹鷄花腰線襖子諸色闊區絲條大象牙雕花環行條八帶鞞洪武六年惟用雕刻象牙條環餘同庶民

儒士生員監生巾服洪武三年令士人戴四方平定巾二十三年定儒士生員衣自領至裳去地一寸袖

長過手復回不及肘三寸二十四年以士子巾服無異吏胥宜甄別之命工部制式以進太祖親視凡三易乃定生員襴衫用玉色布絹爲之寬袖阜緣阜條軟巾垂帶貢舉入監者不變所服洪武末許戴遮陽帽後遂私戴之洪熙中帝問衣藍者何人左右以監生對帝曰著青衣較好乃易青圓領嘉靖二十二年禮部言士子冠服詭異有凌雲等巾甚乖禮制詔所司禁之萬曆二年禁舉人監生生儒僭用忠靜冠巾錦綺鏤履及張繖蓋戴煖耳違者五城御史送問

庶人冠服明初庶人婚許假九品服洪武三年庶人初戴四帶巾改四方平定巾雜色盤領衣不許用黃又令男女衣服不得僭用金繡錦綺綾羅止許紬絹素紗其鞞不得裁製花樣金線裝飾首飾釵鐲不許用金玉珠翠止用銀六年令庶人巾環不得用金玉瑪瑙珊瑚琥珀未入流品者同庶人帽不得用頂帽珠止許水晶香木十四年令農衣紬紗絹布商賈止衣絹布農家有一人爲商賈者亦不得衣紬紗二十二年令農夫戴斗笠蒲笠出入市井不禁不親農業者不許二十三年令耆民衣制袖長過手復回不及肘三寸庶人衣長去地五寸袖長過手六寸袖椿廣一尺袖口五寸二十五年以民間違禁鞞巧裁花樣欲以金線藍條詔禮部嚴禁庶人不許穿鞞止許穿皮札鞞惟北地苦寒許用牛皮直縫鞞正德元年禁商販僕役倡優下賤不許服用貂裘十六年禁軍民衣紫花罩甲或禁門或四外遊走者緝事人禽

之

士庶妻冠服洪武三年定制士庶妻首飾用銀鍍金耳環用金珠釧鐲用銀服淺色團衫用紵絲綾羅絹綉五年令民間婦人禮服惟紫絕不用金繡袍衫止紫綠桃紅及諸淺淡顏色不許用大紅鴉青黃色帶用藍絹布女子在室者作三小髻金釵珠頭髻窄袖褙子凡婢使高頂髻絹布狹領長襖長裙小婢使雙髻長袖短衣長裙成化十年禁官民婦女不得僭用渾金衣服寶石首飾正德元年令軍民婦女不許用銷金衣服帳幔寶石首飾鐲釧

協律郎樂舞生冠服明初郊社宗廟用雅樂協律郎幘頭紫羅袍荔枝帶樂生緋袍展脚幘頭舞士幘頭紅羅袍荔枝帶卓鞞文舞生紅袍武舞生緋袍俱展脚幘頭革帶卓鞞朝會大樂九奏歌工中華一統巾紅羅生色大袖衫畫黃鸞鸚鵡花樣紅生絹襯衫錦領杏紅絹裙白絹大口袴青絲條白絹襪茶褐鞞其和聲郎押樂者卓羅闊帶巾青羅大袖衫紅生絹襯衫錦領塗金束帶卓鞞其二舞一武舞曰平定天下之舞舞士皆黃金束髮冠紫絲纓青羅生色畫舞鶴花樣窄袖衫白生絹襯衫錦領紅羅銷金大袖罩袍紅羅銷金裙卓生色畫花緣襖白羅銷金汗袴藍青羅銷金緣紅絹擁頂紅結子紅絹束腰塗金束帶青絲大條錦臂鞞綠雲頭卓鞞舞師黃金束髮冠紫絲纓青羅大袖衫白絹襯衫錦領塗金束帶綠雲頭卓

鞞一文舞曰車書會同之舞舞士皆黑光描金方山冠青絲纓青紅羅大袖衫紅生絹襯衫錦領紅羅擁  
項紅結子塗金束帶白絹大口袴白絹襪茶褐鞞舞師冠服與舞士同惟大袖衫用青羅不用紅羅擁項  
紅結子一文舞曰撫安四夷之舞舞士東夷四人椎髻於後繫紅銷金頭繩紅羅銷金抹額中綴塗金博  
山兩傍綴塗金巾環明金耳環青羅生色畫花大袖衫紅生色領袖紅羅銷金裙青銷金裙緣紅生絹襯  
衫錦領塗金束帶烏皮鞞西戎四人間道錦纏頭明金耳環紅紵絲細摺襖子大紅羅生色雲肩綠生色  
緣藍青羅銷金汗袴紅銷金緣繫腰合鉢十字泥金數珠五色銷金羅香囊紅絹擁項紅結子赤皮鞞南  
蠻四人縮朝天髻繫紅羅生色銀錠紅銷金抹額明金耳環紅織金短襖子綠織金細摺短裙絨錦袴間  
道紵絲手巾泥金頂牌金珠瓔珞綴小金鈴錦行纏泥金獅鬘帶綠銷金擁項紅結子赤皮鞞北翟四人  
戴單于冠貂鼠皮簷雙垂髻紅銷金頭繩紅羅銷金帔額諸色細摺襖子藍青生色雲肩紅結子紅銷金  
汗袴繫腰合鉢阜皮鞞其舞師皆戴白捲簷氎帽塗金帽頂一撒紅纓紫羅帽襟紅綠金繡襖子白銷金  
汗袴藍青銷金緣塗金束帶綠擁項紅結子赤皮鞞凡大樂工及文武二舞樂工皆曲脚幘頭紅羅生色  
畫花大袖衫塗金束帶紅絹擁項紅結子阜皮鞞四夷樂工皆蓮花帽諸色細摺襖子白銷金汗袴紅銷  
金緣紅綠絹束腰紅羅擁項紅結子花鞞永樂間定殿內侑食樂奏平定天下之舞引舞樂工皆青羅包



巾青紅綠玉色羅銷金胷背襖子渾金銅帶紅羅褶襖雲頭皁鞞青綠羅銷金包臀舞人服色如之奏撫  
安四夷之舞高麗舞四人皆笠子青羅銷金胷背襖子銅帶皁鞞琉球舞四人皆棉布花手巾青羅大袖  
襖子銅帶白碾光絹間道踢袴皁皮鞞北番舞四人皆狐帽青紅紵絲銷金襖子銅帶伍魯速回回舞四  
人皆青羅帽比里罕棉布花手巾銅帶皁鞞奏車書會同之舞舞人皆皁羅頭巾青綠玉色皁沿邊欄茶  
褐線條皁皮四縫鞞奏表正萬邦之舞引舞二人青羅包巾紅羅銷金項帕紅生絹錦領中單紅生絹銷  
金通袖襖子青線條銅帶織錦臂鞞雲頭皁鞞各色銷金包臀紅絹褶襖舞人樂工服色與引舞同奏天  
命有德之舞引舞二人青幪紗如意冠紅生絹錦領中單紅生絹大袖袍各色絹采畫直纏黑角偏帶藍  
絹綵雲頭皁鞞白布襪舞人樂工服色與引舞同洪武五年定齋郎樂生文武舞生冠服齋郎黑介幘漆  
布爲之無花樣服紅絹窄袖衫紅生絹爲裏皁皮四縫鞞黑角帶文舞生及樂生黑介幘漆布爲之上加  
描金蟬服紅絹大袖袍胷背畫纏枝方葵花紅生絹爲裏加錦臂鞞二皁皮四縫鞞黑角帶武舞生武弁  
以漆布爲之上加金蟬服飾鞞帶並同文舞生嘉靖九年定文武舞生服制圖丘服青紵絲方澤服黑綠  
紗朝日壇服赤羅夕月壇服玉色羅

宮中女樂冠服洪武三年定制凡中宮供奉女樂奏鑾等官妻本色髮髻青羅圓領提調女樂黑漆唐巾

大紅羅銷金花圓領鍍金花帶卓鞞歌章女樂黑漆唐巾大紅羅銷金裙襖曾帶大紅羅帔額青綠羅彩畫雲肩描金牡丹花卓鞞奏樂女樂服色與歌章同嘉靖九年祀先蠶定樂女生冠服黑縐紗描金蟬冠黑絲纓黑素羅銷金葵花曾背大袖女袍黑生絹襯衫錦領塗金束帶白襪黑鞵

教坊司冠服洪武三年定教坊司樂藝青卍字頂巾繫紅綠褶襖樂妓明角冠卓鞞子不許與民妻同御前供奉俳長鼓吹冠紅羅曾背小袖袍紅絹褶襖卓鞞色長鼓吹冠紅青羅紗絲彩畫百花袍紅絹褶襖歌工弁冠紅羅織金背曾大袖袍紅生絹錦領中單黑角帶紅熟絹錦脚袴卓皮琴鞵白棉布夾襪樂工服色與歌工同凡教坊司官常服冠帶與百官同至御前供奉執粉漆笏服黑漆幘頭黑綠羅大袖襪袍黑角偏帶卓鞞教坊司伶人常服綠色巾以別士庶之服樂人皆戴鼓吹冠不用錦條惟紅褶襖服色不拘紅綠教坊司婦人不許戴冠穿褶子樂人衣服止用明綠桃紅玉色水紅茶褐色色俳長樂工俱卓頭巾雜色條

王府樂工冠服洪武十五年定凡朝賀用大樂宴禮七奏樂樂工俱紅絹彩畫曾背方花小袖單袍有花鼓吹冠錦臂鞞卓鞞抹額以紅羅彩畫束腰以紅絹其餘樂工用綠絹彩畫曾背方花小袖單袍無花鼓吹冠抹額以紅絹彩畫束腰以紅絹

軍士服洪武元年令製衣表裏異色謂之鴛鴦戰襖以新軍號二十一年定旂手衛軍士力士俱紅絆襖其餘衛所襖絆如之凡絆襖長齊膝窄袖內實以棉花二十六年令騎士服對襟衣便於乘馬也不應服而服者罪之

卓隸公人冠服洪武三年定卓隸圓頂巾皂衣四年定卓隸公使人卓盤領衫平頂巾白禱褶帶錫牌十四年令各衙門祇禁原服皂衣改用淡青二十五年卓隸伴當不許着鞞止用皮札鞞

外國君臣冠服洪武二年高麗入朝請祭服制度命製給之二十七年定蕃國朝貢儀國王來朝如嘗賜朝服者服之以朝三十一年賜琉球國王併其臣下冠服永樂中賜琉球中山王皮弁玉圭麟袍犀帶視二品秩宣德三年朝鮮國王李裯言洪武中蒙賜國王冕服九章陪臣冠服比朝廷遞降二等故陪臣一等比朝臣第三等得五梁冠服永樂初先臣芳遠遣世子禔入朝蒙賜五梁冠服臣竊惟世子冠服何止同陪臣一等乞爲定制乃命製六梁冠賜之嘉靖六年令外國朝貢人不許擅用違制衣服如違賣者買者同罪

僧道服洪武十四年定禪僧茶褐常服青條玉色袈裟講僧玉色常服綠條淺紅袈裟教僧皂常服黑條淺紅袈裟僧官如之惟僧錄司官袈裟綠文及環皆飾以金道士常服青法服朝衣皆赤道官亦如之惟

道錄司官法服朝服綠文飾金凡在京道官紅道衣金襴木簡在外道官紅道衣木簡不用金襴道士青道服木簡

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

輿服四

皇帝寶璽

皇后冊寶

皇妃以下冊印

皇太子冊寶

皇太子妃冊寶

親王以下冊寶冊印

鐵券

印信

符節

宮室制度

臣庶室屋制度

器用

明初寶璽十七其大者曰皇帝奉天之寶曰皇帝之寶曰皇帝行寶曰皇帝信寶曰天子之寶曰天子行寶曰天子信寶曰制誥之寶曰敕命之寶曰廣運之寶曰皇帝尊親之寶曰皇帝親親之寶曰敬天勤民之寶又有御前之寶表章經史之寶及欽文之璽丹符出驗四方洪武元年欲制寶璽有賈胡浮海獻美玉曰此出於闐祖父相傳當為帝王寶璽乃命製為寶不知十七寶中此玉製何寶也成祖又製皇帝親親之寶皇帝奉天之寶誥命之寶敕命之寶弘治十三年鄆縣民毛志學於泥河濱得玉璽其文曰受命於天既壽永昌色白微青螭紐陝西巡撫熊紳以為秦璽復出遣人獻之禮部尚書傅瀚言自有秦璽以

來歷代得喪真偽之跡具載史籍今所進篆文與輟耕錄等書摹載魚鳥篆文不同其螭紐又與史傳所紀文盤五龍螭缺一角旁刻魏錄者不類蓋秦璽亡已久今所進與宋元所得疑皆後世摹秦璽而刻之者竊惟璽之用以識文書防詐僞非以爲寶玩也自秦始皇得藍田玉以爲璽漢以後傳用之自是巧爭力取謂得此乃足以受命而不知受命以德不以璽也故求之不得則僞造以欺人得之則君臣色喜以誇示於天下是皆貽笑千載我高皇帝自制一代之璽文各有義隨事而施真足以爲一代受命之符而垂法萬世何藉此璽哉帝從其言却而不用嘉靖十八年新製七寶曰奉天承運大明天子寶大明受命之寶巡狩天下之寶垂訓之寶命德之寶討罪安民之寶敕正萬民之寶與國初寶璽共爲御寶二十四尚寶司官掌之

皇后之册用金册二片依周尺長一尺二寸廣五寸厚二分五釐字依數分行鐫以真書上下有孔聯以紅纒開闔如書帙藉以紅錦褥册盒用木飾以渾金瀝粉蟠龍紅紵絲褱裏內以紅羅銷金小袂裏册外以紅羅銷金夾袱包之五色小條縈於外寶用金龜紐篆文曰皇后之寶依周尺方五寸九分厚一寸七分寶池用金闔取容寶篋二副一置寶一置寶池每副三重外篋用木飾以渾金瀝粉蟠龍紅貯絲褱裏中篋用金鍍蟠龍內小篋飾如外篋內置寶座四角雕蟠龍飾以渾金座上用錦褥以銷金紅羅小夾袱

裏寶其體外各用紅羅銷金大夾袱覆之臨冊之日冊寶俱置於紅綵輿案案頂有紅羅灑水用擔牀舉之

皇貴妃而下有冊無寶而有印妃冊用鍍金銀冊二片廣長與后冊同冊盤飾以渾金灑粉蟠鳳其印用金龜紐尺寸與諸王寶同文曰皇妃之印篋飾以蟠鳳宣德元年帝以貴妃孫氏有容德特請於皇太后製金寶賜之未幾卽誕皇嗣自是貴妃授寶遂爲故事嘉靖十年立九嬪冊用銀殺皇妃五分之一以金飾之

皇太子冊寶冊用金二片其制及盤篋之飾與皇后冊同寶用金龜紐篆書皇太子寶其制及池篋之飾與后寶同

皇太子妃冊寶其冊用金兩葉重百兩每葉高一尺二寸廣五寸藉冊以錦聯冊以紅絲條墊冊以錦褥裏冊以紅羅銷金袱其盤飾以渾金灑粉雲鳳內有花銀釘鉸嵌金絲鐵筭箭外以紅羅銷金袱覆之其金寶之制未詳洪武二十八年更定止授金冊不用寶

親王冊寶冊制與皇太子同其寶用金龜紐依周尺方五寸二分厚一寸五分文曰某王之寶池篋之飾與皇太子寶同寶盤之飾則雕蟠螭

親王妃册印其金册高視太子妃册減一寸餘制悉同册文視親王其金印之制未詳洪武二十八年更定止授金册

公主册印銀册二片鐫字鍍金藉以紅錦褥册蓋飾以渾金灑粉蟠螭其印同宋制用金龜紐文曰某國公主之印方五寸二分厚一寸五分印池用金廣取容印外篋用木飾以渾金灑粉盤鳳中篋用金鍍蟠鳳內小篋飾如外篋

親王世子金册金寶承襲止授金册傳用金寶

世子妃亦用金册洪武二十三年鑄世子妃印制視王妃金印龜紐篆文曰某世子妃印

郡王鍍金銀册鍍金銀印册文視世子其妃止有鍍金銀册

功臣鐵券洪武二年太祖欲封功臣議爲鐵券而未有定制或言台州民錢允一有家藏吳越王鏐唐賜鐵券遂遣使取之因其式而損益焉其制如瓦第爲七等公二等一高尺廣一尺六寸五分一高九寸五分廣一尺六寸侯三等一高九寸廣一尺五寸五分一高八寸五分廣一尺五寸一高八寸廣一尺四寸五分伯二等一高七寸五分廣一尺三寸五分一高六寸五分廣一尺二寸五分外刻歷履恩數之詳以配其功中鐫免罪減祿之數以防其過字畝以金凡九十七副各分左右左頌功臣右藏內府有故則合



之以取信焉三年大封功臣公六人侯二十八人並賜鐵券李善長徐達李文忠馮勝鄧愈常茂侯湯和唐勝宗陸仲亨周德興華雲龍顧時耿炳文陳德郭子興王志鄭遇春費聚吳良吳楨趙庸永忠俞通源華高楊璟康鐸朱亮祖傅友德胡美韓政黃彬曹良臣梅思祖陸聚二十五年改製鐵券賜公傅友德侯王弼耿炳文郭英及故公徐達李文忠侯吳傑沐英凡八家永樂初靖難功臣亦有賜者

百官印信洪武初鑄印局鑄中外諸司印信正一品銀印三臺方三寸四分厚一寸六部都察院並在外各都司俱正二品銀印二臺方三寸二分厚八分其餘正二品從二品官銀印二臺方三寸一分厚七分惟衍聖公以正二品三臺銀印則景泰三年賜也順天應天二府俱正三品銀印方二寸九分厚六分五釐其餘正三品從三品官俱銅印方二寸七分厚六分惟太僕光祿寺並在外鹽運司俱從三品銅印方減一分厚減五釐正四品從四品俱銅印方二寸五分厚五分正五品從五品俱銅印方二寸四分厚四分五釐惟在外各州從五品銅印方減一分厚減五釐正六品從六品俱銅印方二寸二分厚三分五釐正七品從七品銅印方二寸一分厚三分正從八品俱銅印方二寸厚二分五釐正從九品俱銅印方一寸九分厚二分二釐未入流者銅條記闊一寸三分長二寸五分厚二分一釐以上俱直紐九疊篆文初雜職亦方印至洪武十三年始改條記凡百官之印惟文淵閣銀印直紐方一寸七分厚六分五釐篆文

誠重之也武臣受重寄者征西鎮朔平蠻諸將軍銀印虎紐方三寸三分厚九分柳葉篆文洪武中嘗用上公佩將軍印後以公侯伯及都督充總兵官名曰掛印將軍有事征伐則命總兵佩印以往旋師則上所佩印於朝此外惟漕運總兵印同將軍其在外鎮守總兵參將掛印則洪熙元年始也有文臣掛將軍印者王驥以兵部尙書征湖貴苗掛征蠻將軍印王越以左都御史守大同掛征西將軍印其他文武大臣有領敕而權重者或給以銅關防直紐廣一寸九分五釐長二寸九分厚三分九釐篆文雖宰相行邊與部曹無異惟正德時張永征安化王用金鑄嘉靖中顧鼎臣居守用牙鏤關防皆特賜也初太祖重御史之職分河南等十三道每道鑄二印文曰繩愆糾繆守院御史掌其一其一藏內府有事則受以出復命則納之洪武二十三年都御史袁泰言各道印篆相類乃命改製某道監察御史其奉差者則曰巡按某處監察御史銅印直紐有眼方一寸五分厚三分八釐篆文成祖初幸北京有一官署二三印者夏原吉至兼掌九卿印諸曹並於朝房取裁其任重矣

明初賜高麗金印龜紐方三寸文曰高麗國王之印賜安南鍍金銀印駝紐方三寸文曰安南國王之印賜占城鍍金銀印駝紐方三寸文曰占城國王之印賜土蕃金印駝紐方五寸文曰白蘭王印

符牌凡宣召親王必遣官齎金符以往親王之藩及鎮守巡撫諸官奏請符驗俱從兵部奏行尙寶司領

之洪武二十六年定制凡公差以軍情重務及奉旨差遣給驛者兵部既給勘合卽赴內府關領符驗給驛而去事竣則繳嘉靖三十七年定制南京鳳陽守備內外官並各處鎮守總兵巡撫及各守一方不受鎮守節制內外守備並領符驗奏事凡監鎗整飭兵備並一城一堡守備官不許關領符驗其制上織船馬之狀起馬者用馬字號起船者水字號起雙馬者達字號起單馬者通字號起站船者信字號洪武四年始製用寶金牌凡軍機文書自都督府中書省長官而外不許擅奏有詔調軍中書省同都督府覆奏乃各出所藏金牌入請用寶又造軍中調發符牌用鐵長五寸闊半之上鍍二飛龍下鍍二麒麟首爲圖竅貫以紅絲條嘗遣官齎金牌信符詣西番以茶易馬其牌四十一上號藏內府下號降各番篆文曰皇帝聖旨左曰合當差發右曰不信者斬二十二年又頒西番金牌信符其後番官款塞皆齎原降牌符而至永樂二年製信符金字紅牌給雲南諸蠻凡歷代改元則所頒外國信符金牌必更鑄新年號給之此符信之達於四裔者也其武臣懸帶金牌則洪武四年所造闊二寸長一尺上鍍雙龍下鍍二伏虎牌首尾爲圓竅貫以紅絲條指揮佩金牌雙雲龍雙虎符千戶佩鍍金銀牌獨雲龍獨虎符百戶素雲銀牌符太祖親爲文鍍之曰上天祐民朕乃率撫威加華夏實憑虎臣賜爾金符永傳後嗣天子祀郊廟若視學藉田勳衛扈從及公侯駙馬五府都督日直錦衣衛當直及都督率諸衛千百戶夜巡內皇城金吾諸衛

各輪官隨朝巡綽俱給金牌有龍者虎者麒麟者獅者雲者以官爲差其扈駕金字銀牌則洪武六年所造尋改爲守衛金牌以銅爲之塗以金高一尺闊三寸分字號凡五仁字號上級獨龍蟠雲花公侯伯都督佩之義字號級伏虎盤雲花指揮佩之禮字號級獬豸蟠雲花千戶衛鎮撫佩之智字號級獅子蟠雲花百戶所鎮撫佩之信字號級蟠雲花將軍佩之牌下鑄守衛二篆字背鑄凡守衛官軍懸帶此牌等二十四字牌首級貫青絲鎮撫及將軍隨駕直宿衛者佩之下直則納之凡夜巡官於尙寶司領令牌禁城各門金吾等衛指揮千戶分領甲字號牌午門自一至四長安左右門東華門自五至八西華門自九至十二玄武門自十三至十六五城兵馬指揮亦曰領令牌東西南北中城分領木金水火土五字號留守五衛巡城官並金吾等衛守衛官俱領銅符留守衛指揮所領承字及東西北字號牌俱左半字陽文左比金吾等衛端門承天門東西北安門指揮千戶所領承字及東西北字號俱右半字陰文右比銅符字號比對相同方許巡行內官內使之出亦須守門官比對銅符而後行皇城九門守衛軍與圍子手各領勇字號銅牌錦衣校尉上直及光祿寺吏典廚役遇大祀俱佩雙魚銅牌永樂六年駕幸北京扈從官俱帶牙牌五府六部都察院大理寺錦衣衛各鑄印信通政司鴻臚寺各鑄關防謂之行在衙門印信關防其後命內府印綬監收貯嘉靖十八年南巡禮部領出以給扈從者焉凡郊廟諸祭陪祀供事官及執事

者入壇俱領牙牌洪武八年始也圓花牌陪祀官領之長花牌供事官領之長素牌執事人領之又謂之祀牌凡駕詣陵寢扈從官俱於尙寶司領小牙牌嘉靖九年皇后行親蠶禮文官四品以上武官三品以上命婦及使人俱於上寶司領牙牌有雲花圖牌鳥形長牌之異凡文武朝參官錦衣衛當駕官亦領牙牌以防姦僞洪武十一年始也其制以象牙爲之刻官職於上不佩則門者却之私相借者論如律牙牌字號公侯伯以勳字駙馬都尉以親字文官以文字武官以武字教坊官以樂字入內官以官字正德十六年禮科邢寰言牙牌惟常朝職官得懸比來權姦侵柄傳旨陞官者輒佩牙牌宜清核以重名器乃命文職不朝參者毋得濫給牙牌武官進御侍班佩刀執金爐者給與嘉靖二十八年內府供事匠作武職官皆帶朝參牙牌嘗奉旨革奪旋復給之給事中陳邦修以爲言禮部覆奏會典所載文武官出入禁門帶牙牌有執事供事朝參之別執事供事者皆屆期而領如期而繳惟朝參牙牌得朝夕懸之非徒爲關防之具亦以示等威之辨也虛銜帶俸供事執事者不宜槩領第出入禁闈若一切革奪何由譏察尙寶司所貯舊牌數百上有入內府字號請以給之至於衛所武官掌印僉書侍衛之外非屬朝參供役者盡革奪之其納粟填註冒賜牙牌及罷退閑住官舊所關領不繳者俱速問報可

洪武十五年製使節黃色三簷寶蓋長二尺黃紗袋籠之又製丹漆架一以節置其上使者受命則戴以

行使歸則持之以復命二十三年詔考定使節之制禮部奏漢光武時以竹爲節柄長八尺其毛三重而黃公紹韻會註漢節柄長三尺毛三重以旄牛爲之詔從三尺之制

宮室之制吳元年作新內正殿曰奉天殿後曰華蓋殿又後曰謹身殿皆翼以廊廡奉天殿之前曰奉天門殿左曰文樓右曰武樓謹身殿之後爲宮前曰乾清後曰坤寧六宮以次列宮殿之外周以皇城城之門南曰午門東曰東華西曰西華北曰元武時有言瑞州文石可登地者太祖曰敦崇儉朴猶恐習於奢華爾乃導予奢麗乎言者慚而退洪武八年改建大內宮殿十年告成闕門曰午門翼以兩觀中三門東西爲左右掖門午門內曰奉天門門內奉天殿嘗御以受朝賀者也門左右爲東西角門奉天殿左右門左曰中左右曰中右兩廡之間左曰文樓右曰武樓奉天殿之後曰華蓋殿華蓋殿之後曰謹身殿殿後則乾清宮之正門也奉天門外兩廡間有門左曰左順右曰右順左順門外有殿曰文華爲東宮視事之所右順門外有殿曰武英爲皇帝齋戒時所居制度如舊規模益宏二十五年改建大內金水橋又建端門承天門樓各五間及長安東西二門永樂十五年作西宮於北京中爲奉天殿側爲左右二殿南爲奉天門左右爲東西角門其南爲午門又南爲承天門殿北有後殿涼殿煖殿及仁壽景福仁和萬春永壽長春等宮凡爲屋千六百三十餘楹十八年建北京凡宮殿門闕規制悉如南京壯麗過之中朝曰奉天

殿通爲屋八千三百五十楹殿左曰中左門右曰中右門丹墀東曰文樓西曰武樓南曰奉天門常朝所御也左曰東角門右曰西角門東廡曰左順門西廡曰右順門正南曰午門中三門翼以兩觀觀各有樓左曰左掖門右曰右掖門午門左稍南曰闕左門曰神廚門內爲太廟右稍南曰闕右門曰社左門內爲太社稷又正南曰端門東曰廟街門卽太廟右門也西曰社街門卽太社稷壇南左門也又正南曰承天門又折而東曰長安左門折而西曰長安右門東後曰東安門西後曰西安門北後曰北安門正南曰大明門中爲馳道東西長廊各千步奉天殿之後曰華蓋殿又後曰謹身殿謹身殿左曰後左門右曰後右門正北曰乾清門內爲乾清宮是曰正寢後曰交泰殿又後曰坤寧宮爲中宮所居東曰仁壽宮西曰清寧宮以奉太后左順門之東曰文華殿右順門之西曰武英殿文華殿東南曰東華門武英殿西南曰西華門坤寧宮後曰坤寧門門之後曰元武門其他宮殿名號繁多不能盡列所謂千門萬戶也皇城內宮城外凡十有二門曰東上門東上北門東上南門東中門西上門西上北門西上南門西中門北上門北上東門北上西門北中門復於皇城東南建皇太孫宮東安門外東南建十王街宣宗留意文雅建廣寒清暑二殿及東西瓊島游觀所至悉置經籍正統六年重建三殿嘉靖中於清寧宮後地建慈慶宮於仁壽宮故基建慈寧宮三十六年三殿門樓災帝以殿名奉天非題扁所宜用敕禮部議之部臣會議言皇

祖肇造之初名曰奉天者昭揭以示虔爾既以名則是昊天監臨儼然在上臨御之際坐以視朝似未安也今乃修復之始宜更定以答天庥明年重建奉天門更名曰大朝門四十一年更名奉天殿曰皇極華蓋殿曰中極謹身殿曰建極文樓曰文昭閣武樓曰武成閣左順門曰會極右順門曰歸極大朝門曰皇極東角門曰弘政西角門曰宣治又改乾清宮右小閣名曰道心旁左門曰仁蕩右門曰義平世宗初墾西苑隙地爲田建殿曰無逸亭曰幽風又建亭曰省耕曰省斂每歲耕穫帝輒臨觀十三年西苑河東亭榭成親定名曰天鵝房北曰飛靄亭迎翠殿前曰浮香亭寶月亭前曰秋輝亭昭和殿前曰澄淵亭後曰趨臺坡臨漪亭前曰水雲榭西苑門外二亭曰左臨海亭右臨海亭北開口曰湧玉亭河之東曰聚景亭改呂梁洪之亭曰呂梁前曰櫟金亭翠玉館前曰顯秀亭

親王府制洪武四年定城高二丈九尺正殿基高六尺九寸正門前後殿四門城樓飾以青綠點金廊房飾以青黛四城正門以丹漆金塗銅釘宮殿窠拱攢頂中畫蟠螭飾以金邊畫八吉祥花前後殿座用紅漆金蟠螭帳用紅銷金蟠螭座後壁則畫蟠螭彩雲後改爲龍立山川社稷宗廟於王城內七年定親王所居殿前曰承運中曰圖殿後曰存心四城門南曰端禮北曰廣智東曰體仁西曰遵義太祖曰使諸王觀名思義以藩屏帝室九年定親王宮殿門廡及城門樓皆覆以青色琉璃瓦又命中書省臣惟親王宮



得飾朱紅大青綠其他居室止飾丹碧十二年諸王府告成其制中曰承運殿十一間後爲圖殿次曰存心殿各九間承運殿兩廡爲左右二殿自存心承運周迴兩廡至承運門爲屋百三十八間殿後爲前中後三宮各九間宮門兩廡等室九十九間王城之外周垣四門堂庫等室在其間凡爲宮殿室屋八百間有奇弘治八年更定王府之制頗有所增損郡王府制天順四年定門樓廳廂廚庫米倉等共數十間而已

公主府第洪武五年禮部言唐宋公主視正一品府第並用正一品制度今擬公主第廳堂九間十一架施花樣獸脊梁棟斗拱簷桷彩色繪飾惟不用金正門五間七架大門綠油銅環石礎牆輒鏤鑿玲瓏花樣從之

百官第宅明初禁官民房屋不許雕刻古帝后聖賢人物及日月龍鳳俊猊麒麟犀象之形凡官員任滿致仕與見任同其父祖有官身歿子孫許居父祖房舍洪武二十六年定制官員營造房屋不許歇山轉角重簷重栱及繪藻井惟樓居重簷不禁公侯前廳七間兩厦九架中堂七間九架後堂七間七架門三間五架用金漆及獸面錫環家廟三間五架覆以黑板瓦脊用花樣瓦獸梁棟斗拱簷桷綵繪飾門窗枋柱金漆飾廊廡庖庫從屋不得過五間七架一品二品廳堂五間九架屋脊用瓦獸梁棟斗拱簷桷青碧

繪飾門三間五架綠油獸面錫環三品至五品廳堂五間七架屋脊用瓦獸梁棟簷桷青碧繪飾門三間三架黑油錫環六品至九品廳堂三間七架梁棟飾以土黃門一間三架黑門鐵環品官房舍門窗戶牖不得用丹漆功臣宅舍之後留空地十丈左右皆五丈不許那移軍民居止更不許於宅前後左右多占地構亭館開池塘以資遊眺三十五年申明禁制一品三品廳堂各七間六品至九品廳堂梁棟祇用粉青飾之

庶民廬舍洪武二十六年定制不過三間五架不許用斗拱飾彩色三十五年復申禁飭不許造九五間數房屋雖至一二十所隨其物力但不許過三間正統十二年令稍變通之庶民房屋架多而間少者不在禁限

器用之禁洪武二十六年定公侯一品二品酒注酒盞金餘用銀三品至五品酒注銀酒盞金六品至九品酒注酒盞銀餘皆鑿漆木器不許用硃紅及抹金描金雕琢龍鳳文庶民酒注錫酒盞銀餘用鑿漆百官牀面屏風榻子雜色漆飾不許雕刻龍文並金飾朱漆軍官軍士弓矢黑漆弓袋箭囊不許用朱漆描金裝飾建文四年申飭官民不許僭用金酒爵其椅棹木器亦不許朱紅金飾正德十六年定一品二品器皿不用玉止許用金商賈技藝家器皿不許用銀餘與庶民同





總裁官總理事務經筵講官少保兼太子太保保和殿大學士兼管吏部戶部尙書事加六級張廷玉等奉  
敕修

選舉

選舉之法大略有四曰學校曰科目曰薦舉曰銓選學校以教育之科目以登進之薦舉以旁招之銓選以布列之天下人才盡於是矣明制科目爲盛卿相皆由此出學校則儲才以應科目者也其徑由學校通籍者亦科目之亞也外此則雜流矣然進士舉貢雜流三途並用雖有畸重無偏廢也薦舉盛於國初後因專用科目而罷銓選則入官之始舍此蔑由焉是四者釐然具載其本末而二百七十年間取士得失之故可觀已

科舉必由學校而學校起家可不由科舉學校有二曰國學曰府州縣學府州縣學諸生入國學者乃可得官不入者不能得也入國學者通謂之監生舉人曰舉監生員曰貢監品官子弟曰廩監捐貲曰例監同一貢監也有歲貢有選貢有恩貢有納貢同一廩監也有官生有恩生國子學之設自明初乙巳始洪武元年令品官子弟及民俊秀通文義者並充學生選國琦王瑛等十餘人侍太子讀書禁中入對謹身

殿姿狀明秀應對詳雅太祖喜因厚賜之天下既定詔擇府州縣學諸生入國子學又擇年少舉人趙惟一等及貢生董景等入學讀書賜以衣帳命於諸司先習吏事謂之厯事監生取其中尤英敏者李擴等入文華武英堂說書謂之小秀才其才學優瞻聰明俊偉之士使之博極羣書講明道德經濟之學以期大用謂之老秀才初改應天府學爲國子學後改建於雞鳴山下既而改學爲監設祭酒司業及監丞博士助教學正學錄典籍掌饌典簿等官分六堂以館諸生曰率性修道誠心正義崇志廣業學旁以宿諸生謂之號房厚給廩餼歲時賜布帛文綺襲衣巾鞵正旦元宵諸令節俱賞節錢孝慈皇后積糧監中置紅倉二十餘舍養諸生之妻子厯事生未娶者賜錢婚聘及女衣二襲月米二石諸生在京師歲久父母存或父母亡而大父母伯叔父母存皆遺歸省人賜衣一襲鈔五錠爲道里費其優恤之如此而其教之法每旦祭酒司業坐堂上屬官自監丞以下首領則典簿以次序立諸生揖畢質問經史拱立聽命惟朔望給假餘日升堂會饌乃會講復講背書輪課以爲常所習自四子本經外兼及劉向說苑及律令書數御製大誥每月試經書義各一道詔誥表策論判內科二道每日習書二百餘字以二王智永歐虞顏柳諸帖爲法每班選一人充齋長督諸生工課衣冠步履飲食必嚴飭中節夜必宿監有故而出必告本班教官令齋長帥之以白祭酒監丞置集愆簿有不遵者書之再三犯者決責四犯者至嚴遣安置其學

規條目屢次更定寬嚴得其中堂宇宿舍飲饌澡浴俱有禁例省親畢姻回籍限期以道里遠近爲差違限者謫選遠方典史有罰充吏者司教之官必選者宿宋訥吳暉等由儒士擢祭酒訥尤推名師歷科進士多出太學而戊辰任亨泰廷對第一太祖召訥褒賞撰題名記立石監門辛未許觀亦如之進士題名碑由此相繼不絕每歲天下按察司選生員年二十以上厚重端秀者送監考留會試下第舉人入監卒業又因諫官關賢奏設爲定例府州縣學歲貢生員各一人翰林考試經書義各一道判語一條中式者一等入國子監二等送中都中者遣還提調教官罰停廩祿於是直省諸士子雲集犖下雲南四川皆有土官生日本琉球暹羅諸國亦皆有官生入監讀書輒加厚賜并給其從人永宣間先後絡繹至成化正德時琉球生猶有至者中都之置國學也自洪武八年至二十六年乃革以其師生并入京師永樂元年始設北京國子監十八年遷都乃以京師國子監爲南京國子監而太學生有南北監之分矣太祖慮武臣子弟但習武事鮮知問學命大都督府選入國學其在鳳陽者卽肄業於中都命韓國公李善長等考定教官生員高下分列班次曹國公李文忠領監事以繩核之嗣後勳臣子弟多入監讀書嘉靖元年令公侯伯未經任事年三十以下者送監讀書尋令已任者亦送監而年少勳戚爭以入學爲榮矣六堂諸生有積分之法司業二員分爲左右各提調三堂凡通四書未通經者居正義崇志廣業一年半以上

文理條暢者升修道誠心又一年半經史兼通文理俱優者乃升率性升至率性乃積分其法孟月試本經義一道仲月試論一道詔誥表內科一道季月試經史策一道判語二條每試文理俱優者與一分理優文劣者與半分紕繆者無分歲內積八分者爲及格與出身不及者仍坐堂肄業如有才學超異者奏請上裁洪武二十六年盡擢監生劉政龍鐔等六十四人爲行省布政按察兩使及參政參議副使僉事等官其一且而重用之至於如此其爲四方大吏者蓋無算也李擴等自文華武英擢御史擴尋改給事中兼齊相府錄事蓋臺諫之選亦出於太學其常調者乃爲府州縣六品以下官初以北方喪亂之餘人鮮知學遣國子生林伯雲等三百六十六人分教各郡後乃推及他省擇其壯歲能文者爲教諭等官太祖雖間行科舉而監生與薦舉人才參用者居多故其時布列中外者太學生最盛一再傳之後進士日益重薦舉遂廢而舉貢日益輕雖積分歷事不改初法南北祭酒陳敬宗李時勉等加意振飭已漸不如其始衆情所趨向專在甲科宦途升沉定於謁選之日監生不獲上第卽奮自鏃礪不能有成積重之勢然也迨開納粟之例則流品漸淆且庶民亦得援生員之例以入監謂之民生亦謂之俊秀而監生益輕於是同處太學而舉貢得爲府佐貳及州縣正官官恩生得選部院府衛司寺小京職尙爲正途而援例監生僅得選州縣佐貳及府首領官其授京職者乃光祿寺上林苑之屬其願就遠方者則以雲貴廣西



及各邊省軍衛有司首領及衛學王府教授之缺用而終身爲異途矣舉人入監始於永樂中會試下第輒令翰林院錄其優者俾入學以俟後科給以教諭之俸是時會試有副榜大抵署教官故令入監者亦食其祿也宣德八年嘗命禮部尚書胡濙與大學士楊士奇楊榮選副榜舉人龍文等二十四人送監進學翰林院三月一考其文與庶吉士同頗示優異後不復另試則取副榜年二十五以上者授教職年未及者或依親或入監讀書既而不拘年齒依親入監者皆聽依親者回籍讀書依親肄業也又有丁憂成婚省親送幼子皆仿依親例限年復班正統中天下教官多缺而舉人厭其卑冷多不願就十三年御史萬節請敕禮部多取副榜以就教職部臣以舉人願依親入監者十之七願就教職者僅十之三但宜各隨所欲却其請不行至成化十三年御史胡璘言天下教官率多歲貢言行文章不足爲人師範請多取舉人選用而罷貢生勿選部議歲貢如其舊而舉人教官仍許會試自後就教者亦漸多矣嘉靖中南北國學皆空虛議盡廢下第舉人入監且立限期以趣之然舉人不願入監者卒不可力强於是生員歲貢之外不得不類舉選貢以充國學矣貢生入監初由生員選擇既命各學歲貢一人故謂之歲貢其例亦屢更洪武二十一年定府州縣學以一二三年爲差二十五年定府學歲二人州學二歲三人縣學歲一人永樂八年定州縣戶不及五里者州歲一人縣間歲一人十九年令歲貢照洪武二十一年例宣德七

年復照洪武二十五年例正統六年更定府學歲一人州學三歲二人縣學間歲一人弘治嘉靖間仍定府學歲二人州學二歲三人縣學歲一人遂爲永制後孔顏孟三氏及京學衛學都司土官川雲貴諸邊會其按年充貢之法亦間有增減云歲貢之始必考學行端莊文理優長者以充之其後但取食廩年深者弘治中南京祭酒章懋言洪永間國子生以數千計今在監科貢共止六百餘人歲貢挨次而升衰遲不振者十常八九舉人坐監又每多時差撥不敷教養罕效近年有增貢之舉而所拔亦挨次之人資格所拘英才多滯乞於常貢外令提學行選貢之法不分廩膳增廣生員通行考選務求學行兼優年富力強累試優等者乃以充貢通計天下之廣約取五六百人以後三五年一行則人才可漸及往年矣乃下部議行之此選貢所由始也選貢多英才入監課試輒居上等撥歷諸司亦有幹局歲貢類老其勢日絀則惟願就教而不願入監嘉靖二十七年祭酒程文德請將廷試歲貢惟留卽選者於部而其餘盡使入監報可歲貢諸生合疏言家貧親老不願入監禮部復請從其所願而盡使舉人入監又從之舉人入監不能如期南京祭酒潘晟至請設重罰以趣其必赴於是舉人選貢歲貢三者迭爲盛衰而國學之盈虛亦靡有定也萬厯中工科郭如心言選貢非祖制其始欲補歲貢之乏其後遂妨歲貢之途請停其選神宗以爲然至崇禎時又嘗行之恩貢者國家有慶典或登極詔書以當貢者充之而其次卽爲歲貢納貢

視例監稍優其實相仿也廕子入監明初因前代任子之制文官一品至七品皆得廕一子以世其祿後乃漸爲限制在京三品以上方得請廕謂之官生出自特恩者不限官品謂之恩生或卽與職事或送監讀書官生必三品京官成化三年從助教李伸言也時給事中李森不可帝諭責其刻薄第令非歷任年久政績顯著者毋得濫敘而已既得廕敘由提學官考送部試如貢生例送入監中時內閣呂原子燾由廕監補中書舍人七年辛卯乞應順天鄉試部請從之給事中芮畿不可帝允畿所請不爲例然其後以廕授舍人者俱得應舉矣嘉隆以後宰相之子有初授卽爲尙寶司丞徑轉本司少卿由光祿太常以躋九列者又有以軍功廕錦衣者往往不由太學其他並入監恩生之始建文元年錄吳雲子黼爲國子生以雲死節雲南也正德十六年定例凡文武官死於忠諫者一子入監其後守土官死節亦皆得廕子矣又弘治十八年定例東宮侍從官講讀年久輔導有功者歿後子孫乞恩禮部奏請上裁正德元年復定其祖父年勞已及三年者一子卽授試中書舍人習字未及三年者一子送監讀書八年復定東宮侍班官三年者一子入監又萬厯十二年定例三品日講官雖未考滿一子入監例監始於景泰元年以邊事孔棘令天下納粟納馬者入監讀書限千人止行四年而罷成化二年南京大饑守臣建議欲令官員軍民子孫納粟送監禮部尙書姚夔言太學乃育才之地近者直省起送四十歲生員及納草納馬者勸以

萬計不勝其濫且使天下以貧爲賢士風日陋帝以爲然爲却守臣之議然其後或遇歲荒或因邊警或大興工作率援往例行之訖不能止此舉貢廢例諸色監生前後始末之大凡也監生歷事始於洪武五年建文時定考覈法上中下三等上者選用中下等仍歷一年再考上等者依上者用中等者不拘品級隨才任用下等者回監讀書永樂五年選監生三十八人隸翰林院習四夷譯書九年辛卯鍾英等五人成進士俱改庶吉士壬辰乙未以後譯書中會試者甚多皆改庶吉士以爲常歷事生成名其蒙恩遇如此仁宗初政中軍都督府奏監生七人吏事勤慎請注選授官帝不許仍令入學由科舉以進他歷事者多不願還監於是通政司引奏六科辦事監生二十人滿日例應還監仍願就科辦事帝復召二十人者諭令進學蓋是時六科給事中多缺諸生覲得之帝察知其意故不授官也宣宗以教官多缺選用監生三百八十人而程富等以都御史顧佐之薦使於各道歷政三月選擇任之所謂試御史也監生撥歷初以入監年月爲先後丁憂省祭有在家延留七八年者比至入監卽得取撥陳敬宗李時勉先後題請一以坐監年月爲淺深其後又以存省京儲依親就學在家年月亦作坐堂之數其患病及他事故始以虛曠論諸生互爭年月資次各援科條成化五年祭酒陳鑑以兩詞具聞乞赦禮部酌中定制爲禮科所駁鑑復奏互爭之乃下部覆議請一一精覈仍計地理遠近水程日月以爲準然文移往來紛錯繁瑣上下

伸縮弊端甚多卒不能畫一也初令監生由廣業升率性始得積分出身天順以前在監十餘年然後撥  
歷諸司歷事三月仍留一年送吏部銓選其兵部清黃及隨御史出巡者則以三年爲率其後以監生積  
滯者多頻減撥歷歲月以疏通之每歲據選優者輒與撥歷有未及一年者弘治八年監生在監者少而  
吏部聽選至萬餘人有十餘年不得官者祭酒林瀚以坐班人少不敷撥歷請開科貢禮部尙書倪岳覆  
奏科舉已有定額不可再增惟請增歲貢人數而定諸司歷事必須日月滿後方與更替使諸生坐監稍  
久選人亦無壅滯及至嘉靖十年監生在監者不及四百人諸司歷事歲額以千計禮部尙書李時引岳  
前議言岳權宜二法一增歲額以足坐班生徒一議差歷以久坐班歲月於是府州縣學以一歲二貢二  
歲三貢一歲一貢爲差行之四歲而止其諸司歷事三月考勤之後仍歷一年其餘寫本一年清黃寫誥  
清軍清匠三年以至出巡等項俱如舊例日月今國學缺人視弘治間更甚請將前件事例參酌舉行並  
從之獨不增貢額未幾復以祭酒許誥提學御史胡時善之請詔增貢額如岳時前議隆萬以後學校積  
弛一切循故事而已崇禎二年從司業倪嘉善言復行積分法八年從祭酒倪元璐言以貢選爲正流撥  
納爲闕流貢選不限以撥期積分歲滿爲率援納則依原定撥歷爲率而歷事不分正雜惟以考定等第  
爲歷期多寡諸司教之政事勿與猥雜差遣滿日校其勤惰開報吏部不率者回監教習時監規頽廢已

久不能振作也凡監生歷事吏部四十一名戶部五十三名禮部十三名大理寺二十八名通政司五名  
行人司四名五軍都督府五十名謂之正歷三月上選滿日增減不定又有諸司寫本戶部十名禮部十  
八名兵部二十名刑部十四名工部八名都察院十四名大理寺通政司俱四名隨御史出巡四十二名  
謂之雜歷一年滿日上選又有諸色辦事清黃一百名寫誥四十名續黃五十名清軍四十名天財庫十  
名初以三年謂之長差後改一年上選承運庫十五名司禮監十六名尙寶司六名六科四十名初作短  
差後亦定一年上選又有隨御史刷卷一百七十八名工部清匠六十名俱事完日上選又有禮部寫民  
情條例七十二名光祿寺刷卷四名修齋八名參表二十名報訃二十名齋俸十二名錦衣衛四名兵部  
查馬冊三十名工部大木廠二十名後府磨算十名御馬監四名天財庫四名正陽門四名崇文宣武朝  
陽東直俱三名阜城西直安定德勝俱二名以半年滿日回監

郡縣之學與太學相維創立自唐始宋置諸路州學官元頗因之其法皆未具迄明天下府州縣衛所皆  
建儒學教官四千二百餘員弟子無算教養之法備矣洪武二年太祖初建國學諭中書省臣曰學校之  
教至元其弊極矣上下之間波頹風靡學校雖設名存實亡兵變以來人習戰爭惟知干戈莫識俎豆朕  
惟治國以教化爲先教化以學校爲本京師雖有太學而天下學校未興宜令郡縣皆立學校延師儒授

生徒講論聖道使人日漸月化以復先王之舊於是大建學校府設教授州設學正縣設教諭各一俱設訓導府四州三縣二生員之數府學四十人州縣以次減十師生月廩食米人六斗有司給以魚肉學官月俸有差生員專治一經以禮樂射御書數設科分教務求實才頑不率者黜之十五年頒學規於國子監又頒禁例十二條於天下鑄立臥碑置明倫堂之左其不遵者以違制論蓋無地而不設之學無人而不納之教庠聲序音重規疊矩無間於下邑荒徼山陬海涯此明代學校之盛唐宋以來所不及也生員雖定數於國初未幾卽命增廣不拘額數宣德中定增廣之額在京府學六十人在外府學四十人州縣以次減十成化中定衛學之例四衛以上軍生八十人三衛以上軍生六十人二衛一衛軍生四十人有司儒學軍生二十人土官子弟許入附近儒學無定額增廣既多於是初設食廩者謂之廩膳生員增廣者謂之增廣生員及其既久人才愈多又於額外增取附於諸生之末謂之附學生員凡初入學者止謂之附學而廩膳增廣以歲科兩試等第高者補充之非廩生久次者不得充歲貢也士子未入學者通謂之童生當大比之年間收一二異敏三場並通者俾與諸生一體入場謂之充場儒士中式卽爲舉人中式仍候提學官歲試合格乃准入學提學官在任三歲兩試諸生先以大等試諸生優劣謂之歲考一等前列者視廩膳生有缺依次充補其次補增廣生一二等皆給賞三等如常四等撻責五等則廩增遞

降一等附生降爲青衣六等黜革繼取一二等爲科舉生員俾應鄉試謂之科考其充補廩增給贖券如歲試其等第仍分爲六而大抵多置三等三等不得應鄉試撻黜者僅百一亦可絕無也生儒應試每舉人一名以科舉三十名爲率舉人屢廣額科舉之數亦日增及求舉者益衆又往往於定額之外加取以收士心凡督學者類然嘉靖十年嘗下沙汰生員之令御史楊宜爭之而止萬厯時張居正當國遂核減天下生員督學官奉行太過童生入學有一州縣僅錄一人者其科舉減殺可推而知也生員入學初由巡按御史布按兩司及府州縣官正統元年始特置提學官專使提督學政南北直隸俱御史各省參用副使僉事景泰元年罷提學官天順六年復設各賜敕諭十六條俾奉行之直省旣設提學有所轄太廣及地最僻遠歲巡所不能及者乃酌其宜口外及各都司衛所土官以屬分巡道員直隸廬鳳淮揚滁徐和以屬江北巡按湖廣衡永郴以屬湖南道辰靖以屬辰沅道廣東瓊州以屬海南道甘肅衛所以屬巡按御史亦皆專敕行事萬厯四十一年南直隸分上下江湖廣分南北始各增提學一員提學之職專督學校不理刑名所受詞訟重者送按察司輕者發有司直隸則轉送巡按御史督撫巡按及布按二司亦不許侵提學職事也明初優禮師儒教官擢給事御史諸生歲貢者易得美官然鉗束亦甚謹太祖時教官考滿兼覈其歲貢生員之數後以歲貢爲學校常例二十六年定學官考課法專以科舉爲殿最九年



任滿核其中式舉人府九人州六人縣三人者爲最其教官又考通經卽與陞遷舉人少者爲平等卽考通經亦不遷舉人至少及全無者爲殿又考不通經則黜降其待教官之嚴如此生員入學十年學無所成者及有大過者俱送部充吏追奪廩糧至正統十四年申明其制而稍更之受贓姦盜冒籍宿娼居喪娶妻妾所犯事理重者直隸發充國子監膳夫各省發充附近儒學膳夫齋夫滿日爲民俱追廩米犯輕充吏者不追廩米其待諸生之嚴又如此其後教官之黜降生員之充發皆廢格不行卽臥碑亦具文矣諸生上者中式次者廩生年久充貢或選拔爲貢生其累試不第年踰五十願告退閒者給與冠帶仍復其身其後有納粟馬捐監之例則諸生又有援例而出學者矣提學官歲試校文之外令教官舉諸生行優劣者一二人賞黜之以爲勸懲此其大較也諸生應試之文通謂之舉業四書義一道二百字以上經義一道三百字以上取書旨明哲而已不尙華采也其後標新領異益漓厥初萬厯十五年禮部言唐文初尙靡麗而士趨浮薄宋文初尙鉤棘而人習險譎國初舉業有用六經語者其後引左傳國語矣又引史記漢書矣史記窮而用六子六子窮而用百家甚至佛經道藏摘而用之流弊安窮弘治正德嘉靖初年中式文字純正典雅選其尤者刊布學宮俾知趨向因取中式文字一百十餘篇奏請刊布以爲準則時方崇尚新奇厭薄先民矩矱以士子所好爲趨不遵上指也啟禎之間文體益變以出入經史百

氏爲高而恣轍者亦多矣雖數申詭異險僻之禁勢重難返卒不能從論者以明舉業文字比唐人之詩國初比初唐成弘正嘉比盛唐隆萬比中唐啟禎比晚唐云自儒學外又有宗學社學武學宗學之設世子長子衆子將軍中尉年未弱冠者俱與焉其師於王府長史紀善伴讀教授等官擇學行優長者除授萬麻中定宗室子十歲以上俱入宗學若宗子衆多分置數師或於宗室中推舉一人爲宗正領其事令學生誦習皇明祖訓孝順事實爲善陰鷲諸書而四書五經通鑑性理亦相兼誦讀尋復增宗副二人子弟入學者每歲就提學官考試衣冠一如生員已復令一體鄉試許得中式其後宗學浸多頗有致身兩榜起家翰林者社學自洪武八年延師以教民間子弟兼讀御製大誥及本朝律令正統時許補儒學生員弘治十七年令各府州縣建立社學選擇明師民間幼童十五以下者送入讀書講習冠婚喪祭之禮然其法久廢浸不舉行武學之設自洪武時置大監等衛儒學教武官子弟正統中成國公朱勇奏選購勇都指揮等官五十一員熟嫻騎射幼官一百員始命兩京建武學以訓誨之尋命都司衛所應襲子弟年十歲以上者提學官選送武學讀書無武學者送衛學或附近儒學成化中敕所司歲終考試入學武生十年以上學無可取者追廩還官送營操練弘治中從兵部尙書馬文升言刊五經七書分散兩京武學及應襲舍人嘉靖中移京城東武學於皇城西隅廢寺俾大小武官子弟及勳爵新襲者肄業其中用

文武重臣教習萬厯中兵部言武庫司專設主事一員管理武學近者裁去請復專設教官升堂都指揮執弟子禮請遵會典例立爲程式詔皆如議崇禎十年令天下府州縣學皆設武學生員提學官一體考取已又申會典事例簿記功能有不次擢用黜退送操獎罰激厲之法時事方棘無所益也

明史卷六十九終

敕修  
總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

選舉二

科目者沿唐宋之舊而稍變其試士之法專取四子書及易書詩春秋禮記五經命題試士蓋太祖與劉基所定其文略仿宋經義然代古人語氣爲之體用排偶謂之八股通謂之制義三年大比以諸生試之直省曰鄉試中式者爲舉人次年以舉人試之京師曰會試中式者天子親策於廷曰廷試亦曰殿試分一二三甲以爲名第之次一甲止三人曰狀元榜眼探花賜進士及第二甲若干人賜進士出身三甲若干人賜同進士出身狀元榜眼探花之名制所定也而士大夫又通以鄉試第一爲解元會試第一爲會元二三甲第一爲傳臚云子午卯酉年鄉試辰戌丑未年會試鄉試以八月會試以二月皆初九日爲第一場又三日爲第二場又三日爲第三場初設科舉時初場試經義二道四書義一道二場論一道三場策一道中式後十日復以騎射書算律五事試之後頒科舉定式初場試四書義三道經義四道四書主朱子集註易主程傳朱子本義書主蔡氏傳及古註疏詩主朱子集傳春秋主左氏公羊穀梁三傳及胡

安國張洽傳禮記主古註疏永樂間頒四書五經大全廢註疏不用其後春秋亦不用張洽傳禮記止用陳澹集說二場試論一道判五道詔誥表內科一道三場試經史時務策五道廷試以三月朔鄉試直隸於京府各省於布政司會試於禮部主考鄉會試俱二人同考鄉試四人會試八人提調一人在內京官在外布政司官會試禮部官監試二人在內御史在外按察司官會試御史供給收掌試卷彌封謄錄對讀受卷及巡綽監門搜檢懷挾俱有定員各執其事舉子則國子生及府州縣學生員之學成者儒士之未仕者官之未入流者皆由有司申舉性資敦厚文行可稱者應之其學校訓導專教生徒及罷閑官吏倡優之家與居父母喪者俱不許入試試卷之首書三代姓名及其籍貫年甲所習本經所司印記試日入場講問代冒者有禁晚未納卷給燭三枝文字中迴避御名廟號及不許自序門地彌封編號作三合字考試者用墨請之墨卷謄錄用硃謂之硃卷試士之所謂之貢院諸生宿舍謂之號房人一軍守之謂之號軍試官入院輒封鑰內外門戶在外提調監試等謂之外籬官在內主考同考謂之內籬官廷試用翰林及朝臣文學之優者爲讀卷官共閱對策擬定名次候臨軒或如所擬或有所更定傳制唱第狀元授修撰榜眼探花授編修二三甲考選庶吉士者皆爲翰林官其他或授給事御史主事書行人評事太常國子博士或授府推官知州知縣等官舉人貢生不第入監而選者或授小京職或授府佐及州縣

正官或授教職此明代取士之大略也終明之世右文左武然亦嘗設武科以收之可得而附列也  
太祖起事首羅賢才吳元年設文武二科取士之令使有司勸諭民間秀士及智勇之人以時勉學俟開  
舉之歲充貢京師洪武三年詔曰漢唐及宋取士各有定制然但貴文學而不求德藝之全前元待士甚  
優而權豪勢要每納奔競之人夤緣阿附輒竊仕祿其懷材抱道者恥與並進甘隱山林而不出風俗之  
弊一至於此自今年八月始特設科舉務取經明行修博通古今名實相稱者朕將親策於廷第其高下  
而任之以官使中外文臣皆由科舉而進非科舉者毋得與官於是京師行省各舉鄉試直隸貢額百人  
河南山東山西陝西北平福建江西浙江湖廣皆四十人廣西廣東皆二十五人才多或不及者不拘額  
數高麗安南占城詔許其國士子於本國鄉試貢赴京師明年會試取中一百二十名帝親製策問試於  
奉天殿擢吳伯宗第一午門外張掛黃榜奉天殿宣諭賜宴中書省授伯宗爲禮部員外郎餘以次授官  
有差時以天下初定令各行省連試三年且以官多缺員舉人俱免會試赴京聽選又擢其年少俊異者  
張唯王輝等爲翰林院編修蕭韶爲祕書監直長令入禁中文華堂肄業太子贊善大夫宋濂等爲之師  
帝聽政之暇輒幸堂中評其文字優劣日給光祿酒饌每食皇太子親王送爲之主賜白金弓矢鞍馬及  
冬夏衣寵遇之甚厚旣而謂所取多後生少年能以所學措諸行事者寡乃但令有司察舉賢才而罷科

舉不用至十五年復設十七年始定科舉之式命禮部頒行各省後遂以爲永制而薦舉漸輕久且廢不用矣十八年廷試擢一甲進士丁顯等爲翰林院修撰二甲馬京等爲編修吳文爲檢討進士之入翰林自此始也使進士觀政於諸司其在翰林承敕監等衙門者曰庶吉士進士之爲庶吉士亦自此始也其在六部都察院通政司大理寺等衙門者仍稱進士觀政進士之名亦自此始也其後試額有增減條例有變更考官有內外輕重闕事有是非得失其細者勿論其有關於國是者不可無述也鄉試之額洪武十七年詔不拘額數從寬充貢洪熙元年始有定額其後漸增至正統間南北直隸定以百名江西六十五名他省又自五而殺至雲南二十名爲最少嘉靖間增至四十而貴州亦二十名慶厯啟禎間兩直隸益增至一百三十餘名他省漸增無出百名者交趾初開以十名爲額迨棄其地乃止會試之額國初無定少至三十二人其多者若洪武乙丑永樂丙戌至四百七十二人其後或百名或二百名或二百五十名或三百五十名增損不一皆臨期奏請定奪至成化乙未而後率取三百名有因題請及恩詔而廣五十名或百名者非恆制也初制禮闈取士不分南北自洪武丁丑考官劉三吾自信蹈所取宋琮等五十二人皆南士三月廷試擢陳郊爲第一帝怒所取之偏命侍讀張信等十二人覆閱郊亦與焉帝猶怒不已悉誅信蹈及信郊等戊三吾於邊親自閱卷取任伯安等六十一人六月復廷試以韓克忠爲第一皆



北士也然詔永樂間未嘗分地而取洪熙元年仁宗命楊士奇等定取士之額南人十六北人十四宣德  
正統間分爲南北中卷以百人爲率則南取五十五名北取三十五名中取十名景泰初詔書遵永樂間  
例二年辛未禮部方奉行而給事中李侃爭之言部臣欲專以文詞多取南人刑部侍郎羅綺亦助侃言  
事下禮部覆奏臣等奉詔書非私請也景帝命遵詔書不從侃議未幾給事中徐廷章復請依正統間例  
五年甲戌會試禮部奏請裁定於是復從廷章言分南北中卷南卷應天及蘇松諸府浙江江西福建湖  
廣廣東北卷順天山東山西河南陝西中卷四川廣西雲南貴州及鳳陽廬州二府滁徐和三州也成化  
二十二年萬安當國周洪謨爲禮部尙書皆四川人乃因布政使潘稹之請南北各減二名以益於中弘  
治二年復從舊制嗣後相沿不改惟正德三年給事中趙鐸承劉瑾指請廣河南陝西山東西鄉試之額  
乃增陝西爲百河南爲九十五山東西俱九十而以會試分南北中卷爲不均乃增四川額十名并入南  
卷其餘并入北卷南北均取一百五十名蓋瑾陝西人而閣臣焦芳河南人票旨相附和各徇其私瑾芳  
敗旋復其舊初制兩京鄉試主考皆用翰林而各省考官先期於儒官儒士內聘明經公正者爲之故有  
不在朝列累秉文衡者景泰三年令布按二司同巡按御史推舉見任教官年五十以下三十以上文學  
廉謹者聘充考官於是教官主試遂爲定例其後有司徇私聘取或非其人監臨官又往往侵奪其職掌

成化十五年御史許進請各省俱視兩京例特命翰林主考帝諭禮部嚴飭私弊而不從其請屢戒外籛  
官毋奪主考權考官不當則舉主連坐又令提學考定教官等第以備聘取然相沿既久積習難移弘治  
十四年掌國子監謝鐸言考官皆御史方面所辟召職分既卑聽其指使以外籛官預定去取名爲防閑  
實則關節而科舉之法壞矣乞敕兩京大臣各舉部屬等官素有文望者每省差二員主考庶幾前弊可  
革時未能從嘉靖七年用兵部侍郎張璠言各省主試皆遣京官或進士每省二人馳往初兩京房考亦  
皆取教職至是命各加科部官一員闕兩科兩京房考復罷科部勿遣而各省主考亦不遣京官至萬曆  
十一年詔定科場事宜部議復舉張璠之說言彼時因主考與監臨官禮節小嫌故行止二科而罷今宜  
仍遣廷臣由是浙江江西福建湖廣皆用編修檢討他省用科部官而同考亦多用甲科教職僅取一二  
而已蓋自嘉靖二十五年從給事中萬虞愷言各省鄉試精聘教官不足則聘外省推官知縣以益之四  
十三年又從南京御史奏兩京同考用京官進士易詩書各二人春秋禮記各一人其餘乃多用教官萬  
曆四年復議兩京同考教官衰老者遣回北京取足於觀政進士候補甲科南京於附近知縣推官取用  
至是教官益絀初制會試同考八人三人用翰林五人用教職景泰五年從禮部尙書胡濙請俱用翰林  
部曹其後房考漸增至正德六年命用十七人翰林十一人科部各三人分詩經房五易經書經各四春

秋禮記各二嘉靖十一年禮部尙書夏言論科場三事其一言會試同考例用講讀十一人今講讀止十一人當盡入場方足供事乞於部科再簡三四人以補翰林不足之數世宗命如所請然偶一行之轍如其舊萬厯十一年以易卷多減書之一以增於易十四年書卷復多乃增翰林一人以補書之缺至四十四年用給事中余懋孳奏詩易各增一房共爲二十房翰林十二人科部各四人至明末不變洪武初賜諸進士宴於中書省宣德五年賜宴於中軍都督府八年賜宴於禮部自是遂著爲令庶吉士之選自洪武乙丑擇進士爲之不專屬於翰林也永樂二年旣授一甲三人曾棨周述周孟簡等官復命於第二甲擇文學優等楊相等五十人及善書者湯流等十人俱爲翰林院庶吉士庶吉士遂專屬翰林矣復命學士解縉等選才資英敏者就學文淵閣縉等選修撰聚編修述孟簡庶吉士相等共二十八人以應二十八宿之數庶吉士周忱自陳少年願學帝喜而俞之增忱爲二十九人司禮監月給筆墨紙光祿給朝暮饌禮部月給膏燭鈔人三錠工部擇近第宅居之帝時至館召試五日一休沐必使內臣隨行且給校尉賜從是年所選王英王直段民周忱陳敬宗李時勉等名傳後世者不下十餘人其後每科所選多寡無定額永樂十三年乙未選六十二人而宣德二年丁未止邢恭一人以其在翰林院習四夷譯書久他人俱不得與也弘治四年給事中涂旦以累科不選庶吉士請循祖制行之大學士徐溥言自永樂二年以

來或間科一選或連科屢選或數科不選或合三科同選初無定限或內閣自選或禮部選送或會禮部同選或限年歲或拘地方或採譽望或就廷試卷中查取或別出題考試亦無定制自古帝王儲才館閣以教養之本朝所以儲養之者自及第進士之外止有庶吉士一途而或選或否且有才者未必皆選所選者未必皆才若更拘地方年歲則是已成之才又多棄而不用也請自今以後立爲定制一次開科一次選用令新進士錄平日所作論策詩賦序記等文字限十五篇以上呈之禮部送翰林考訂少年有新作五篇亦許投試翰林院擇其詞藻文理可取者按號行取禮部以糊名試卷偕閣臣出題考試於東閣試卷與所投之文相稱卽收預選每科所選不過二十人每選所留不過三五輩將來成就必有足賴者孝宗從其請命內閣同吏禮二部考選以爲常自嘉靖癸未至萬曆庚辰中間有九科不選神宗嘗命問科一選禮部侍郎吳道南持不可崇禎甲戌丁丑復不選餘悉遵例其與選者謂之館選以翰詹官高資深者一人課之謂之教習三年學成優者留翰林爲編修檢討次者出爲給事御史謂之散館與常調官待選者體格殊異成祖初年內閣七人非翰林者居其半翰林纂修亦諸色參用自天順二年李賢奏定纂修專選進士由是非進士不入翰林非翰林不入內閣南北禮部尙書侍郎及吏部右侍郎非翰林不任而庶吉士始進之時已羣目爲儲相通計明一代宰輔一百七十餘人由翰林者十九蓋科舉視前代

爲盛翰林之盛則前代所絕無也輔臣子弟國初少登第者景泰七年陳循王文以其子北闈下第大攻主考劉儼臺省譁然論其失帝勉徇二人意命其子一體會試而心薄之正德三年焦芳子黃中會試中式芳引嫌不讀卷而黃中居二甲之首芳意猶不慊至降調諸翰林以泄其忿六年楊廷和子慎廷試第一廷和時亦引嫌不讀卷慎以高才及第人無訾之者嘉靖二十三年廷試翟鑾子汝儉汝孝俱在試中世宗疑二人濫首甲抑第一爲第三以第三置三甲及折卷而所擬第三者果汝孝也帝大疑之給事中王爰王堯日因劾會試考官少詹事江汝璧及諸房考朋私通賄且追論順天鄉試考官秦鳴夏浦應麒阿附鑾罪乃下汝璧等鎮撫司獄獄具詔杖汝璧鳴夏應麒並革職閑住而勒鑾父子爲民神宗初張居正當國二年甲戌其子禮闈下第居正不悅遂不選庶吉士至五年其子嗣修遂以一甲第二人及第至八年其子懋修以一甲第一人及第而次輔呂調陽張四維申時行之子亦皆先後成進士御史魏允貞疏陳時弊言輔臣子不宜中式帝爲謫允貞十六年右庶子黃洪憲主順天試王錫爵子衡爲榜首禮部郎中高桂論劾舉人李鴻等并及衡言自故相子一時並進而大臣之子遂無見信於天下者今輔臣錫爵子衡素號多才青雲不難自致而人猶疑信相半宜一體覆試以明大臣之心跡錫爵怒甚具奏申辨語過激刑部主事饒伸復抗疏論之帝爲謫桂於外下伸獄削其官覆試所舉舉人仍以衡第一且無一

人黜者二十年會試李鴻中式鴻大學士申時行婿也榜將發房考給事中某持之以爲宰相之婿不當中主考官張位使十八房考官閱皆言文字可取而給事猶持不可位怒曰考試不憑文字將何取衷我請職其咎鴻乃獲收王衡旣被論當錫爵在位不復試禮闈二十九年乃以一甲第二人及第自後輔臣當國其子亦無登第者矣科場弊竇旣多議論頻數自太祖重罪劉三吾等永宣間大抵帖服陳循王文之齷劉儼也高穀持之儼亦無恙弘治十二年會試大學士李東陽少詹事程敏政爲考官給事中華景劾敏政鬻題與舉人唐寅徐泰乃命東陽獨閱文字給事中林廷玉復攻敏政可疑者六事敏政謫官寅泰皆斥譴寅江左才士戊午南闈第一論者多惜之嘉靖十六年禮部尙書嚴嵩連摘應天廣東試錄語激世宗怒應天主考及廣東巡按御史俱逮問二十二年帝手批山東試錄譏訕逮御史葉經杖死闕下布政以下皆遠謫亦嵩所中傷也四十年應天主考中允無錫吳情取同邑十三人被劾與副考胡杰俱謫外南畿翰林遂不得典應天試矣萬厯四年順天主考高汝愚中張居正子嗣修懋修及居正黨吏部侍郎王篆子之衡之鼎居正旣死御史丁此呂追論其弊且言汝愚以舜亦以命禹爲試題殆以禪受呵居正當國者惡此呂謫於外而議者多不直汝愚三十八年會試庶子湯賓尹爲同考官與各房互換闈卷共十八人明年御史孫居相劾賓尹私韓敬其互換皆以敬故時吏部方考察尙書孫丕揚因賓賓尹

敬於察典撤頗有文名衆亦惜敬而以其黨謂其宜斥也四十四年會試吳江沈同和第一同里趙曠陽第六同和素不能文文多出曠陽手事發覺兩人並謫戊辰啟四年山東江西湖廣福建考官皆以策問譏刺降諭切責初命貶謫既而褫革江西主考丁乾學至下獄擬罪蓋觸魏忠賢怒也先是二年辛酉中允錢謙益典試浙江所取舉人錢千秋卷七篇大結跡涉關節榜後爲人所訐謙益自檢舉千秋謫戍未幾赦還崇禎二年會推閣臣謙益以禮部侍郎與焉而尙書溫體仁不與體仁摘千秋事出疏攻謙益謙益由此罷遂終明世不復起其他指摘科場事者前後非一往往北闈爲甚他省次之其賄買鑽營懷挾倩代割卷傳遞頂名冒籍弊端百出不可窮究而關節爲甚事屬曖昧或快恩讐報復蓋亦有之其他小小得失無足道也歷科事跡稍異者永樂初兵革倉猝元年癸未始令各省鄉試二年甲申會試以事變不循午未之舊七年己丑會試中陳燧等九十五人成祖方北征皇太子令送國子監進學俟車駕還京廷試九年辛卯始擢蕭時中第一宣德五年庚戌帝臨軒發策畢退御武英殿謂翰林儒臣曰取士不尙虛文有若劉蕡蘇轍輩直言抗論朕當顯庸之乃賦策士歌以示讀卷官顧所擢第一人林震亦無所表見也八年癸丑廷試第一人曹鼐由江西泰和典史會試中式正統七年壬戌刑部吏南昱公陵驛丞鄭溫亦皆中式十年乙丑會試廷試第一皆商輅潯安人宣宗末年乙卯浙榜第一人三試皆第一士

子艷稱爲三元明代惟輅一人而已廷試讀卷盡用甲科而是年兵部尙書徐晞戶部侍郎余亨乃吏員  
天順元年丁丑讀卷左都御史楊善乃譯字生時猶未甚拘流品也迨後無雜流會試及爲讀卷官者矣  
七年癸未試日場屋火死者九十餘人俱贈進士出身改期八月會試明年甲申三月始廷試時英宗已  
崩憲宗以大喪未踰歲御西角門策之正德三年戊辰太監劉瑾錄五十人姓名以示主司因廣五十名  
之額十五年庚辰武宗南巡未及廷試次年世宗卽位五月御西角門策之擢楊維聰第一而張璁卽是  
榜進士也六七年間當國用事權侂人主矣嘉靖八年己丑帝親閱廷試卷手批一甲羅洪先楊名歐陽  
德二甲唐順之陳東任瀚六人對策各加評獎大學士楊一清等遂選順之東瀚及胡經等共二十人爲  
庶吉士疏其名上請命官教習忽降諭云吉士之選祖宗舊制誠善邇來大臣徇私選取市恩立黨於國  
無益自今不必選留唐順之等一切除授吏禮二部及翰林院會議以聞尙書方獻夫等遂阿旨謂順之  
等不必留并限翰林之額侍讀侍講修撰各三員編修檢討各六員著爲令蓋順之等出張璁霍韜門而  
心以大禮之議爲非不肯趨附璁心惡之璁又方欲中一清故以立黨之說進而故事由此廢迨十一年  
壬辰己罷館選至九月復舉行之十四年乙未帝親製策問手自批閱擢韓應龍第一降諭論一甲三人  
及二甲第一名次前後之由禮部因以聖諭列登科錄之首而十二人對策俱以次刊刻二十年辛丑考



選庶吉士題文曰原政詩曰讀大明律皆欽降也四十四年乙丑廷試帝始不御殿神宗時御殿益稀矣天啟二年壬戌會試命大學士何宗彥朱國祚爲主考官故事閣臣典試翰詹一人副之時已推禮部尙書顧秉謙特旨命國祚國祚疏辭帝曰今歲朕首科特用二輔臣以光重典卿不必辭嗣後二輔臣典試以爲常是年開宗科朱慎鋆成進士從宗彥國祚請卽授中書舍人崇禎四年朱統飾成進士初選庶吉士吏部以統飾宗室不宜官禁近請改中書舍人統飾疏爭命仍授庶吉士七年甲戌知貢舉禮部侍郎林鉉言舉人顏茂猷文兼五經作二十三義帝念其該洽許送內簾茂猷中副榜特賜進士以其名另爲一行刻於試錄第一名之前五經中式者自此接跡矣

武科自吳元年定洪武二十年僉禮部請立武學用武舉武臣子弟於各直省應試天順八年令天下文武官舉通曉兵法謀勇出衆者各省撫按三司直隸巡按御史考試中式者兵部同總兵官於帥府試策略教場試弓馬答策二道騎中四矢步中二矢以上者爲中式騎步所中半焉者次之成化十四年從太監汪直請設武科鄉會試悉視文科例弘治六年定武舉六歲一行先策略後弓馬策不中者不許騎射十七年改定三年一試出榜賜宴正德十四年定初場試馬上箭以三十五步爲則二場試步下箭以八十步爲則三場試策一道子午卯酉年鄉試嘉靖初定制各省應武舉者巡按御史於十月考試兩京武

學於兵部選取俱送兵部次年四月會試翰林二員爲考試官給事中曹四員爲同考鄉會場期俱於  
月之初九十二十五起送考驗監試張榜大率仿文闈而減殺之其後倏罷倏復又倣文闈南北卷例分  
邊方腹裏每十名邊六腹四以爲常萬厯三十八年定會試之額取中進士以百名爲率其後有奉詔增  
三十名者非常制也穆神二宗時議者嘗言武科當以技勇爲重萬厯之末科臣又請特設將材武科初  
場試馬步箭及鎗刀劍戟拳搏擊刺等法二場試營陣地雷火藥戰車等項三場各就其兵法天文地理  
所熟知者言之報可而未行也崇禎四年武會試榜發論者大譁帝命中允方逢年倪元璐再試取翁英  
等百二十人逢年元璐以時方需才奏請殿試傳臚悉如文例乃賜王來聘等及第出身有差武舉殿試  
自此始也十四年諭各部臣特開奇謀異勇科詔下無應者

總裁官總理事務 經筵講官少保兼太子太保保和殿大學士兼管吏部戶部尙書事加六級張廷玉等奉  
敕修

選舉三

太祖下金陵辟儒士范祖幹葉儀克婺州召儒士許元胡翰等日講經史治道克處州徵耆儒宋濂劉基  
章溢葉琛至建康創禮賢館處之以濂爲江南等處儒學提舉溢琛爲營田僉事基留帷幄預謀議甲辰  
三月敕中書省曰今土宇日廣文武並用卓犖奇偉之才世豈無之或隱於山林或藏於士伍非在上者  
開導引拔之無以自見自今有能上書陳言敷宣治道武略出衆者參軍及都督府具以名聞或不能文  
章而識見可取許詣闕面陳其事郡縣官年五十以上者雖練達政事而精力旣衰宜令有司選民間俊  
秀年二十五以上資性明敏有學識才幹者辟赴中書與年老者參用之十年以後老者休致而少者已  
熟於事如此則人才不乏而官使得人其下有司宣布此意於是州縣歲舉賢才及武勇謀略通曉天文  
之士問及兼通書律者旣而嚴選舉之禁有濫舉者逮治之吳元年遣起居注吳林魏觀等以幣帛求遺  
賢於四方洪武元年徵天下賢才至京授以守令其年冬又遣文元吉詹同魏觀吳輔趙壽等分行天下

訪求賢才各賜白金而遣之三年諭廷臣曰大部總領天下之務非學問博洽才德兼美之士不足以居之慮有隱居山林或屈在下僚者其令有司悉心推訪六年復下詔曰賢才國之寶也古聖王勞於求賢若高宗之於傳說文王之於呂尙彼二君者豈其智不足哉顧皇皇於版築鼓刀之徒者蓋賢才不備不足以爲治鴻鵠之能遠舉者爲其有羽翼也蛟龍之能騰躍者爲其有鱗鬣也人君之能致治者爲其有賢人而爲之輔也山林之士德行文藝可稱者有司采舉備禮遣送至京朕將任用之以圖至治是年遂罷科舉別令有司察舉賢才以德行爲本而文藝次之其目曰聰明正直曰賢良方正曰孝弟力田曰儒士曰孝廉曰秀才曰人才曰耆民皆禮送京師不次擢用而各省貢生亦由太學以進於是罷科舉者十年至十七年始復行科舉而薦舉之法並行不廢時中外大小臣工皆得推舉下至倉庫司局諸雜流亦令舉文學才幹之士其被薦而至者又令轉薦以故山林巖穴草茅窮居無不獲自達於上由布衣而登大僚者不可勝數耆儒鮑恂余詮全思誠張長年輩年九十餘徵至京卽命爲文華殿大學士儒士王本杜敷趙民望吳源特置爲四輔官兼太子賓客賢良郭有道秀才范敏曾泰稅戶人才鄭沂儒士趙翥起家爲尙書儒士張子源張宗德爲侍郎耆儒劉堦關賢爲副都御史明經張文通阮仲志爲僉都御史人材赫從道爲大理少卿孝廉李德爲府尹儒士吳顛爲祭酒賢良樂世英徐景昇李延中儒士張璣王廉

爲布政使學弟李好誠聶士舉賢良蔣安素薛正言張端文學宋亮爲參政儒士鄧孔麟王德常黃桐生  
賢良余應舉馬衛許安范孟宗何德忠孫仲賢王福王清聰明張大亨金思存爲參議凡其顯擢者如此  
其以漸而躋貴仕者又無算也嘗諭禮部經明行修練達時務之士徵至京師年六十以上七十以下者  
置翰林以備顧問四十以上六十以下者於六部及布按兩司用之蓋是時仕進無他途故往往多驟貴  
者而吏部奏薦舉當除官者多至二千七百餘人其少者亦至一千九百餘人又傳富戶耆民皆得進見  
奏對稱旨輒予美官而會稽僧郭傳由宋濂薦擢爲翰林應奉此皆可得而考者也洎科舉復設兩途並  
用亦未嘗畸重輕建文永樂間薦舉起家猶有內授翰林外授藩司者而楊士奇以處士陳濟以布衣遽  
命爲太祖實錄總裁官其不拘資格又如此自後科舉日重薦舉日益輕能文之士率由場屋進以爲榮  
有司雖數奉求賢之詔而人才旣衰第應故事而已宣宗嘗出御製猗蘭操及招隱詩賜諸大臣以示風  
勵實應者寡人情亦共厭薄正統元年行在吏部言宣德間嘗詔天下布按二司及府州縣官舉賢良方  
正各一人迄今尙舉未已宜止之帝以朝廷求賢不可止自今來者六部都察院翰林院堂上官考試中  
者錄用不中者黜之薦舉者益稀矣天順元年詔處士中有學貫天人才堪經濟高蹈不求聞達者所司  
具實奏聞御史陳迹奏崇仁儒士吳與弼學行命江西巡撫韓雍禮聘赴京至則召見命爲左諭德與弼

辭疾不受帝又命李賢引見文華殿從容顧問曰重卿學行特授宮僚煩輔太子與弼固辭賜宴文華殿命賢侍宴降敕褒賚遣行人送歸蓋殊典也至成化十九年廣東舉人陳獻章被薦授翰林院檢討而聽其歸典禮大減矣其後弘治中浙江儒士潘辰嘉靖中南直隸生員文徵明永嘉儒士葉幼學皆以薦授翰林院待詔萬厯中湖廣舉人瞿九思亦授待詔江西舉人劉元卿授國子監博士江西處士章潢僅遙授順天府訓導而直隸處士陳繼儒四川舉人楊思心等雖皆被薦下之禮部而已崇禎九年吏部復議舉孝廉言祖宗朝皆偶一行之未有定制今宜通行直省加意物色果有孝廉懷才抱德經明行修之士由司道以達巡按覆核疏聞驗試錄用於時薦舉紛紛遍天下然皆授以殘破郡縣卒無大效至十七年令豫楚被陷州縣員缺悉聽撫按官辟選更置不拘科目雜流生員人等此則皇遽求賢非承平時舉士之典至若正德四年浙江大吏薦餘姚周禮徐子元許龍上虞徐文彪劉瑾以四人皆謝遷同鄉而草詔出於劉健矯旨下禮等鎮撫司謫戍邊衛勒布政司林符邵寶李贊及參政參議府縣官十九人罰米二百石并削健遷官且著令餘姚人不得選京官此則因薦舉而得禍者又其變也

任官之事文歸吏部武歸兵部而吏部職掌尤重吏部凡四司而文選掌銓選考功掌考察其職尤要選人自進士舉人貢生外有官生恩生功生監生儒士又有吏員承差知印書算篆書譯字通事諸雜流進

士爲一途舉貢等爲一途吏員等爲一途所爲三途並用也京官六部主事、中書行人評事、博士、外官知州、推官、知縣、由進士選，外官推官、知縣及學官由舉人貢生選，京官五府六部首領官、通政司、太常、光祿寺詹事府屬官、由官蔭生選，州縣佐貳、都布按三司首領官、由監生選，外府外衛鹽運司首領官、中外雜職入流未入流官、由吏員承差等選，此其大凡也。其參差互異者，可推而知也。初授者曰聽選，陞任者曰陞選。選人之法，每年吏部六考六選，凡引選六類，選六遠，方選二聽選，及考定陞降者，雙月大選，其序定於單月，改授改降丁憂候補者，單月急選，其揀選三歲舉行，舉人乞恩歲貢就教無定期，凡陞選必滿考。若員缺應補不待滿者，曰推陞。內閣大學士、吏部尚書、由廷推，或奉特旨侍郎以下及祭酒、吏部會同三品以上廷推，太常卿以下部推，通參以下吏部於弘政門會選，詹事由內閣各衙門由各掌印在外官惟督撫廷推，九卿共之。吏部主之，布按員缺三品以上官會舉，監司則序遷，其防邊兵備等率由選擇保舉，付以敕書邊府及佐貳亦付敕，薊遼之昌平、薊州等山西之大同、河曲、代州等陝西之固原、靜寧等六十有一處俱爲邊缺，尤慎選，除有功者越次擢，誤封疆者罪無赦，內地監司率序遷，其後亦多超遷，不拘次有一歲中四五遷由僉事至參政者，監司多額外添設守巡之外，往往別立數銜不能畫一也。在外府州縣正佐在內大小九卿之屬員皆常選官，選授遷除一切由吏部，其初用拈鬮法，至萬厯間變爲掣籤二

十九年文選員外郎倪斯蕙條上銓政十八事其一曰議掣籤尙書李戴擬行報可孫丕揚踵而行之後雖有譏其失者終明世不復更也洪武間定南北更調之制南人官北北人官南其後官制漸定自學官外不得官本省亦不限南北也初太祖嘗御奉天門選官且諭毋拘資格選人有卽授侍郎者而監司最多進士監生及薦舉者參錯互用給事御史亦初授陞遷各半永宣以後漸循資格而臺省尙多初授至弘正後資格始拘舉貢雖與進士並稱正途而軒輊低昂不啻霄壤隆慶中大學士高拱言國初舉人躋八座爲名臣者甚衆後乃進士偏重而舉人甚輕於至今極矣請自授官以後惟考政績不問其出身然勢已積重不能復返崇禎間言者數申三途並用之說間推一二舉人如陳新甲孫元化者置之要地卒以傾覆用武舉陳啟新爲給事亦聲名潰裂於是朝端又以爲不若循資格而甲榜之誤國者亦正不少也給事中御史謂之科道科五十員道百二十員明初至天順成化間進士舉貢監生皆得選補其遷擢者推官知縣而外或由學官其後監生及新科進士皆不得與或庶吉士改授或取內外科目出身三年考滿者考選內則兩京五部主事中行評博國子監博士助教等外則推官知縣自推知入者謂之行取其有特薦則俸雖未滿亦得與焉考選視科道缺若干多寡無定額其授職吏部都察院協同注擬給事皆實補御史必試職一年始實授惟庶吉士否嘉靖萬厯間常令部曹不許改科道後亦間行之舉貢推



知例得與進士同考選大抵僅四之一嘉靖間嘗令監生與選已罷不行萬曆中百度廢弛二十五年臺省新舊人數不足當額設之半三十六年科止數人道止二人南科以一人攝九篆者二歲南道亦止一人內臺既空外差亦缺淮揚蘇松江西陝西廣東西宣大甘肅遼東巡按及陝西之茶馬河東之鹽課缺差至數年給事中陳治則請急考選不報三十九年考選疏上復留中不下推知擬擢臺省候命闕下去留不得自如四十六年掌河南道御史王象恆復言十三道御史在班行者止八人大科給事中止五人而冊封典試諸差及內外巡方報滿告病求代者踵至當亟議變通之法大學士方從哲亦言考選諸臣守候六載艱苦備嘗吏部議咨禮部都察院按次題差蓋權宜之術不若特允部推令諸臣受命供職足存政體卒皆不報至光宗初前後考選之疏俱下而臺省一旦森列矣考選之例優者授給事中次者御史又次者以部曹用雖臨時考試而先期有訪單出於九卿臺省諸臣之手往往據以爲高下崇禎三年吏部考選畢奏應擢給事御史若干人而以中書二人訪單可否互異具疏題請帝責其推諉令更確議而不責訪單之非體也京官非進士不得考選推知則舉貢皆行取然天下守令進士十三舉貢十七推知行取則進士十九舉貢纔十一舉貢所得又大率有臺無省多南少北御史王道純以爲言帝謂用人當論才本不合拘資格下所司酌行之初制急缺風憲不時行取神宗時定爲三年至是每年一舉帝從

吏部尙書閱洪學請仍以三年爲期此選擇言路之大凡也保舉者所以佐銓法之不及而分吏部之權自洪武十七年命天下朝覲官舉廉能屬吏始永樂元年命京官文職七品以上外官至縣令各舉所知一人量才擢用後以貪污聞者舉主連坐蓋亦嘗間行其法然洪永時選官並由部請至仁宗初一新庶政洪熙元年特申保舉之令京官五品以上及給事御史外官布按兩司正佐及府州縣正官各舉所知惟見任府州縣正佐官及曾犯贓罪者不許薦舉其他官及屈在下僚或軍民中有廉潔公正才堪撫字者悉以名聞是時京官勢未重臺省考滿由吏部奏陞方面郡守旣而定制凡布按二司知府有缺令三品以上京官保舉宣德三年况鍾趙豫等以薦擢守蘇松諸府賜敕行事十年用郭濟姚文等爲知府亦如之其所奏保者郎中員外御史及司務行人寺副皆與不依常調也後多有政績部曹及御史由堂上官薦引類能其官而長吏部者蹇義郭瑾亦屢奉敕諭帝又慮諸臣畏連坐而不舉則語大學士楊溥以全才之難謂一言之薦豈能保其終身欲得賢才尤當厚教養之法故其時吏治蒸蒸稱極盛焉沿及英宗一遵厥舊然行之旣久不能無弊所舉或鄉里親舊僣屬門下素相私比者方面大吏方正謝莊等由保舉而得罪而無官保舉者在內御史在外知府往往九年不遷正統七年罷薦舉縣令之制十一年御史黃裳言給事御史國初奏遷方面郡守近年方面郡守率由廷臣保陞給事御史以糾參爲職豈能無

許於一人乞敕吏部仍按例奏請除授帝是其言命部議行明年給事中余忭復指正莊等事敗謂宜坐舉主且言方面郡守有缺吏部當奏請上裁尙書王直英國公張輔等言方面郡守保舉陞用稱職者多未可擅更易英宗仍從輔直言而採忭疏許言官指劾十三年御史涂謙復陳舉薦得方面郡守輒改前操之弊請仍遵洪武舊制於內外九年考滿官內揀擇陞授或親擇朝臣才望者任之詔可大臣舉官之例遂罷景泰中復行保舉給事中林聰陳推舉驟遷之弊言今缺參政等官三十餘員請暫令三品以上官保舉自後惟布按兩司三品以上官連名共舉其餘悉付吏部詔並從之成化五年科道官復請保舉方面吏部因并及郡守帝從言官請而命知府員缺仍聽吏部推舉踰年以會舉多未當并方面官第令吏部推兩員以聞罷保舉之令既而都御史李賓請令在京五品以上管事官及給事御史各舉所知以任州縣從之弘治十二年復詔部院大臣各舉方面郡守吏部因請依往年御史馬文升遷按察使屠滌遷僉都御史之例超擢一二以示激勸而未經大臣薦舉者亦兼采之並從其議當是時孝宗銳意求治命吏兵二部每季開兩京府部堂上及文武方面官履歷具揭帖奏覽第兼保舉法行之不專恃以爲治也正德以後具帖之制漸廢嘉靖八年給事中夏言復請循弘治故事且及舉劾賢否略節每季孟月部臣送科以達御前命著爲令而保舉方面郡守之法終明世不復行矣至若坐事斥免因急才而薦擢者

謂之起廢家居被召因需缺而預補者謂之添註此又銓法之所未詳而中葉以後閭嘗一行者也考滿  
考察二者相輔而行考滿論一身所歷之俸其目有三曰稱職曰平常曰不稱職爲上中下三等考察通  
天下內外官計之其目有八曰貪曰酷曰浮躁曰不及曰老曰病曰罷曰不謹考滿之法三年給由曰初  
考六年曰再考九年曰通考依職掌事例考覈陞降諸部寺所屬初止署職必考滿始實授外官率遞考  
以待覈雜考或一二年或三年九年郡縣之繁簡或不相當則互換其官謂之調繁調簡洪武十一年命  
吏部課朝覲官殿最稱職而無過者爲上賜坐而宴有過而稱職者爲中宴而不坐有過而不稱職者爲  
下不預宴序立於門宴者出然後退此朝覲考覈之始也十四年其法稍定在京六部五品以下聽本衙  
門正官察其行能驗其勤怠其四品以上及一切近侍官與御史爲耳目風紀之司及太醫院欽天監王  
府官不在常選者任滿黜陟取自上裁直隸有司首領官及屬官從本司正官考覈任滿從監察御史覆  
考各布政使司首領官俱從按察司考覈其茶馬鹽馬鹽運鹽課提舉司軍職首領官俱從布政司考覈  
仍送按察司覆考其布政司四品以上按察司鹽運司五品以上任滿黜陟取自上裁內外入流并雜職  
官九年任滿給由赴吏部考覈依例黜陟果有殊勳異能超邁等倫者取自上裁又以事之繁簡與歷官  
之殿最相參互覈爲等第之陞降其繁簡之例在外府以田糧十五萬石以上州以七萬石以上縣以三

萬石以上或親臨王府都布政按察三司并有軍馬守禦路當驛道邊方衝要供給處俱爲事繁府糧不及十五萬石州不及七萬石縣不及三萬石及僻靜處俱爲事簡在京諸司俱從繁例十六年京官考覈之制稍有裁酌俱由其長開具送部覈考十八年吏部言天下布按府州縣朝覲官凡四千一百一十七人稱職者十之一平常者十之七不稱職者十之一而貪污鬪茸者亦共得十之一帝令稱職者陞平常者復職不稱職者降貪污者付法司罪之鬪茸者免爲民永宣間中外官舊未有例者稍增入之又從部議初考稱職次考未經考覈今考稱職者若初考平常次考未經考覈今考稱職者俱依稱職例陞用自時厥後大率遵舊制行之中間利弊不可枚舉而其法無大變更也考察之法京官六年以己亥之歲四品以上自陳以取上裁五品以下分別致仕降調閒住爲民者有差具册奏請謂之京察自弘治時定外官三年一朝覲以辰戌丑未歲察典隨之謂之外察州縣以月計上之府府上下其考以歲計上之布政司至三歲撫按通核其屬事狀造册具報麗以八法而處分察例有四與京官同明初行之相沿不廢謂之大計計處者不復敘用定爲永制洪武四年命工部尙書朱守仁廉察山東萊州諸郡官吏六年令御史臺御史及各道按察司察舉有司官有無過犯奏報黜陟此考察之始也洪熙時命御史考察在外官以奉命者不能無私諭吏部尙書蹇義嚴加戒飭務矢至公景泰二年吏部都察院考察當黜退者七百

三十餘人帝慮其未當仍集諸大臣更考存留者三之一成化五年南京吏部右侍郎章綸都察院右僉都御史高明考察庶官帝以各衙門掌印官不同僉名疑有未當令侍郎葉盛都給事中毛弘從公體勘亦有所更定弘治六年考察當罷者共一千四百員又雜職一千一百三十五員帝諭方面知府必指實跡毋虛文泛言以致枉人府州以下任未三年者亦通核具奏尙書王恕等具陳以請而以府州縣官貪鄙殃民者雖年淺不可不黜帝終謂人才難得降諭諄諄多所原有當黜而留者九十餘員給事御史又交章請黜遺漏及宜退而留者復命吏部指實跡恕疏各官考語及本部訪察者以聞帝終以考語爲未實諭令復核恕以言不用且疑有中傷者遂力求去至十四年南京吏部尙書林瀚言在外司府以下官俱三年一次考察兩京及在外武職官亦五年一考選惟兩京五品以下官十年始一考察法大闕略旨下吏部覆請如瀚言而京官六年一察之例定矣京察之歲大臣自陳去留既定而居官有遺行者給事御史糾劾謂之拾遺拾遺所攻擊無獲免者弘正嘉隆間士大夫廉恥自重以掛察典爲終身之玷至萬曆時閣臣有所狗庇間留一二以撓察典而羣臣水火之爭莫甚於辛亥丁巳事具各傳中黨局旣成互相報復至國亡乃已

兵部凡四司而武選掌除授職方掌軍政其職尤要凡武職內則五府留守司外則各都司各衛所及三

宣大總流官八等都督及同知僉事都指揮使同知僉事正副留守世官九等都指揮使及同知僉事衛所鎮撫正副千戶百戶試百戶直省都指揮使二十一留守司二衛九十一守禦屯田羣牧千戶所二百十有一此外則苗蠻土司皆聽部選自永樂初增立三大營各設管操官各哨有分管坐營官坐司官景泰中設團營十已復增二各有坐營官俱特命親信大臣提督之非兵部所銓擇也凡大選曰色目曰狀貌曰才行曰封贈曰襲膺其途有四曰世職曰武舉曰行伍曰納級初武職率以勳舊太祖慮其不率以武士訓戒錄大誥武臣錄頒之後乃參用將材三歲武舉六歲會舉每歲薦舉皆隸部除授久之法紀墮壞選用紛雜正德間冒功陞授者三千有奇嘉靖中詹事霍韜言成化中增太祖時軍職四倍今又增幾倍矣錦衣初額官二百五員今至于七百員殆增八倍洪武初軍功襲職子弟年二十者比試初試不中襲職署事食半俸二年再試中者食全俸仍不中者充軍其法至嚴故職不冗而俸易給自永樂後新官免試舊官卽比試賄賂無不中此軍職所以日濫也永樂平交趾賞而不陞邇者不但獲賊者陞而奏帶及緝妖言捕盜者亦無不陞此軍職所以益冗也宣命大臣循清黃例內外武職一切差次功勞考其祖宗相承叔姪兄弟繼及或洪永年間功或宣德以後功或內監弟姪恩膺或勳戚駙馬子孫或武舉取中各分數等默寓汰省之法或許世襲或許終身或許繼或不許繼各具冊籍昭示明白以爲激勸於是命給

事中夏言等查覈冒濫言等指陳其弊言鎮守官奏帶舊止五名今至三四百名蓋一人而奏帶數處者有之一時而數處獲功者有之他復巧立名色紀驗不加審覈銓選又無駁勘其改正重陞併功加授之類弊端百出宜盡革以昭神斷部核如議恩倖冗濫者裁汰以數千計宿蠹爲清萬曆十五年復詔嚴加察核且嘗命提鎮科道會同兵部品年資課技藝序薦剡分爲三等名曰公選然徒飾虛名終鮮實效也武官爵止六品其職死者襲老疾者替世久而絕以旁支繼年六十者子替明初定例嫡子襲替長幼次及之絕者嫡子庶子孫次及之又絕者以弟繼永樂後取官舍旗軍餘丁曾歷戰功者令原帶俸及管事襲替悉因之其降級子孫仍替見降職事弘治時令旁支減級承襲正德中令旁支入總旗嘉靖間旁支無功者不得保送凡陞職官舍如父職其陣亡保襲者流官一等凡襲替官舍以騎射試之大抵世職難覈故例特詳而長弊叢奸亦復不少官之大者必會推五軍都督府掌印缺於見任公侯伯取一人僉書缺於帶俸公侯伯及在京都指揮在外正副總兵官推二人錦衣衛堂上官及前衛掌印缺視五府例推二人都指揮留守以下上一人正德十六年令五府及錦衣衛必由都指揮屢著勳猷者陞授諸衛官不世獨錦衣以世武之軍政猶文之考察也成化二年令五年一行以見任掌印帶俸差操及初襲官一體考核十三年令兩京通考以爲常五府大臣及錦衣衛堂上官自陳候旨直省總兵官如之在內五府所



屬并直省衛所官悉由巡視官及部官註送在外都司衛所官由撫按造冊繳部副參以下千戶以上由都布按三司察註送撫咨部考舉題奏錦衣衛管戎務者倍加嚴考南北鎮撫次之各衛所及地方守禦并各都司隸巡撫者例同惟管漕運者不與考

明史卷七十一終

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉  
敕修

職官一

明官制沿漢唐之舊而損益之自洪武十三年罷丞相不設析中書省之政歸六部以尚書任天下事侍郎貳之而殿閣大學士祇備顧問帝方自操威柄學士鮮所參決其糾劾則責之都察院章奏則達之通政司平反則參之大理寺是亦漢九卿之遺意也分大都督府爲五而征調隸於兵部外設都布按三司分隸兵刑錢穀其考核則聽於府部是時吏戶兵三部之權爲重迨仁宣朝大學士以太子經師恩累加至三孤望益尊而宣宗內柄無大小悉下大學士楊士奇等參可否雖吏部憲義戶部夏原吉時召見得預各部事然希闕不敵士奇等親自是內閣權日重卽有一二吏兵之長與執持是非輒以敗至世宗中葉夏言嚴嵩迭用事遂赫然爲真宰相壓制六卿矣然內閣之擬票不得不決於內監之批紅而相權轉歸之寺人於是朝廷之紀綱賢士大夫之進退悉顛倒於其手伴食者承意指之不暇間有賢輔卒蒿目而不能救初領五都督府者皆元勳宿將軍制肅然永樂間設內監監其事猶不敢縱沿習數代勳戚統

稽司軍紀日以惰毀既而內監添置益多邊塞皆有巡視四方大征伐皆有監軍而疆事遂致大壞明祚不可支矣跡其興亡治亂之由豈不在用人之得失哉至於設官分職體統相維品式具備詳列後簡覽者可考而知也

宗人府

三公三孤

太子三師三少

內閣

吏部

戶部 附總督倉場

禮部

兵部 附協理京營戎政

刑部

工部 附提督易州山廠

宗人府宗人令一人左右宗正各一人左右宗人各一人 並正一品 掌皇九族之屬籍以時修其玉牒書宗室

子女適庶名封嗣襲生卒婚嫁諡葬之事凡宗室陳請為闈於上選材能錄罪過初洪武三年置太宗正

院二十二年改為宗人府並以親王領之 秦王棧為令晉王綱燕王棣為左右宗正周王橚楚王楨為左右宗人 其後以勳戚大臣攝府事

不備官而所領亦盡移之禮部其屬經歷司經歷一人 正五品 典出納文移

太師太傅太保為三公 正一品 少師少傅少保為三孤 從一品 掌佐天子理陰陽經邦弘化其職至重無定員

無專授洪武三年授李善長太師徐達太傅 先是常遇春已贈太保 三孤無兼領者建文永樂間罷公孤官仁宗復

設 永樂二十二年八月宣德三年 敕太師英國公張輔少師吏部尚書蹇義少傅兵部尚書華蓋殿大學士

楊士奇少保兼太子少傅戶部尚書夏原吉各輟所領侍左右咨訪政事公孤之官幾於專授蹇義原吉

卒士奇遺領閣務自此以後公孤但虛銜爲勳戚文武大臣加官贈官而文臣無生加三公者惟贈乃得之嘉靖二年加楊廷和太傅辭不受其後文臣得加三公惟張居正萬曆九年加太傅十年加太師

太子太師太子太傅太子太保並從一品掌以道德輔導太子而謹護翼之太子少師太子少傅太子少保並正

二品掌奉太子以觀三公之道德而教諭焉太子賓客正三品掌侍太子贊相禮儀規誨過失皆東宮大臣無

定員無專授洪武元年太祖有事親征慮太子監國別設宮僚或生嫌隙乃以朝臣兼宮職李善長兼太

子少師徐達兼太子少傅常遇春兼太子少保治書侍御史文原吉范顯祖兼太子賓客三年禮部尙書

陶凱請選人專任東宮官罷兼領庶於輔導有所責成帝諭以江充之事可爲明鑑立法兼領非無謂也

由是東宮師傅止爲兼官加官及贈官惟永樂間成祖幸北京以姚廣孝專爲太子少師留輔太子自是

以後終明世皆爲虛銜於太子輔導之職無與也

中極殿大學士舊名華蓋殿建極殿大學士舊名謹身殿文華殿大學士武英殿大學士文淵閣大學士東閣大學

士並正五品掌獻替可否奉陳規誨點檢題奏擬批答以平允庶政凡上之達下曰詔曰誥曰制曰冊文曰

諭曰書曰符曰令曰檄皆起草進書以下之諸司下之達上曰題曰奏曰表曰講章曰書狀曰文冊曰揭

帖曰制對曰露布曰譯皆審署申覆而修書焉平允乃行之凡車駕郊祀巡幸則扈從御經筵則知經筵

或同知經筵事東宮出閣講讀則領其事敘其官而授之職業冠婚則充賓贊及納徵等使修實錄史志

諸書則充總裁官春秋上丁釋奠先師則攝行祭事會試充考試官殿試充讀卷官進士題名則大學士

一人撰文立石於太學大典禮大政事九卿科道官會議已定則按典制相機宜裁量其可否斟酌入告

頒詔則捧授禮部會敕則稽其由狀以請宗室請名請封諸臣請諡並擬上以其授餐大內常侍天子殿

閣之下避宰相之名又名內閣先是太祖承前制設中書省置左右丞相正一品甲辰正月初置左右相

左相國吳元年命百官禮儀俱尙左改右相國爲左相國左相國爲右相國洪武元年改爲左右丞相平章政事從一品左右丞正二品參知政事從二品以統領

衆職置屬官左右司正五品員外郎正六品都事檢校正七品照磨管勾從七品參議府參議正三品參軍斷事

官從三品斷事經歷正七品知事正八品都鎮撫司都鎮撫正五品考功所考功郎正七品甲辰十月以都鎮撫司

洪武元年革考功所二年革照磨檢校所斷事官七年設直省舍人十八尋改中書舍人洪武九年汰平章政事參知政事十三年正月誅丞相胡惟

庸遂罷中書省其官屬盡革惟存中書舍人九月置四輔官以儒士王本等爲之置四輔官告太廟以王本杜祐龔敷爲春官杜敷趙民望吳源爲夏官兼

太子賓客秋冬官缺以本等攝之一月內尋亦罷十五年倣宋制置華蓋殿武英殿文淵閣東閣諸大學

士禮部尙書鄧質爲華蓋檢討吳伯宗爲武英翰林學士宋訥爲文淵典籍吳況爲東閣又置文華殿大學士徵者儒鮑恂余詮張長年等爲之以輔導太子秩皆

正五品二十八年勅諭羣臣國家罷丞相設府都院寺以分理庶務立法至爲詳善以後嗣君其毋得議

置丞相臣下有奏請設立者論以極刑當是時以翰林春坊詳看諸司奏啟兼司平駁大學士特侍左右

備顧問而已建文中改大學士為學士悉罷諸大學士各設學士一人又改成祖即位特簡解縉胡廣楊

榮等直文淵閣參預機務閣臣之預務自此始然其時入內閣者皆編檢講讀之官不置官屬不得專制

諸司諸司奏事亦不得相關白仁宗以楊士奇楊榮東宮舊臣陞士奇為禮部侍郎兼華蓋殿大學士榮

為太常卿兼謹身殿大學士謹身殿大學士仁宗始置閣職漸崇其後士奇榮等皆遷尚書職雖居內閣官必以尚書

為尊景泰中王文始以左都御史進吏部尚書入內閣自後誥敕房制敕房俱設中書舍人六部承奉意

旨靡所不領而閣權益重世宗時三殿成改華蓋為中極謹身為建極閣銜因之嘉靖以後朝位班次俱

列大部之上

吏部尚書一人正二品左右侍郎各一人正三品其屬司務廳司務二人從九品文選驗封稽勳考功四清吏司

各郎中一人正五品員外郎一人從五品主事一人正六品洪武三十一年增設文選司主事一人正統十一年增設考功司主事一人尚書掌天下官

吏選授封勳考課之政令以甄別人才贊天子治蓋古冢宰之職視五部為特重侍郎為之貳司務掌催

督稽緩勾銷簿書明初設主事司務各四人為首領官有主事印洪武文選掌官吏班秩選陞改調之事

以贊尚書凡文官之品九品有正從為級一十八不及九品曰未入流凡選每歲有大選有急選有遠方

選有歲貢就教選間有揀選有舉人乞恩選選人咸登資簿蓋其流品平其銓注而序遷之凡陞必考滿若員缺當補不待考滿曰推陞類推上一人單推上二人三品以上九卿及僉都御史祭酒廷推上一人或三人內閣吏兵二部尚書廷推上二人凡王官不外調王姻不內除大臣之族不得任科道僚屬同族則以下避上外官才地不相宜則酌其繁簡互換之有傳陞乞陞者並得執奏以署職試職實授莫年資以開設裁併兼攝適繁簡以薦舉起廢徵召振幽滯以帶俸添注寄恩宥以降調除名馭罪過以官程督吏治以寧假悉人情驗封掌封爵襲膺褒贈吏算之事以贊尚書凡爵非社稷軍功不得封封號非特旨不得與或世或不世皆給誥券衍聖公及戚里恩澤封不給券凡券左右各一左藏內府右給功臣之家

襲封則徵其誥券稽其功過覈其宗支以第其世流降除之等土官則勘其應襲與否移文選司注擬宜

宣撫安撫長官諸司領土兵者則隸兵部凡膺敘明初自一品至七品皆得膺一子以世其祿洪武十六年定職官子孫應敘

從五品用正二品子正六品用從二品子從六品用正三品子正七品用從三品子從七品用正四品子正八品用從四品子從八品用正五品子正九品用從五品子從九品用從六品子於未入流上等職內

敘用從六品子於未入流中等職內敘用後乃漸為限制京官三品以上考滿著續始膺一子曰官生其正從七品子於未入流下等職內敘用

出自特恩者曰恩生凡封贈公侯伯之追封皆遞進一等三品以上政績顯異及死諫死節陣亡者皆得

贈官其見任則初授散階京官滿一考及外官滿一考而以最閑者皆給本身誥敕七品以上皆得推恩



其先五品以上授誥命六品以下授敕命

一品三代四軸二品三品二代三軸四品五品六品七品一代二軸八品以下流內官本身一軸一品軸以玉二品軸以犀三品四品軸以鍍金曾祖祖父皆如其子孫官公侯伯視一品外內命婦視夫若子之品生日封死曰贈若五品以下軸以角

先有罪譴則停給文之散階四十有二以歷考為差

正一品初授特進榮祿大夫陞授特進光祿大夫從一品初授榮祿大夫陞授光祿大夫正二品初授資

善大夫陞授資政大夫加授資德大夫從二品初授中奉大夫陞授通奉大夫加授正奉大夫正三品初授嘉議大夫陞授通議大夫加授正議大夫從三品初授亞中大夫陞授中大夫加授太中大夫正四品初授中順大夫陞授中憲大夫加授中議大夫從四品初授朝列大夫陞授朝議大夫加授朝請大夫正

五品初授奉議大夫陞授奉政大夫從五品初授奉訓大夫陞授奉直大夫正六品初授承直郎陞授承德郎從六品初授承務郎陞授儒林郎吏材幹出身授宣德郎正七品初授承事郎陞授文林郎吏材幹

授宣議郎從七品初授從仕郎陞授徵仕郎正八品初授迪功郎陞授修職郎從八品初授迪功佐郎陞授修職佐郎正九品初授將仕郎陞授登仕郎從九品初授將仕佐郎陞授登仕佐郎外命婦之號九人公曰某國夫人侯曰某侯夫人伯曰某伯夫人

三品曰淑人四品曰恭人五品曰宜人六品曰安人七品曰孺人因其子孫封者加太字夫在則否凡封贈之次七品至六品一次五品一次初制有四品一次後省三品二品一品各一次三母不並封兩封從優品父職高於子則進一階父應停給及

子為人後者皆得移封嫡在不封生母生母未封不先封其妻妻之封止於一嫡一繼其封贈後而以墨

敗者則進奪稽勳掌勳級名籍喪養之事以贊尚書凡文勳十正一品左右柱國從一品柱國正二品正治上卿從二品正治卿正三品資治尹從

三品資治少尹正四品贊治尹從四品贊治少尹正五品修正庶尹從五品協正庶尹自五品以上歷再考乃授勳凡百官遷除降調皆開寫年甲

鄉貫出身每歲十二月貼黃春秋清黃皆赴內府有故揭而去之凡父母年七十無兄弟得歸養凡三年

喪解職守制糾纏其奪喪匿喪短喪者惟欽天監官奔喪三月復任考功掌官吏考課黜陟之事以贊尙書凡內外官給由三年初考六年再考並引請九年通考奏請綜其稱職平常不稱職而陟黜之陟無過二等降無過三等其甚者黜之罪之京官六年一察察以巳亥年五品下考察其不職者降罰有差四品上自陳去留取旨外官三年一朝朝以辰戌丑未年前期移撫按官各綜其屬三年內功過狀註考彙送覆核以定黜陟倉場庫官一年考巡檢三年考教官九年考府州縣官之考以地之繁簡爲差吏之考三六年滿移驗封司撥用九年滿又試授官惟王官及欽天御用等監官不考凡內外官彈章稽其功過擬去留以請上裁薦舉保留則核其政績旌異焉明初設四部於中書省分掌錢穀禮儀刑名營造之務洪武元年始置吏戶禮兵刑工六部設尙書侍郎中員外郎主事尙書正三品侍郎正四品郎中正五品員外郎正六品主事正七品仍隸中書省六年部設尙書二人侍郎二人吏部設總部司勳考功三屬部部設郎中員外郎各一人主事各二人十三年罷中書省倣周官六卿之制陞六部秩各設尙書侍郎一人惟戶部侍郎二人每部分四屬部吏部屬部加司封每屬部設郎中員外郎主事各一人尋增侍郎一人二十二年改總部爲選部二十九年定爲文選驗封稽勳考功四司并五部屬皆稱清吏司建文中改六部尙書爲正一品設左右侍中正二位侍郎上除去諸司清吏字成祖初悉復舊制永樂元年以北平爲北京置北京行部尙書二人侍郎四人

其屬置六曹清吏司吏戶禮兵工五曹郎中員外郎主事各一人刑曹郎中一人員外郎一人後又分置六

部各稱行在某部十八年定都北京罷行部及六曹以六部官屬移之北不稱行在其留南京者加南京

字洪熙元年復置各部官屬於南京去南京字而以在北京者加行在字仍置行部宣德三年復罷行部

正統六年於北京去行在字於南京仍加南京字遂為定制景泰中吏部嘗設二尚書天順初復罷其一

按吏部尚書表率百僚進退庶官銓衡重地其禮數殊異無與並者永樂初選翰林官入直內閣其後大

學士楊士奇等加至三孤兼尚書銜然品敘列尚書寔義夏原吉下景泰中左都御史王文陞吏部尚書

兼學士入內閣其班位猶以原銜為序次自弘治六年二月內宴大學士邱濬遂以太子太保禮部尚書

居太子太保吏部尚書王恕之上其後由侍郎詹事入閣者班皆列六部上矣

戶部尚書一人正二左右侍郎各一人正三其屬司務廳司務二人從九浙江江西湖廣陝西廣東山東

福建河南山西四川廣西貴州雲南十三清吏司各郎中一人正五品宣德以後增設山西司郎中三人

郎中正六品宣德以後增設雲南司主事七人浙

西江西湖廣陝西福建河南山西七司主事

各二人山東四川貴州三司主事各一人照磨所照磨一人正八品檢校一人正九品所轄寶鈔提舉司提舉一人正八品副提舉一

人正九品典史一人後副提舉抄紙局大使副使各一人後副使印鈔局大使副使各一人後俱寶鈔廣惠庫

大使一人正九品 副使二人從九品嘉靖中革 廣積庫大使一人正九品 副使一人從九品 吳史一人嘉靖中副使 臧訶

庫大使一人正九品 副使二人從九品嘉靖中革 甲字乙字丙字丁字戊字庫大使五人正九品 副使六人從九品丁字庫二人

嘉靖中革一人并革 廣盈庫大使一人從九品 副使二人嘉靖中革 外承運庫大使二人正九品 副使二人從九品

乙字戊字二庫副使 俱使承運庫大使一人正九品 副使一人從九品嘉靖中革 行用庫大使副使各一人後俱革 太倉銀庫大使副使各

一人嘉靖中革副使 御馬倉大使一人從九品 副使一人軍儲倉大使一人 副使一人從九品 長安東安西

安北安門倉各副使一人東安門倉舊二人 張家灣鹽倉檢校批驗所大使副使各一人隆慶六年並革 尙書掌

天下戶口田賦之政令侍郎貳之稽版籍歲會賦役實徵之數以下所司十年攷黃冊差其戶上下畸零

之等以周知其登耗凡田土之侵占投獻詭寄影射有禁人戶之隱漏逃亡朋充花分有禁繼嗣婚姻不

如今有禁皆覈綜而糾正之天子耕藉則尙書進耒耜以墾荒業貧民以占籍附流民以限田裁異端之

民以圖帳抑兼并之民以樹藝課農官以芻地給馬牧以召佃盡地利以銷豁清賠累以撥給廣恩澤以

給除差優復以鈔錠節賞賚以讀法訓吏民以權量和市糴以時估平物價以積貯之政恤民困以山澤

陂池關市坑冶之政佐邦國贍軍輸以支兌改兌之規利漕運以蠲減振貸均糴捕蝗之令憫災荒以輸

轉屯種糴買召納之法實邊儲以祿廩之制馭貴賤洪武二十五年重定內外文武官歲給祿俸之制正一品一千四百石從一品八百八十八石正二品

七百三十二石從二品五百七十六石正三品四百二十石從三品三百一十二石正四品二百八十八石從四品二百五十二石正五品一百九十二石從五品一百六十八石正六品一百二十石從六品九十六石正七品九十石從七品八十四石正八品七十八石從八品七十二石正九品六十六石從九品六十石未入流三十六石俱米鈔本折兼支 十三司各掌其分省之事兼

領所分兩京直隸貢賦及諸司衛所祿俸邊鎮糧餉并各倉場鹽課鈔關 浙江司帶管在京羽林右留守左龍虎應天龍驤義勇右康陵

七衛神機營 江西司帶管在京旗手金吾前金吾後金吾左濟陽五衛 湖廣司帶管子監教坊司在京羽林前通州和陽豹韜永陵昭陵六衛及興都留守司 福建司帶管順天府在京燕山左武驤左

武驤右驍騎右虎賁右留守後武成中茂陵八衛五軍巡捕勇士十四衛各營及北直隸永平保定河間真定順德廣平大名七府延慶保安二州大甯都司萬全都司并北直隸所轄各衛所山口永盈通濟各倉

山東司帶管在京錦衣大甯中大甯前三衛及遼東都司兩淮兩浙長蘆河東山東福建各鹽運司四 川廣東海北雲南黑鹽井白鹽井安甯五井各鹽課提舉司陝西靈州鹽課司江西南贛鹽稅 山西司

帶管在京燕山前鎮南興武永清左永清右五衛及宣府大同山西各鎮 河南司帶管在京府軍前燕 山右大興左裕陵四衛牧馬千戶所及北直隸潼關衛蒲州千戶所 陝西司帶管宗人府五軍都督府

六部都察院通政司大理寺詹事府翰林院太僕寺鴻臚寺尙寶司六科中書舍人行人司欽天監太醫 院五城兵馬司京衛武學文思院皮作局在京留守右長陵獻陵景陵四衛神樞隨侍二營及延綏靈夏

甘肅固原各鎮 四川司帶管在京府軍後金吾右騰驤左騰驤右武德神策忠義後武功中武功左武 功右彭城十一衛及應天府南京四十九衛南直隸安慶蘇州松江常州鎮江徽州寧國池州太平廬州

鳳陽淮安揚州十三府徐滁和廣德四州中都留守司并南直隸所轄各衛所 廣東司帶管在京羽林 左留守中應揚神武左義勇前義勇後六衛蕃牧奠靖二千戶所 廣西司帶管太常寺光祿寺神樂觀

儀牲所司牲司太倉銀庫內府十庫在京瀋陽左瀋陽右留守前寬河蔚州左五衛及二十二馬房倉各 象房牛房倉京府各草場 雲南司帶管在京府軍府軍左府軍右虎賁左忠義右忠義前泰陵七衛及

大軍倉皇城四門倉并在外臨清德州徐州淮安天津各倉 貴州司帶管上林苑監寶鈔提舉司都稅 司正陽門張家灣各宣課司德勝門安定門各稅課司崇文門分司在京濟州會州富峪三衛及薊州永

平密雲昌平易州各鎮臨清許墅九 條爲四科曰民科主所屬省府州縣地理人物圖志古今沿革山川 江淮安北新揚州河西務各鈔關

險易土地肥瘠寬狹戶口物產多寡登耗之數曰度支主會計夏稅秋糧存留起運及賞賚祿秩之經費曰金科主市舶魚鹽茶鈔稅課及贓罰之收折曰倉科主漕運軍儲出納料糧凡差三等由吏部選授曰註差疏名上請曰題差劄委曰部差或三年或一年或三月而代初洪武元年置戶部六年設尙書二人侍郎二人分爲五科一科二科三科四科總科每科設郎中員外郎各一人主事四人惟總科郎中員外郎各二人主事五人八年中書省奏戶刑工三部事繁戶部五科每科設尙書侍郎各一人郎中員外郎各二人主事五人內會總科主事六人外牽照科主事二人司計四人照磨二人管勾一人又置在京行用庫隸戶部設大使一人副使二人典史一人都監二人十三年陞部秩定設尙書一人侍郎二人分四屬部總部度支部金部倉部每部郎中員外郎各一人總部主事四人度支部金部主事各三人倉部主事二人尋罷在京行用庫二十二年改總部爲民部二十三年又分四部爲河南北平山東山西陝西浙江江西湖廣廣東廣西四川福建十二部四川部兼領雲南部設郎中員外郎各一人主事二人各領一布政司戶口錢糧等事量其繁簡帶管京畿每一部內仍分四科管理又置照磨檢校各一人稽文書出入之數而程督之十九年復置寶鈔提舉司洪武七年初置寶鈔提舉司提舉一人正七品副提舉一人從七品吏目一人省注所屬抄紙印鈔二局各大使一人正八品副使一人正九品典史一人省注寶鈔行用二庫各大使二人正八品副使二人正九品典史一人省注尋陞提舉爲正四品十三年罷至是復置秩正八品二十六年令浙江江西蘇松人毋得任戶部二十九

年改十二部爲十二清吏司建文中仍爲四司餘見吏部成祖復舊制永樂元年改北平司爲北京司十八年

革北京司設雲南貴州交趾三清吏司宣德十年革交趾司定爲十三司其後歸併職掌凡宗室勳戚文

武官吏之廩祿陝西司兼領之北直隸府州衛所福建司兼領之南直隸府州衛所四川司兼領之天下

鹽課山東司兼領之關稅貴州司兼領之漕運及臨德諸倉雲南司兼領之御馬象房諸倉廣西司兼領

之明初嘗置司農司尋吳元年置司農司卿正三品少卿正四品丞正五品庸田署令正五品典簿司計正七品洪武元年罷三年復置司農司開治所於河南設卿一人少卿二人

丞四人主簿錄事各二人四年又罷後置判錄司亦罷洪武十三年置判錄司掌在京官吏俸給交移勘合設判錄一人正七品副判二人從七品尋改判錄爲司正副判爲左右司副十八年

罷皆不隸戶部

總督倉場一人掌督在京及通州等處倉場糧儲洪武初置軍儲倉二十所各設官司其事永樂中遷都

北京置京倉及通州諸倉以戶部司員經理之宣德五年始命李昶爲戶部尙書專督其事遂爲定制以

後或尙書或侍郎俱不治部事嘉靖十五年又命兼督西苑農事隆慶初罷兼理萬曆二年另撥戶部主

事一人陪庫每日偕管庫主事收放銀兩季終更替九年裁革命本部侍郎分理之十一年復設二十五

年以右侍郎張養蒙督遼餉四十七年增設督餉侍郎崇禎間有督遼餉寇餉宣大餉增設三四人天啟五年又增設督理錢

法侍郎

禮部尙書一人正二品左右侍郎各一人正三品其屬司務廳司務二人從九品儀制祠祭主客精膳四清吏司

各郎中一人正五品員外郎一人從五品主事一人正六品正統六年增設儀制祠祭二司主事各一人又增

事一人提督會同館所轄鑄印局大使一人副使二人萬曆九年革一人尙書掌天下禮儀祭祀宴饗貢舉之政令侍郎佐

之儀制分掌諸禮文宗封貢舉學校之事天子卽位天子冠大婚册立皇太子妃嬪太子妃上慈宮徽號

朝賀朝見大饗宴饗大射宴射則舉諸儀注條上之若經筵日講耕藉視學策士傳臚巡狩親征進厥進

春獻俘奏捷若皇太子出閣監國親王讀書之落皇子女誕生命名以及百官命婦朝賀皇太子后妃之

禮與諸王國之禮皆頒儀式於諸司凡傳制誥開讀詔勅表箋及上下百官往來移文皆授以程式焉凡

歲請封宗室王郡王將軍中尉妃主君各以其親疏爲等百官於宗王具官稱名而不臣王臣稱臣於其

王凡宗室駙馬都尉內命婦蕃王之誥命則會吏部以請凡諸司之印信領其制度內閣銀印直紐方一

篆文征西鎮朔平羌平蠻等將軍銀印虎紐方三寸三分厚九分柳葉篆文宗人府五軍都督府俱正一

品銀印三臺方三寸四分厚一寸六部都察院各都司俱正二品銀印二臺方三寸二分厚八分衍聖公

張真人中都留守司俱正二品各布政司從二品銀印二臺方三寸一分厚七分後賜衍聖公三臺銀印

順天應天二府俱正三品銀印方二寸九分厚六分五釐通政司大理寺太常寺詹事府京衛各按察司  
各衛俱正三品苑馬寺宣慰司俱從三品銅印方二寸七分厚六分太僕寺光祿寺各鹽運司俱從二品  
銅印方二寸六分厚五分五釐鴻臚寺各府俱正四品國子監宣撫司俱從四品銅印方二寸五分厚五  
分翰林院左右春坊尙書司欽天監太醫院上林苑監六部各宗人府經歷司王府長史司各衛千戶  
所俱正五品司經局五府經歷司招討司安撫司俱從五品銅印方二寸四分厚四分五釐各州從五品



銅印方二寸三分厚四分都察院經歷司大理寺左右司五城兵馬司大興宛平上元江甯四縣僧錄司  
道錄司中都留守司經歷司斷事司各都司經歷司斷事司各衛百戶所長官司王府審理所俱正六品  
光祿司各署各布政司經歷司理問所俱從六品銅印方二寸二分厚二分五釐六科行人司通政司經  
歷司工部營繕所太常寺典簿廳上林苑監各署各按察司經歷司各縣俱正七品中書舍人順天應天  
二府經歷司京衛經歷司光祿寺典簿廳太僕寺主簿廳詹事府主簿廳各衛經歷司各鹽運司經歷司  
苑馬寺主簿廳宣慰司經歷司俱從七品銅印方二寸一分厚三分戶部刑部都察院各照磨所兵部典  
牧所國子監繩愆廳博士廳典簿廳鴻臚寺主簿廳欽天監主簿廳各布政司照磨所各府經歷司王府  
紀善典寶典膳奉祀良醫工正各所宣撫司經歷司俱正從八品銅印方二寸厚二分五釐刑部都察院  
各司獄司順天應天二府照磨所司獄司鴻臚寺各署國子監典籍廳上林苑監典簿廳內府寶鈔等各  
庫御馬倉草倉會同館織染所文思院皮作局顏料局鞍轡局寶源局軍器局都稅司教坊司留守司司  
獄司各都司司獄司各按察司照磨所司獄司各府照磨所司獄司王府長史司典簿廳教授典儀所各  
府衛儒學稅課司陰陽學醫學僧綱司道紀司各巡檢司俱正從九品銅印方一寸九分厚二分二釐各  
州縣儒學倉庫驛遞關壩批驗所抽分竹木局河泊所織染局稅課局陰陽學醫學僧正司道正司僧會  
司道會司俱未入流銅條記闊一寸三分長二寸五分厚二分一釐已上俱直紐九疊篆文監察御史銅  
印直紐有眼方一寸五分厚二分八釐篆文總制總督巡撫并鎮守公差等官銅關防直  
紐闊一寸九分五釐長二寸九分厚二分九釐篆文外國王印三等曰金曰鍍金曰銀 刑敕則換給之  
凡祥瑞辨其名物無請封禪以蕩上心以學校之政育士類以貢舉之法羅賢才以鄉飲酒禮教齒讓以  
養老尊高年以制度定等威以恤貧廣仁政以旌表示勸勵以建言會議悉利病以禁自宮遏奸民祠祭  
分掌諸祀典及天文國恤廟諱之事凡祭有三曰天神地祇人鬼辨其大祀中祀小祀而敬供之飭其壇  
壝祠廟陵寢而數省闕之蠲其牢醴玉帛粢羹水陸瘞療之品第其配侑從食功德之上下而秩舉之天  
下神祇在祀典者則稽諸令甲播之有司以時謹其祀事督日官頒祿象於天下日月交食移內外諸司

救護有災異卽奏聞甚者乞祭告修省凡喪葬祭祀貴賤有等皆定其程則而頒行之凡謚帝十七后十三

字並二妃太子太子妃字親王一郡王二以字爲差勳戚文武大臣請葬祭贈謚必移所司覈行能傳公論

定議以聞其侍從勤勞忠諫死者官品未應謚皆得特賜凡帝后愍忌祀於陵輟朝不廢務凡天文地理

醫藥卜筮師巫音樂僧道人並籍領之有興造妖妄者罪無赦主客分掌諸蕃朝貢接待給賜之事諸蕃

朝貢辨其貢道貢使貢物遠近多寡豐約之數以定王若使迎送宴勞廬帳食料之等賞賚之差凡貢必

省閏之然後登內府有附載物貨則給直若蕃國請嗣封則遣頒冊於其國使還上其風土方物之宜贈

遺禮文之節諸蕃有保塞功則授勅印封之各國使人往來有誥勅則驗誥勅有勘籍則驗勘籍毋令闕

入土官朝貢亦驗勘籍其返則以鏤金勅諭行之必與銅符相比凡審言語譯文字送迎館伴考稽四夷

館譯字生通事之能否而禁飭其交通漏泄凡朝廷賜賚之典各省土物之貢咸掌之精膳分掌宴饗牲

豆酒膳之事凡御賜百官禮食曰宴曰酒飯爲上中下三等視其品秩蕃使土官有宴有下程宴有一次有二次下

程有常例有飲賜皆辨其等親王之藩王公將軍來朝及其使人亦如之凡膳羞酒醴品料光祿是供會其數而

程其出納焉凡廚役僉諸民以給使於太常光祿年深者得選充王府典膳凡歲藏冰出冰移所司謹潔

之初洪武元年置禮部六年設尙書二人侍郎二人分四屬部總部祠部膳部主客部每部設郎中員外

郎各一人主事各二人十三年陞部秩設尙書侍郎各一人每屬部設郎中員外郎主事各一人尋復增置侍郎一人二十二年改總部爲儀部二十九年改儀部祠部膳部爲儀制祠祭精膳惟主客仍舊俱稱爲清吏司按周宗伯之職雖掌邦禮而司徒既掌邦教所謂禮者僅鬼神祠祀而已至合典樂典教內而宗藩外而諸蕃上自天官下逮醫師膳夫伶人之屬靡不兼綜則自明始也成弘以後率以翰林儒臣爲之其由此登公孤任輔導者蓋冠於諸部焉

兵部尙書一人正二品左右侍郎各一人正三品其屬司務廳司務二人從九品武選職方車駕武庫四清吏司

各郎中一人正五品正統十年增設武選職方二司郎中各一人員外郎一人從五品正統十年增設武

年增設武庫司員外郎一人後俱革嘉主事二人正六品洪武宣德間增設武選司主事三人職方司主

事四人正統十四年增設車駕武庫二司主事各一人俱未後革萬曆十一年又增設車駕司主事一人所轄會同館大使一人正九品副使二人從九品大通關大使副使各一人俱未

掌天下武衛官軍選授簡練之政令侍郎佐之武選掌衛所土官選授陞調襲替功賞之事凡武官六品

其勳十有二正一品左右柱國從一品柱國正二品上護軍從二品護軍正三品上輕車都尉從三品輕

六品武散階三十正一品初授特進榮祿大夫陞授特進光祿大夫從一品初授榮祿大夫陞授光祿大

定國將軍加授奉國將軍正三品初授昭勇將軍陞授昭毅將軍加授昭武將軍從二品初授懷遠將軍陞授定遠將軍加授安遠將軍正四品初授威將軍陞授宣威將軍加授廣威將軍從四品初授宣武

將軍陸授顯武將軍加授信武將軍正五品初授武德將軍陸授武節將軍從五品初授武略將軍陸授武毅將軍正六品初授昭信校尉陸授承信校尉從六品初授忠顯校尉陸授忠武校尉歲凡六

選有世官有流官世官九等指揮使指揮同知指揮僉事衛鎮撫皆有襲職有替職其幼也有優給其不

得世也有減革有通革流官八等左右都督都督同知都督僉事都指揮使以世官陸授或由武舉用之

皆不得世卽有世者出特恩非真授者曰署職署職遞加本職一級作半級曰試職試職作一級支曰納

職納職帶俸不莅事戰功二等奇功爲上頭功次之首功四等進北爲大遼東次之西番苗蠻又次之內地反寇

又次之凡比試有舊官洪武二十一年以前爲舊有新官成祖以後爲新軍政五年一考選先期撫按官上功過狀覆核而去

留之五府錦衣衛堂上各總兵官皆自陳取上裁推舉上二人都指揮以下上一人凡土司之官九級自

從三品至從七品皆無歲祿其子弟族屬妻女若婿及甥之襲替胥從其俗附塞之官自都督至鎮撫凡

十四等皆以誥敕辨其僞冒贈官死於王事加二等死於戰陣加三等凡除授出自中旨者必覆奏然後

行之以貼黃徵圖狀以初續徵誥敕以効功課將領以比試練卒徒以優養恩故絕以褒恤勵死戰以審

祿馭恩倖以殺降失陷避敵激叛之法肅軍機以典刑敗倫行劫退陣之科斷世祿職方掌輿圖軍制城

隍鎮戍簡練征討之事凡天下地里險易遠近邊腹疆界俱有圖本三歲一報與官軍車騎之數偕上凡

軍制內外相維武軍不得輒下符徵發自都督府都指揮司留守司內外衛守禦屯田羣牧千戶所儀衛

司土司諸番都司衛所各統其官軍及其部落以聽征調守衛朝貢保塞之令以時修浚其城池而闔視之凡鎮戍將校五等曰鎮守曰協守曰分守曰守備曰備倭皆因事增置視地險要設兵屯戍之凡京營操練統以文武大臣皆科道官巡視之若將軍營練將軍四衛營練及勇士幼官舍人等營練則討其軍實稽其什伍察其存逸閒否以教其坐作進退疾徐疏數之節金鼓磨旗之號征討請命將出師懸賞罰調兵食紀功過以黜陟之以保塞障邊徼以烽火傳聲息以關津詰姦細以緝捕弭盜賊以快壯簡鄉民以勾解收充抽選併豁疏放存恤之法整軍伍車駕掌鹵簿儀仗禁衛驛傳廐牧之事凡鹵簿大駕大典禮大朝會設之丹陛駕常朝設之武陳駕世宗南巡時設之皆辨其物數以授所司慈宮中宮之鹵簿東宮宗藩之儀仗亦如之凡侍衛御殿全直常朝番直守衛親軍衛畫前後左右四門爲四行而日夜巡警

之守衛皇城前午門爲一行後元武門爲一行左東華門爲一行右西華門爲一行

凡郵傳在京師曰會同館在外曰驛曰遞運所皆以符驗關

券行之凡馬政其專理者太僕苑馬二寺稽其簿籍以時程其登耗惟內廐不會武庫掌戎器符勘尺籍武學薪隸之事凡內外官軍有征行移工部給器仗籍紀其數制敕下各邊徵發及使人出關必驗勘合軍伍缺下諸省府州縣勾之以跟捕紀錄開戶給除停勾之法覈其召募塚集罪謫改調營丁尺籍之數凡武職幼官及子弟未嗣官者於武學習業以主事一人監督之考稽學官之賢否肄習之勤怠以聞諸

司官署供應有柴薪直衙有阜隸視官品爲差初洪武元年置兵部六年增尙書一人侍郎一人置總部  
駕部并職方三部設郎中員外郎主事如吏部之數十三年陞部秩設尙書侍郎各一人又增置庫部爲  
四屬部部設郎中員外郎主事各一人十五年增試侍郎一人二十二年改總部爲司馬部二十九年定  
改四部爲武選職方車駕武庫四清吏司惟職方仍舊名景泰中增設尙書一人協理部事天順初罷隆慶四年  
添註侍郎二人尋罷萬曆末年復置

協理京營戎政一人或尙書或侍郎或右都御史掌京營操練之事永樂初設三大營總於武將景泰元年始設提督

團營命兵部尙書于謙兼領之後罷成化三年復設率以本部尙書或都御史兼之嘉靖二十年始命尙  
書劉天和輟部務另給關防專理戎政二十九年以總督京營戎政之印畀仇鸞而改設本部侍郎協理  
戎政不給關防萬曆九年裁革十一年復設天啟初增設協理一人尋革崇禎二年復增一人以庶吉士  
劉之綸爲兵部侍郎充之

刑部尙書一人正二品左右侍郎各一人正三品其屬司務廳司務二人從九品浙江江西湖廣陝西廣東山東

福建河南山西四川廣西貴州雲南十三清吏司各郎中一人正五品員外郎一人從五品主事二人正六品

年十三司俱增設主事一人成化元年增設四川廣西二司主事一人照磨所照磨正八品檢校正九品各一人司  
各一人後革萬曆中又革湖廣陝西山東福建四司主事各一人

獄司司獄大人從九品 尙書掌天下刑名及徒隸勾覆關禁之政令侍郎佐之十三司各掌其分省及兼領

所分京府直隸之刑名浙江司帶管崇府中軍都督府刑科內官御用司設等監在京金吾前騰驤左藩陽右留守中神策和陽武功右廣洋八衛審牧千戶所及兩浙鹽運司直隸和州

涿鹿左涿鹿中二衛江西司帶管淮益弋陽建安樂安五府前軍都督府御馬監火藥酒醋麵勛等局在京府軍前燕山左留守前龍驤寬河忠義前忠義後永清右龍江左龍江右十衛及直隸盛州府廬州

六安九江武清宣府前龍門各衛湖廣司帶管楚岷吉榮遼五府右軍都督府司禮尙書尙膳神宮等監天財庫在京留守右虎賁右忠義右武功左茂陵永陵江淮濟川水軍右九衛及興都留守司直隸靈

國池州二府宣州神武中定州茂山保安左保安右各衛渤海千戶所福建司帶管戶部太僕寺戶科寶鈔提舉司印綬都知等監甲字等十庫在京金吾後應天會州武成中武功中孝陵獻陵景陵裕陵泰

陵十衛牧馬千戶所及福建鹽運司直隸常州府廣德州中都留守左留守中定邊開平中屯各衛美峪千戶所山東司帶管魯德衡涇四府左軍都督府宗人府兵部尙書司兵科典牧所會同館俱用庫戈

鐵司司苑局在京羽林右藩陽左長陵三衛奠靖千戶所及山東鹽運司中都留守司遼東都司遼東行太僕寺直隸鳳陽府滁州鳳陽皇陵長淮泗州壽州滁州沂州德州德州左保定後各衛安東中護衛潮

河龍門監靖各千戶所山西司帶管晉代藩懷仁慶成五府翰林院欽天監上林苑監南北二城兵馬司混堂司甜食房在京旗手金吾右驍騎右龍虎大監中義勇前義勇後英武八衛及直隸鎮江府徐州

鎮江徐州藩陽中屯各衛藩陽中護衛倒馬關平定各千戶所河南司帶管周唐趙鄭徽伊汝七府禮部太常寺光祿寺鴻臚寺詹事府國子監禮科中書舍人神樂觀犧牲所兵仗局靈臺鐘鼓等司東城兵

馬司教坊司在京羽林左府軍右武德留守後神武左彭城六衛及兩淮鹽運司直隸淮安揚州二府淮安大河邳州揚州高郵儀真宿州武平歸德寧山神武右各衛海州鹽城通州汝寧各千戶所陝西司

帶管秦韓慶肅四府後軍都督府大理寺行人司尙衣監針工局西城兵馬司在京府軍後騰驤右豹韜鷹揚興武義勇右康陵昭陵龍虎左橫海江陰十一衛及河東鹽運司陝西行太僕寺甘肅行太僕寺直

隸太平府建陽保定左保定右保定中保定前各衛平涼中護衛四川司帶管蜀府工部工科巾帽織染二局僧道錄司在京府軍金吾左濟川武驤右大監前蔚州左永清左廣武八衛及直隸松江大名二

府金山懷安懷來各衛神木千戶所廣東司帶管應天府在京錦衣府軍左虎賁左濟陽留守左水軍左飛熊七衛及直隸延慶州懷來千戶所廣西司帶管靖江府通政司五軍斷事司中城兵馬司寶鈔

銀作二局在京羽林前燕山右燕山前大興左通州武驤左鎮南富峪八衛及直隸安慶徽州二府安慶  
新安通州左通州右延慶延慶左延慶右各衛 雲南司帶管順天府太醫院儀衛惜薪等司承運庫及  
直隸永平廣平二府鎮海真定永平山海盧龍東勝左東勝右撫寧密雲中密雲後大同中屯潼關營州  
五屯萬全左萬全右各衛寬河武定蒲州各千戶所 貴州司帶管吏部吏科司菜局及長蘆鹽運司大  
鹽都司萬全都司直隸蘇州保定河間真定順德五府蘇州太倉薊州遵化鎮朔興州五屯忠義中涿照  
鹿河關天津天津左天津右德州宣府左宣府右開平保安薊州永寧各衛梁城興和廣昌各千戶所照  
磨檢校照刷文卷計錄贓贖司獄率獄吏典囚徒凡軍民官吏及宗室勳戚麗於法者詰其辭察其情偽

俾律例而比議其罪之輕重以請詔獄必據爰書不得逢迎上意凡有殊旨別敕詔例榜例非經請議著

爲令甲者不得引比凡死刑卽決及秋後決並三覆奏兩京十三布政司死罪囚歲讞平之五歲請敕遣

官審錄免滯霜降錄重囚會五府九卿科道官共錄之矜疑者戍邊有詞者調所司再問比律者監候夏

月熱審免笞刑減徒流出輕繫遇歲旱特旨錄囚亦如之凡大祭止刑凡贖罪視罪輕重斬絞雜犯徒未

減者聽收贖詞訴必自下而上有事重而迫者許擊登聞鼓四方有大獄則受命往鞠之四方決囚遣司

官二人往泄凡斷獄歲疏其名數以聞曰歲報月上其拘釋存亡之數曰月報獄成移大理寺覆審必期

平允凡提牢月更主事一人修葺囹圄嚴固局鑰省其酷濫給其衣糧囚病許家人入視脫械鎖醫藥之

簿錄俘囚配沒官私奴婢咸籍知之官吏有過並紀錄之歲終請湔滌之以名例攝科條以八字括辭議

以准各 其及卽若 以五服參情法以墨涅識盜賊籍產不入塋墓籍財不入支度宗人不卽市官人不卽獄悼羣



疲癯不卽訊詳刑法志洪武元年置刑部六年增尙書侍郎各一人設總部比部都官部司門部部設郎中員

外郎各二人惟都官各一人總部比部主事各六人都官司門主事各四人八年以部事浩繁增設四科

科設尙書侍郎郎中各一人員外郎二人主事五人十三年陞部秩設尙書一人侍郎一人仍分四屬部

部設郎中員外郎各一人總部比部主事各四人都官司門主事各二人尋增侍郎一人始分左右侍郎二十二

年改總部爲憲部二十三年分四部爲河南北平山東山西陝西浙江江西湖廣廣東廣西四川福建十

二部浙江部兼領雲南部各設官如戶部之制二十九年改爲十二清吏司永樂元年以北平爲北京十九年革

北京司增置雲南貴州交趾三司宣德十年革交趾司遂定爲十三清吏司

工部尙書一人正二品左右侍郎各一人正三品其屬司務廳司務二人從九品營膳虞衡都水屯田四清吏司

各郎中一人正五品後增設都水司郎中四人員外郎一人從五品後增設營膳司員外郎二人虞衡司員外郎一人主事二人正六品後增設都水司主事五人營膳司

主事三人虞衡司主事二人屯田司主事一人所轄營膳所所正一人正七品所副二人正八品所丞二人正九品文思院大使一人正九品

品副使二人從九品皮作局大使一人正九品副使二人從九品後革鞍轡局大使一人正九品副使一人從九品隆慶元年大

使副使俱革寶源局大使一人正九品副使一人從九品嘉靖間革顏料局大使一人正九品後革軍器局大使一人正九品副

使二人後革節慎庫大使一人從九品嘉靖八年設織染所雜造局大使一人正九品副使一人從九品廣積通積蘆溝

橋通州白河各抽分竹木局大使各一人副使各一人大通關提舉司提舉一人

正八品萬曆二年革副提舉二人

正九品典史一人

後副提舉  
典史俱革

柴炭司大使一人

從正

副使一人尙書掌天下百官山澤之政令侍郎佐之營

繕典經營興作之事凡宮殿陵寢城郭壇場祠廟倉庫廡宇營房王府邸第之役鳩工會材以時程督之凡鹵簿儀仗樂器移內府及所司各以其職治之而以時省其堅潔而董其窳濫凡置獄具必如律凡工匠二等曰輪班三歲一役役不過三月皆復其家曰住坐月役一旬有稍食工役二等以處罪人輪作者曰正工曰雜工雜工三日當正工一日皆視役大小而撥節之凡物料儲侍曰神木廠曰大本廠以蓄材木曰黑窯廠曰琉璃廠以陶瓦器曰臺基廠以貯薪葦皆籍其數以供修作之用虞衡典山澤採捕陶冶之事凡鳥獸之肉皮革骨角羽毛可以供祭祀賓客膳羞之需禮器軍實之用歲下諸司採捕水課禽十八獸十二陸課獸十八禽十二皆以其時冬春之交置罟不施川澤春夏之交毒藥不施原野苗盛禁蹂躪穀登禁焚燎若害獸聽爲陷穽獲之賞有差凡諸陵山麓不得入斧斤開窯冶置墓墳凡帝王聖賢忠義名山岳鎮陵墓祠廟有功德於民者禁樵牧凡山場園林之利聽民取而薄征之凡軍裝兵械下所司造同兵部省之必程其堅緻凡陶甄之事有歲供有暫供有停減籍其數會其入毋輕毀以費民凡諸冶飭其材審其模範付有司錢必準銖兩進於內府而頒之牌符火器鑄於內府禁其以法式洩於外凡額

料非其土產不以征都水典川澤陂池橋道舟車織造券契量衡之事水利曰轉漕曰漕田歲儲其金石  
竹木卷埽以時修其開濬洪淺堰圩隄防護蓄洩以備旱潦無使壞田廬墳隧禾稼舟楫磴礪者不得與  
漕田爭利漕田者不得與轉漕爭利凡諸水要會遣京朝官專理以督有司役民必以農隙不能至農隙  
則僱功成之凡道路津梁時其葺治有巡幸及大喪大禮則修除而較比之凡舟車之制曰黃船以供御  
用曰遮洋船以轉漕於海曰淺船以轉漕於河曰馬船曰風快船以供送官物曰備倭船曰戰船以禦寇  
賊曰大車曰獨轅車曰戰車皆會其財用酌其多寡久近勞逸而均劑之凡織造冕服詔敕制帛祭服淨  
衣諸幣布移內府南京浙江諸處周知其數而慎節之凡公侯伯鐵券差其高廣制式詳禮志凡祭器冊寶乘  
輿符牌雜器皆會則於內府凡度量權衡謹其校勘而頒之懸式於市而罪其不中度者屯田典屯種抽  
分薪炭夫役墳塋之事凡軍馬守鎮之處其有轉運不給則設屯以益軍儲其規辦營造木植城磚軍營  
官屋及戰衣器械耕牛農具之屬凡抽分征諸商視其財物各有差凡薪炭南取洲汀北取山麓或徵諸  
民有本折色酌其多寡而撙節之夫役伐薪轉薪皆僱役凡墳塋及堂碑碣獸之制第宗室勳戚文武官  
之等而定其差墳塋制度詳禮志洪武初置工部及官屬以將作司隸焉吳元年置將作司卿正三品少卿正四  
品丞正五品左右提舉司提舉正六品  
同提舉從六品司程典簿副提舉正七品軍需庫大  
使從八品副使正九品洪武元年以將作司隸工部六年增尙書侍郎各一人設總部虞部水部并屯田

為四屬部總部設郎中員外郎各二人餘各一人總部主事八人餘各四人又置營造提舉司洪武六年改將作司

為正大品所屬提舉司改正七品尋更置營造提舉司及營造提舉分司每司設正提舉一人副提舉二人隸將作司八年增立四科科設尙書侍郎中各一人

員外郎二人主事五人照磨二人十年罷將作司十三年定官制設尙書一人侍郎一人四屬部以屯田部為屯

部各郎中員外郎一人主事二人十五年增侍郎一人二十二年改總部為營部二十五年置營繕所改

作司為營繕所秩正七品設所正所副所丞各二人以諸匠之精藝者為之二十九年又改四屬部為營繕虞衡都水屯田四清吏司嘉靖後

添設尙書一人專督大工

提督易州山廠一人掌督御用柴炭之事明初於沿江蘆洲并龍江瓦屑二場取用柴炭永樂間遷都於

北則於白羊口黃花鎮紅螺山等處採辦宣德四年始設易州山廠專官總理景泰間移於平山又移於

滿城相繼以本部尙書或侍郎督廠事天順元年仍移於易州嘉靖八年罷革改設主事管理